

ABRAHAMUS AVRELIUS. EC<sup>CL</sup>. GAL<sup>LO</sup>. L<sup>ON</sup>D. PASTOR.



*Vivus AVRELI vultus exculsit in ære:  
Mores haud potuit sculperæ Chalcographus:  
Neue opus: æternis dictis, factisque, librisque  
Jampridem mores sculpserrat ipse suos.*

V. Fec.

1631.

ABRAHAMUS AVRELIUS. EC<sup>CL</sup>. GAL<sup>LO</sup>. L<sup>ON</sup>D<sup>ON</sup>. PASTOR.



*Vivus AVRELI vultus exculsit in ære:  
Mores haud potuit sculperæ Chalcographus:  
Neue opus: æternis dictis, factisque, librisque  
Jampridem mores sculpserrat ipse suos.*

V. Fec.

1631.





**IOBUS,**  
**SIVE**  
**DE PATIENTIA**  
**LIBER**  
**POETICA METAPHRASI**  
**EXPLICATUS.**

Authore **ABRAHAMO AURELIO** Ecclesie  
Gallo-Londinensi Pastore.



*H. 5. 27*



**LONDINI,**  
**Impress. in Aedibus Roberti Junii. 1632.**

*B. 1 sh 3.*



I O B U S

A I T

D E

H R A S I

P O R T

o Ecclie

Ante



I. COR. XIII. XII.

*Cernimus nunc per speculum et per enigma: tunc autem facie ad faciem cernemus.*



L O N D I N I

Impressum in Aedibus Roberti Fournier 1532.





AMPLISSIMO VIRO  
D. ALBERTO IOACHIMI, Equiti Domino  
Oostendæ in Oedequensquerke, Illustrissimorum, Potentis-  
simorumque Dominorum Ordinum Generalium Foe-  
deratis Belgij apud Serenissimum Magna Bri-  
tanniae &c. Regem Legato.

**D**Araphrasin meam in Iobum edituro, pauca, Vir  
Ornatissime, apud te, si pateris, praefari mihi vi-  
sum est, cum de libro ipso, tum de ratione instituti  
mei utrumque breviter perstringam.  
De primo qui confictum hic quoddam *sermo*  
sive Parabolam, non veram rei gestae historiam  
narrari censuerunt, eorum jampridem explosa  
sententia est, nec mirum: nam & ea quae alibi de  
Iobo in S. L. leguntur, & tot germanae narrationis circumstantiae,  
ut nomina, ut patria, ut genus, ut aetas, & conditio tum Iobi, tum ali-  
orum de quibus hoc libro agitur, necessario evincunt eum re ipsa ex-  
titisse, resque non fictas, sed verè gestas hic describi. Atcedit eodem  
testis locuples Chrysostomus, qui scribit monstratum fuisse sanctissi-  
mi hujus viri sepulchrum. De tempore autem quo vixerat, nihil cer-  
ti exploratique habemus, eorum tamen maximè probabilis videtur  
sententia, qui vel tempore Captivitatis Egyptiacae, vel mox post libe-  
rationem Israelis ex Aegypto, & ante legem datam cum vixisse con-  
jiciunt, cujus rei non condemnandam probationem nobis suppedi-  
tant sacrificia quae obtulit in patria sua, non in loco sacrificiis a Deo  
designato. Nemo enim mihi facile persuadeat Virum tam rare piete-  
tis alibi sacrificaturum fuisse, si post legem latam vixisset, quam co-  
ram

Exe. 14. 14.  
Ioc. 1. 11.



## *Epistola Dedicatoria*

Rom. 9. 14.  
et 11. 35.  
1. Cor. 3. 9.  
Iac. 5. 11.

ram Arca, vel Tabernaculo Dei, utile lege sancitum erat. Quicquid sit, antiquissimam hanc esse historiam, lectuque dignissimam res ipsa declarat, nec ab ullo interpretum in dubium vocatur, ut de scriptore inter se dissideant, aliis a Iobo ipso, cuius praefert nomen apud Hebraeos, aliis a Mose, aut Prophetarum aliquo illius seculi scriptam aestimantibus. Qua de re non est anxie laborandum, cum de Authore principali, nimirum Spiritu Sancto, nulla sit dubitatio, testibus ipsis Apostolis, qui eam sua autoritate non semel confirmarunt.

Multa his adjungi possent de varia & multiplici hujus libri materia, de stylo, de ornatu, de utilitate & usu, aliisque similibus, quae ad praestantiam tam eximii scripti pertinent, sed cum haec omnia cuivis obvia sint & exposita in doctissimorum hominum Proaemiis in Iobum, supervacaneo hoc labore super sedere malui, quam huiusmodi sermonibus aliunde repetitis Epistolae limites extra modum protendere. Illud tamen praeterire non possum. Esse videlicet hanc historiam hisce tam miseris deploratisque temporibus accommodatissimam, utpote in qua deus fidelissimum suum servum Iobum omnibus praire voluit exemplo patientiae, quae sane in illo tanta fuit, ut nullis Satanae Ministrorumque illius oppugnationibus, nullis machinis, aut artibus (quae tamen & plurimae fuerunt & gravissimae) a vero Dei cultu vel tantillum quidem avelli potuerit. Unus idemque dies vidit ipsum opulentum, & inopem; honoratum, & contemptum; stipatum, & derelictum; sanum, & aegrotum; purpuratum, & pannosum; habitantem in palatiis; & iacentem in pulvere; abundantem liberis, & mox omni orbatum sobole, omni destitutum solatio. En mira rerum vicissitudo! ceterum in rebus tam subitis, tamque angustis ita se gessit, ita vixit fortissimus hic Dei Athleta, ut quasi Pancratio victor triumphalem lauream meruerit. Nam & Dei ipsius iudicio absolvitur, & in duplo felicior quam antea statum restituitur. Sed haec haec de Iobo ipso, ne longior sim quam sit necesse, reliqua deinceps persequar pari brevitate. Complurculi sunt anni, cum primum Libellum hunc verè aureum Latino carmine exprimere egressus sum; minimè id quidem quod cum tam divini operis dignitate, Maiestateque paria me facturum sperarem, sed ut quod adolescentulus operae studii in re Poetica posueram, id omne postmodum ad res sacras illustrandas explicandasque transferrem. Exordii autem a Iobo volui maxime, quia nusquam melius huiusmodi studia

dia



*Epistola Dedicatoria*

dia collocari, nusquam stylum felicius exerceri posse iudicabam. Fu-  
erunt quidem ante me alii, iique doctissimi, qui in hac eadem arca de-  
sudarunt, neque omnino infelicitur: sed quoniam quæ illi in Iobum  
carmine scripserunt, serò admodum, nec nisi post inchoatam pene-  
que absolutam hanc Paraphrasin in manus meas pervenerant, non  
faciendum putavi, ut omni, quem susceperam, labore effuso, tot mi-  
hi vigiliæ in medio cursu deperirent, præsertim cum hic habeat lo-  
cum vetus laudatumque Græcorum proverbium, *Δις ἡμέρας πέναν*. Per-  
rexī igitur in perficiendo opere, & ad umbilicum, Dei beneficio tan-  
dem perduxī, caubique adhibita diligentia & curâ, ut a veritate He-  
braici contextus, quem semper ob oculos habui, ne transversum, ut  
aiunt, unguem discefferim, atque hæc iustis rerum æstimatoribus a-  
bundè, ut spero, satisfacient. Quod si quis tamen rigidior alieni labo-  
ris animadversor obiicere pergat me Iliada post Homerum scribere,  
falceque in aliorum messem iniicere, is sibi responsum hoc habeat,  
tantam esse huius libri obscuritatem, ut nullius in eo explanando la-  
bor pro supervacaneo atque inutili haberi debeat. Hoc mihi puto  
palmarium. Adiiceretamen licet tum illud Terentii, *In medio omni-  
bus palmam esse positam*: tum gravem magni Augustini in re simili  
sententiam. *Utile, nempe, esse plures libros à pluribus fieri diverso stylo,  
non diversa fide, etiam de questionibus iisdem, ut ad plurimos res ipsa  
perveniat, ad alios sic, ad alios autem sic*. Hæc me & similia æqua iu-  
dicii lance pensitantem induxit tandem amicorum hortatus, ut pœ-  
ma hoc, quod iamdiu, velut fæcus malè natus, inter schedas meas la-  
cuit, publici iuris facerem: non quidem laureolæ in mustaceo quæ-  
rendæ gratiâ; (quod aucupium fugient semper generosi animi) sed  
ut nobilissima Iobi historia pœleos nectare delibuta, & brevi simul  
& perspicua, quoad eius fieri potuit illustrata Paraphrasi, acceptior  
omnibus & utilior redderetur. Plura in hanc rem dici possent, sed  
neq; omnia dicere animus est, & candidis iudiciis iam dicta sufficient.

De reliquo, quem huic parvo opusculo me Patronum ut (fert  
consuetudo) quererem non diu mihi deliberandum fuit. Nam cum  
tu is sis, Vir amplissime, in quo uno cunctas habitare virtutes, pie-  
tatem verò imprimis, summâque prudentiam & gravitatem comitate  
conditam omnes uno ore fatentur & prædicant. Fecit profecto tot  
& talium virtutum admiratio & amor, ut hoc quicquid est libelli ti-  
bi dicarem consecraremque tanquam indicem paratissimæ meæ erga

A. T.

*Epistola Dedicatoria*

A. T. observantiae & constantissimi sponforem officii, quod studium  
meum (quae tua est facilitas atque humanitas) æqui boni, confido consules.  
Interea Deum Optimum Maximum oro. venerorque ex animo, ut te  
cum omnibus tuis quam divitissime conservet incolumem, atque om-  
ni maximarum benedictionum suarum genere quam largissi-  
me cumulet ad Nominis sui gloriam, & ad Ec-  
clesiae, Reique publicae bonum.  
Amen.

Tuae Amplitudini addictissimus.

ABRA. AVRELIUS.

---

---





GILBERTVS PRIMIROSIUS  
In Clarissimi Doctissimique Viri D. AVRE-  
LII Ecclesiae Gallico-Londinensis Pastoris, &  
Collegae sui Amantissimi  
IOBVM.



Urea qui invicti potuisti carmina Iobi  
Auro carminibus dignis, numerisque latinis  
Exornare, dabit qui te tibi carmina digna  
AVRELI? O vates Scottis venerande, silentos  
Te patria & Musis dias in luminis auras  
Si quirent iterum redivivum sistere, rerum  
Obvia dum spernis, calles tentasse paderet  
Ignotos fidibus graijs, musisque latinis.  
Nam tibi dum nimium vena, nimiumque suavi  
Indulges calamo, Carmen fluit, effluit autem  
Iobus, & auristuo queritur se carmine frangi.  
At tu diuinum vatem diuine poeta  
Æquo dum sequeris cantus pede, verbaque verbis  
Respondere doces, sanctis latialia, gratum  
Inque tuis verbis servas numerisque leporem;  
Prima hederæ carpis victricis premia, & herbam  
Tradit Adamsonus Præsul tibi, gloria gentis  
Altera Scottorum, ceditque Poëta Poëta.

COLLEGA

\*\*\*

AVRELI





IN OBITVM DOCT. ET ORNA-  
tis. viri AB R. AVRELI Ecclesiae Gallo-Londi-  
nensis Pastoris vigilantissimi, Collegæ sui Aman-  
tissimi GILBERTI PRIMIROSI  
ELEGIA.



*I privata mihi fas est incommoda flere;  
Flere etiam fas est publica damna mihi.  
Te flebo AVRELI, privata incommoda flendo:  
Te flendo, AVRELI, publica damna fleo.  
Tu mihi consultor prudens, Collega suavis,  
Rebus in incertis certus amicus eras:  
Quod rarum est, studiis delectabamur iisdem,  
Amboque fraternis viximus una animis.  
At mihi nunc nemo est frater, consultor, amicus,  
Qui te sublato sit velut alter ego.  
Ergo mihi si fas privata incommoda flere,  
Te flere extinctum quis putet esse nefas?*

*Eia robusti juvenes, teneræque puellæ,  
Matronæque graves, decrepitique senes,  
Belgæ, Sequanici, Celtæ, quos dira Papisui  
Barbaries, almâ dispulit à patriâ,  
Londinumque sinu tepido suscepit, opesque  
Tutas, cum purâ religione dedit:*

AVRELI



**AVRELI** funus Pastoris ducite flentes :

**AVRELI** flentes condite corpus hamo.

*Vos Vidua flentes Viduam deducite flentem*

**AVRELI**: id parilis sor/sque dolorque iubent.  
*Sunt causae flendi magna. Quod blandula mater*

*Lallanti est puero, quod liberisque pater;*

*Quod sponsa est sponsus casta, quod amicus amico*

*Fidus, quod fratri vir probus esse solet;*

*Quod caecis hodie prudens, medicusque peritus*

*Aegroto est, charus quod socio est socius;*

*Quod gregibus vigilans pastor, quodque esse Clienti*

*Patronus debet, discipulisque docens;*

*Quod mitis Plato Graiis, quod Cato severus*

*Ausoniis, lapsis quod Cipriani erat;*

*Quod fuerat cunctis **AVRELIUS AVGVSTINVS***

***AVRELI** à cuius nomine nomen habes.*

*Difficilis, facilis, iucundus acerbus, amator,*

*Osor, ut hinc virtus, hinc vitiumque fuit.*

*Nobis dum vixti, nobis haec cuncta fuisti,*

*Pluraque quam tenuis pangere musa potest.*

*Præfica discedat falsos quæ flere dolores*

*Conducta extortis nos doceat lachrymis:*

*Nos tua vera fides, doctrina, atque aurea virtus,*

***AVRELI**, veris flere docent lachrymis:*

*Nam nobis si fas incommoda publica flere,*

*Te flere extinctum quis putet esse nefas?*

**A**

**Doctis**

*Doctissimo Interpreti Epitaphium*  
*Ces. Calendrini.*

**A**VRELIO vivo vixit patientia IOBI,  
Nunc Liber amborum suppleat iste vices.  
IOBVS in AVRELIO diu post sua fata revixit:  
In IOBO AVRELIVS posthuma fata leget.  
Seria res agitur, cum IOBI effingere questus  
Aureliana novo carmina Musa studet.  
Intima de proprio ducit suspiria sensu  
Interpres: mage sis audiat Autor idem.  
Vix aliena canit: tota praxi alter IOBVS,  
Moribus, ingenio, conditione, fide.  
Scilicet AVRELIVS simul in discrimine luctans,  
Tale animo dudum parturiebat opus.  
Ardua res homini, nisi quod submissus ab alto  
IOBVS sacrati pectoris ima subit:  
Ceu redeunt in sole atomi; fugitiva repente  
Somnia sistuntur; pectoris ima patent:  
Ergo alio dictante sui sensa abditi cordis  
Agnoscit vates, doctaque dextra docet.

*Anonymus.*

Sparserat audaces, diviso Idiomate, Gentes  
Numen, & haud uno jusserat ore loqui:  
Fige oculos, Lector; faciem cum videris unam,  
Tot gentes unà cernere jure putes.  
Omnis in angusto confedit lingua palato,  
Omnis in hoc uno lingua diserta fuit.  
Accipe Romano IOBVM sermone querentem;  
Non pudet Hunc Illum sic docuisse loqui.



## Ad D. AVRELI I Iobum.



*Ivis Idumae quondam telluris Iöbe,  
Quam bene patritium Romana veste Quiritem  
Te facis, & lato velas tua vulnera clavo!  
Aspicias ingenua quam grandia carmina vena  
Te miserans sacro fundat modulamine vates,  
Utque tuum Aonio perfundat melle dolorem,  
Mincius indigena cesset meminisse Maronis*

*Major adest genius, cui non vesanus Achilles  
Dicitar, aut Tityri pecudes, Aeneiaque arma;  
Sed Deus ipse Deus Sancta gravitate tremendum  
Intonat, & vocis percellit fulmine mentes;  
Hoc versu imperium effatur, numerosque modosque  
Ipse dat, & sacri fovet instrumenta furoris.  
Talibus ora modis fracta de nube coruscus  
Solvit, & obscura vestit caligine flammæ,  
Terribilis quoties magnum per inane tonantes  
Urget equos, volucremque rotat super aethera currum,  
Cum fremit ad tonitru, fumumque pavore volutat  
Bruta licet, nutatque suo sub pondere tellus,  
Ignibus aethra micat, properant vaga flumina retro,  
Pigraque diffugiunt & Tartara consternuntur.  
Nec minor est quando pennis levioribus ales  
Scindit iter medium, & sensim delapsus ab alto,  
Fit cælo & terra ambiguus, celsusque, humilisque  
Nunc pleëtri grauioris amans cytharam increpat acer  
Nunc blando faciles demulcet pollice chordas;  
Accipitri similis qui nunc sublimis ad aethram  
Scandit, finitima plumam modo librat in aura,  
Et liquido molles designat in aëre gyros.  
Usque idem similisque sui, non ultima primis  
Carmina, non medijs currunt diversa, sed inter  
Millia tot parili procedunt singula passu.  
Ac veluti largos volvit per secula fluctus  
Ingens Pactolus, flavisque superbit arenis:  
Non secus Herous leta fluit aureus unda,  
Et facili longum decurrit flumine carmen.*

*An melior puris variare coloribus Eo,  
Cum nitet, atque rosas croceo demittit ab axe:  
Scilicet atherio saturatas nectare guttas  
Diffundit lachrymis, gemmisque liquentibus agros  
Latificat, summas circumpendentibus herbas  
Cælum aperit, pluit argento terrisque renidens  
Aurea purpureo pratexit nabilia limbo  
An cum fingit equum! Collo ferus ille minaci  
Arduus, indomitos animosi pectoris ignes  
Naribus expirat, fremituque, oculisque fatetur,  
Excipit aure tubas, & ad arma superbus ad arma  
Emicat, in medios equitem trahit impiger hostes,  
Et furit, ingenuumque viro stimulante furorem  
Vngula precipitem subito rapit impete cursum.*

*An melior quando flentem miseratus Iöbum  
Solatur lachrymis lachrymas, querulusque gementi  
Aggemit, Aeolio ducens suspiria versu,  
Et reddit planctus, & fletibus ulcera mulcet.*

*Salvete O docti gemitus. Quis omnia cedunt  
Gaudia, vesanas æstro pungentia mentes.  
Hinc procul, O molles, Gracorum crimina, nuga  
Nothus Amor, meretrixque Venus, Satyrique, Cyclopesque  
Et nunc ille Deus ponti, nunc bellua Proteus.  
Iejuna procul hinc veterum deliria Musa,  
Cedite divinos sapiunt hac metra furores,  
Atque merum vati spirant praeordia numen.  
Cedite pernicies hodierni magna papyri  
Progenies cheu nimium numerosa poeta:  
Frangite si pudor est calamos, succidite chordas,  
Atque lucubratos igni permittite versus:  
Hic equidem appendo cytharam, extremumque laborem,  
Hic plectrum, & modulos, & spem depono corona.*

*Hæc quæ mihi expressit admiratio, ex animo,  
ascripsi. PETRVS MOLINÆVS filius.*





## IOBUS.

### C A P. I.

*Iobus, vir imprimis pius, & sua gentis facile Princeps, è prosperrimo vitæ statu in miserrimum repente coniectus, amissis tum fortunis omnibus, tum liberis, ne transfusus quidem unguem ab officio discedit.*

**E**lices Arabum regiones inter & arva  
 Gentis Idumææ terra est antiqua, coloni  
 Vixam dixere, Heros ubi maximus olim  
 Floruit: huic IOBO nomen: iustissimus unus  
 Qui fuit in terris, & servantissimus æqui;  
 Quo nemo vel Numen amet, vel crimina vitet  
 Sanctior. hunc gnatis septem, ternisque parentem  
 Natabus fecit larga indulgentia cœli,  
 Nec minus ille opibusque potens, atque ubere glebæ:  
 Millia cui septem pecudum per pascua læta  
 Balantum errabant latè, ter mille Cameli:  
 Mille ad aratra boves sulcis depressa gemebant;  
 Quingentæque operis devotæ onerique ferendo  
 Tondebant dumeta asinæ: cui denique tanta  
 Præstò erat accinctæ ad famulatum copia turbæ,  
 Esset ut Eois longè clarissimus oris.  
 Ecce autem interea fraterna ad pocula Nati  
 Collecti veniunt, & certo fœdere tectis  
 Quisque suis, vice quisque alterna fratribus unam  
 Omnibus insternunt mensam, ternasque sorores

Accitas fociant epulis, & pectora mulcent.  
 Tantus amor fratrum, tantæ est concordia curæ,  
 Dein postquam lux quæque dapum circum islet in orbem,  
 Continuò gnatos genitor simul advocat omnes  
 Edicitque, Deo precibus, votisq; repenti  
 Ad sacra lustrentur: nec non cum sidere primo  
 Luciferi surgens pecudes de more tenellas  
 Immolat, & castis totas cremat ignibus, aræ  
 Impositas, numerumque omni cum prole peræquat.  
 Fors, dicebat enim, quiddam inter pocula nati  
 Peccarint, nomenque Dei, laudesque sinistro  
 Detrinxerint animo, talem se quoque gerebat  
 Ille die haud fictis veneratus Numina votis.  
 Nati autem alterius dum curant fercula mensis,  
 Concilium solemne vocat Rex magnus Olympi  
 Sideream in sedem, terras vnde arduus omnes  
 Despicit. extemplò sancti glomeramen in unum  
 Cælicolæ ad solium supremi & lumina Patris  
 Accincti apparent, nutumque & iussa capeffunt.  
 Per medios infert sese, mirabile dictu,  
 Tartareus Dæmon. cui lova; heus, unde locorum  
 Acer ades? Veni extremis, ait, orbis ab oris,  
 Quas modò, terrarum peragrans sola vasta, revisi.  
 Tum Deus, Anne meum lustrasti lumine lobum,  
 Fidum adeò usque mei cultorem Numinis; ingens  
 Cui probitate parem terrarum haud sufficit orbis,  
 Quiq; animo quæ recta pio, fraudumque carente  
 Sectatus, me rite suum Dominumque Deumque.  
 Et colit & vetitæ refugit contagia, labis?  
 Sic memorat: Stygio Satanas cui talia corde  
 Ingreditur. Gratisne Deum timet ille, tuisque  
Nequicquam meritos aris imponit honores?



Hac tu nonne tenuis ceu vallo illumque, domumque  
 Illius invicto læpsti, & quascunque referto  
 Fudit opes circum immerito tua dextera cornu ?  
 Quicquid agit, quodcunque manu molitur, id omne  
 Felici tu sorte beas, tu armenta, gregesque  
 Auges quotidie ; terque est, te authore, beatus.  
 Verum, agè, cuncta manu modò quæ tenet integer ille,  
 Infestus quate ; dispeream, ni te ocyus ore  
 Latranti malus incessat, coramque laceffat.  
 Cui Deus : En quæ diues habet, gnatique, domusque,  
 Quadrupedesque amplis tondentes gramina campis,  
 In manibus sint cuncta tuis, me & sponte remitto,  
 Tantum ipsi modò parce manus afferre nocentes.  
 Hæc ubi dicta, citus tenues diversa per auras  
 Ex oculis fugit ille Dei, terrasque revisit  
 Iamq; simul fratris primævi in sedibus altis  
 Securis fratres animis, ternæque sorores  
 Dulcia sæcundis carpebant fercula mensis,  
 Lenæiq; hilares miscebant pœcla liquoris,  
 Ocyus accurrit cùm sancti ad limina Iobi  
 Nuntius, & tristi sermone everberat aures ;  
 Iuncti ad aratra tui versabant arva iuveni,  
 Reclivesque secus pascebant gramina asellæ,  
 Ecce virum furibunda phalanx de gente Sabæa  
 Irruit, avertitque armenta : fero ense colonus,  
 Ense miser stricto cadit armentarius omnis ;  
 Vixque adeò super unus eram, qui hæc tristitia ferrem  
 Nuntia, & infandis implerem questibus auras :  
 Has inter voces, media inter talia verba,  
 Ecce alius, mora nulla, supervenit, atque ita fatur,  
 O Pater, acta polo cecidit vaga flamma, potenti  
 Fulmine missa Dei, sævumque gregi intulit ignem,



Intulit & ducibus, miserisque absumpsit ad unum;  
 Vixq; adeo super unus eram qui talia ferrem  
 Nuntius. hæc illo referente, supervenit alter,  
 Clamatque, instructis triplici tribus ordine turmis  
 (Proh dolor!) in famulos, & in omnes Turba camelos  
 Chaldaea immisis latè se effudit habenis,  
 Cepitque, & cunctam percussit acinace pubem,  
 Vixque adeò super unus eram qui talia ferrem  
 Nuntius. hæc illo referente supervenit alter,  
 Vnda velut sequitur duplicatis fluctibus undam,  
 Ah! nati, nataeque tuæ convivia tectis  
 Dum fratris celebrant, fratrum qui maximus ævo,  
 Et læta inter se commiscent pocula Bacchi,  
 En subito assurgens deserti è finibus atrox  
 Tempestas sine more ruit, velut agmine facto,  
 Quadrataeque domus molem, quæ summa labantes  
 Iuncturas tabulata dabant, convellit ab alto  
 Culmine, prosternitque; ea lapsa repente ruinam  
 Cum sonitu trahit, & gnatos super incidit omnes,  
 Occiditque cheu! indigno funere: cæsis  
 Vix adeò super unus eram, qui talia ferrem  
 Nuntius. Hoc genitor casu concussus acerbo  
 Surgit, & in visos humeris abscindit amictus;  
 Quin tonsâ de more comâ procurvus adorat  
 Stratus humi, atque humili has effundit pectore voces;  
 Exivi nudus genitrici matris ab alvo,  
 Nudus & ætherea defunctus luce redibo  
 In terram. Deus illa dedit, Deus abstulit idem:  
 Laudetur per secula Dei venerabile Nomen.  
 Hac præclara tenus Iobi constantia tantis  
 Pressa malis nullo temeravit crimine dextram  
 Nec malè sana Deo proiecit murmura labris.



*Iobus in pietate solita perseverans, à Satana rursus gravissimè affligitur, ab Uxore deridetur, & ab Amicis invisitur.*

**F**ORTÈ die ecce alio magni gens sancta Tonantis  
 Cælicolæ, ex omni volitantes agmine læti  
 Conveniunt, Patrisque, suo de more frequentes  
 Ad solium sublime fluunt. Stygis incola diræ  
 Se medium his infert Satanas, coramque resistit.  
 Tartareis instructa dolis, atroq; veneno  
 Corda gerens cui Iova prior: Satan, unde locorum  
 Irrequietus ades? contra ille, è finibus Orbis,  
 Quos modò, terrarum peragrans sola vasta revisi.  
 Tum Deus: anne meum, vidisti hæc inter, Iobum,  
 Cui totus pietate parem non sufficit Orbis,  
 Quique adeò integri custos studiosus & æqui,  
 Numinis & veri cultor contagia mundi  
 Devitat? viden' ut priscae probitatis honorem  
 Servat adhuc, mihi quantumvis tu suafor & author  
 Perdendi nequicquam hominis, rerumq; fuisti?  
 Dixerat. Ille dolis arque arte instructus Averni  
 Actutum stygio depromit talia corde,  
 Pellem equidem propelle; & quæ sibi cunq; pacisci  
 Quis dubitet dulci pro vitæ munere? mentem  
 In peius sed enim referens, dextram iniice tantum  
 Infestam, tange ossa manu, quate verberare corpus  
 Lethifero. Mirum, nisi in os tuus integer ille  
 Te probro incescat blateranti hæc Rector Olympi  
 Subiicit. En fraudiq; tuæ, flagrisq; remitto  
 Infontem famulum: vitæ tantum illius uni  
 Parce memor, nec plura auditis lætior istis  
 Ex oculis fugit ille Dei, Iobumque latenter



Invadens, tetro miserum ferit ulcere corpus.  
 Dira lues udo penitus sublapsa veneno  
 Viscera pertentat, summoque à vertice ad imos  
 Plantarum articulos squalentia membra pererrat.  
 Tum scabra illuviem satagens destringere testa  
 Insidet infelix cinerem lobus, aspera secum  
 Fata gemens plagis mox at crudelior ipsis  
 Res oritur. Conjux, alias dulcissima, tantis  
 Cladibus evicta hac miserandum voce maritum  
 Alloquitur : perstatne tibi tua, talia passo  
 Integritas, animusque insons ? I, perge Tonantem  
 Perge Deum meritis extollere laudibus, amens,  
 His qui te ærumnis, qui sævo funere mersum  
 Obruit, & dura hæc pro cultu præmia reddit.  
 Ille autem : Ah ! tantumne crepas ceu scæmina nequam  
 Flagitium, conjux ? Ergon' felicibus auctam  
 Cælitus auspicijs sortem capiemus amico  
 Pectore, & adversam non accipiemus eodem ?  
 Hac miranda tenus lobi patientia tantis  
 Acta malis, sacro temerè nihil extulit ore.  
 Intercæ subitæ passim vulgata ruinæ  
 Fama, viti ad ternos postquam pervenit amicos,  
 Extemplò patriisque arvis, laribusque relictis  
 Carpunt quisq; viam, & condito tempore in unam  
 Sedem ex diverso veniunt, quo tristia fata  
 Condoleant, casumq; ægri solentur amici ;  
 Nempe Eliphas Themanita genus, Bildadq; Suhita,  
 Et Sophar Namatita. hi scædum sordibus ora  
 Ignorant socium, sublatis eminus acres  
 Dum spectant oculis, post notum cominus alto  
 Ploratu deflent, lacerantque in pulvere vestes,  
 Pulvere & aspergunt tetro frontemque, poliumque :



Quin & humi lucēs septem, tot tīdemque recumbunt  
Cum mœsto noctes, nec quisqua in affarier ægium  
Audet, in immensum quia pestem excrecere cernunt.

## CAP. III.

*Iobus tot tantarumq; afflictionum oneri succumbens ad tempus, natalem suum execra-  
tur diem, & cum Deo de vita accepta, conservataq; expostulat.*

**I**Lle autem indomito ut patuit via prima dolori,  
Protinùs immeritum Diris ultricibus ortum  
Devovet, infando prorumpens talia questu :  
Ah ! pereat lux illa, meæ quæ exordia vitæ.  
Prima dedit : nox & pereat tam tristibus acta  
Fatorum eventis, genetrix qua dicta misellum  
Progenuisse marem. Aeternis lux illa tenebris  
Damnetur, supero nec eam Deus axe requirat,  
Neu super auricomus splendescat lampade Titan.  
Pollutam infament lethalibus undiq; spectris  
Atrores Erebi, nubesq; horrentibus alis  
Incumbant, quæ corda metu mortalia summo  
Terrificent, scelerum veluti furialibus acti  
Terrentur stimulis, queis lux invisā dici,  
Quosq; infelicitis ceperunt tædia vitæ.  
Illa etiam magnæ nox umbris mersa sororis  
Effluat è fastis, è mensibus effluat anni :  
Solæ dehinc nox illa vacet, tristici, sub umbra  
Secubet æternùm deserta ; neq; audiat hymnos,  
Festivosq; jocos, neu lætæ júbila linguæ,  
Quin Diris sine fine sacram crudelibus omnes  
Devoveant, qui mole malorum, & turbine sortis  
Adversæ oppressi, vitæ malè fausta precantur,  
Iugiaq; integrant miseris lamenta querelis.



Sidera tam ingratae, sub prima crepuscula, noctis,  
 Condantur tenebris, notasque ea speret Olympo  
 Incassum flammis, nec cernat clara rubentis  
 Auroræ eo quæ mittit spicula tractu.  
 Quippe quod infastæ non clausit ostia vulvæ,  
 Nec mala tot curasque oculis averterit olim.  
 Mene heu! materna conceptum extinguer alvo  
 Non potuisse, animamve recenti efflare sub ortu?  
 Quid me obstetricis genua exceper calentem  
 A vulvâ? cur ore avido nimis ubera suxi?  
 Namque sopor molli compositum membra foveret  
 Iam gremio, & placidâ fruerer per secula pace  
 Concilio Regum immistus, mundi; Dynastis,  
 Qui fastus monumenta sui per tesqua, ubi tritum  
 Nulla hominum callem monstrabat femita, celsas  
 Extruxere arces & vasta palatia quondam;  
 Aut Procerum numero adscriptus, queis plurima, stabant  
 Dum regno incolumes, auro, argentoq; fluebant  
 Atria, regaliq; nitebant limina luxu:  
 Deniq; abortivo par, qui penetralibus alvi  
 Vix conceptus obit, vel par ego foetibus, ævi  
 Limine mox primo defunctis luce, iacerem  
 Exanimis, uelut optato telluris amatae  
 Inclusus thalamo; sævis ubi sueta rapinis  
 Gens parcit terrere pios; ubi fata quietas  
 Ostendunt fractis sedes fessisq; laborum  
 Innocuis; ubi vincti agitant simul otia, vinctis  
 Disruptis, neque vocem audit iam Verna severi  
 Exactoris. agit nullo hîc discrimine pauper  
 Divesque, obscuri genus, & diademate clari;  
 Imperia hic tenuit securus herilia servus.  
 Quid lucem ærumnoso homini, quid pectora mæstis



Vsuram vitæ malè gratae indulgeat æther?  
 Qui mortem exoptant, nec adest, imisque latentem  
 Thesaurum veluti terræve undæve latebris  
 Scrutantur solerte oculo, tandemque sepulchro  
 Invento exultant, ipsoq; in funere gaudent.  
 Heu! quid vita viro, moles cui tanta malorum  
 Intercluserit iter, quem mille obtexit ab alto  
 Dextra Dei jaculis? præmissi insuavia reddunt  
 Fercula singultus, raucosque ad sidera tollo  
 Mugitus, planctusque; & luctifonos ululatus,  
 Non secus atque altis torrens de montibus ætus  
 Præcipitat, multoq; ruens immurmurat æstu.  
 Quod metui, quod sæpè malum, ceu præscius olim  
 Expavi, tulit una heu! illætabilis hora.  
 Non ego securam jucunda per otia vitam  
 Sopitamve alta dormitans pace peregi:  
 At nihilo prævisa minus præcautaque longè  
 Tempestas sævis miserum caput obruit undis.

## CAP. IIII.

*Eliphazus Iobum arguens fracti animi, flectaque pietatis, iustitiam tuetur iudiciorum  
 Dei, & homines convincit iniustitia.*

**T**Vnc Eliphaz tantis laxantem fræna querelis  
 Sic Iobum aggreditur. Referant si mutua tandem  
 Dicta mei mecum socii, tunè ægriùs illa  
 Iobe feres? tanto quis rerum cardine verbis  
 Temperet? Is tunè es, tot qui palantibus olim  
 Desuetum pietatis iter monstrare solebas,  
 Enervisq; novas vires, nova robora dextris  
 Addere? tunè inopi rerum, iam iamque labanti  
 Accendisti animum dictis, aut poplite curvos  
 Erexti? en versis nunc in contraria fatis,



Deficis, attactuq; iacet mens territa primo.  
 Hic pietatis honos? fidei hæc constantia? nonne  
 Ut fluxis innixa bonis stetit hætenus omnis  
 Spes tua, sic pietas; utq; expectatio, vitæ  
 Sic gestæ integritas? mundi retrò acta revolve  
 Seclâ memor. Vastæ quis prima ab origine terræ  
 Infantum periit? quis fundo excisus ab imo  
 Interiit de gente pia, rectique tenace?  
 At verò incurvis subigunt qui dentibus arva  
 Nequitia, & scelerum committunt noxia sulcis  
 Semina, dignam equidem vidi hos sub tecta referre  
 Sementi messem, & rigida mala gramina lappæ.  
 Quippe indignantis rapido ceu turbine Iovæ  
 Prostrati mox deficiunt, flatuq; Tonantis  
 Naribus emisso pereunt. Quid dira leonis  
 Profuerit vox alta fremens, raucusve leænæ  
 Mugitus? catuli evulsis penitusq; refractis  
 Dentibus occumbunt; prædæ & leo grandior exfors  
 Occidit: impasti per inhospita tesqua catelli  
 Matris ab uberibus depulsi pabula quærunt.  
 Prætereà furtim vox ad me arcana per umbram  
 Missa polo venit, paulumq; his auribus hausi:  
 Tempus erat, quo prima quies mortalibus ægris  
 Incipit, & variis stipata insomnia visis  
 Obiectat, subitò obstupui, & tremor undiq; mentem  
 Perculit attonitam, gelidusq; per ima cucurrit  
 Ossa pavor. Coram ecce incessu Spiritus alto  
 Transiit; arrexitq; omnes horrore capillos,  
 Cœlestis species, quæ vultu & lumine nobis  
 Ignoto penitus, miræ & sub imagine formæ  
 Restitit, ac tenui divina orâcla susurro  
 Auribus insinuans, voces erumpit in istas:

Immortale



Immortale Dei, mortalis homuncio, Numen  
 Iustitiâ æquarit? Fictoris ob acria summi  
 Lumina figmentum polluto à sanguine cretum  
 Labe vacare putes? Sanctis non ille ministris  
 Credit, & Aligerum liquidis apponeret ultra  
 Splendorem turmis, divinæque indolis auctum  
 Immensum. Lutei quid perlevis Incola tecti  
 Se iactet, bibulo cuius fundamina nutant  
 Pulvere, quemque terunt avidi sub marmore vermes:  
 Solis ab exortu, sine vindice, solis ad ipsum  
 Occasum, crebro plagarum tunditur ictu,  
 Et cæca æterno dein claudit lumina somno.  
 Sic vitæ formæq; decus, sic gloria mundi  
 Avolat, atq; homines sophiæ sine laude recedunt.

## CAP: V.

*Eliphazus ea pertexens, qua modo exorsus erat de impiorum exitio, deque admirabili  
 Dei sapientia, iustitia & potentia, Iobum ad fidem, patientiam, & respicientiam  
 hortatur.*

**I** Nunc, & querula patronum voce require,  
 Qui facilem advertens aurem dignetur amico  
 Lamenta assensu. Quem casta in vota vocabis  
 Sanctorum, patulas qui in iustis præbeat aures  
 Suppliciis? Stultum perimit gravis impetus iræ,  
 Invidaque excordem letho demittit Erinnyes.  
 Vidi egomet fatuum arborei qui stirpis ad instar  
 Radicem altam ageret fibris per viscera terræ  
 Diffusis: at vidi itidem mox recta ruinæ  
 Devota, & stupui. Proles quam liquit inertem,  
 Præsidio deserta perit, teriturque severi  
 Iudicis ante oculos, nec adest, qui morte, cadentem  
 Eripiat: mediis acceptam è sentibus hostis



Devorat esurio mēsem; natiq̃ue relictas  
 Horridus haurit opes sitiēti gutture prādo.  
 Non terræ subit è gremio seges āspra laborum,  
 Nec fœcunda malis florescit pulvere sylva.  
 Nalcitur ad morbos & duræ incommoda vitæ  
 Gens hominum infelix, vivis ut multa subinde  
 Emicat è prunis scintilla volatq; per auras:  
 Quòd si eadem, quæ te, duris me exercita fatis  
 Vis premeret, Dominum supplex in vota vocarem,  
 Æthereumq; meas ad Regem sponte referrem  
 Res omnes; qui magna adeò mirandaq; solo  
 Efficit imperiū nutumiracula, quorum  
 Nec mens indagare modum, nec acuta latentes  
 Nosse valet causas, numerumve exponere fando.  
 Ille polo latices, optatæ & flumina lymphæ  
 In terræ mittit gremium, faciemq; per omnem.  
 Huc illuc vario diffundit tramite rivos  
 Ille humilesq; inopesq; è terræ pulvere, in alto  
 Componit folio, tetra & caligine sentes  
 Tollit honoratæ celsa ad fastidia sedis:  
 Ille astutorum, vice versa, adeò omne refutat  
 Consilium; ut medio dextræ conamine cassæ  
 Deficiant. Cautorum artes velut artibus isdem  
 Cautior eludit: populi & mens cœca rebellis  
 In præceps agitur. Manifesto in lumine pravi  
 Impingunt tenebris, & cum sol clarus utraque  
 Distat idem terra, palpant ceu noctis in umbra.  
 Atqui inopem fero ab ense Deus, linguaq; nocentum  
 Pestifera illæsum servat, tutumq; benignus  
 Reddit ab infesti manibusque, armisque Tyranni.  
 Sic tenui spes certa venit, fractisque labore  
Calitūs auxilium datur, at formidine clauso.



Stat rictu impietas, nihil ausa vel hiscere contra  
 Felix! ô verè felix, quem conditor orbis  
 Castigat patriis commissa ob crimina virgis.  
 Quare agè, ne mitis temnas pia verbera Patris:  
 Vnus & idem infert plagam & simul obligat: idem  
 Vulnerat atque manum medicam mox admovet idem.  
 Te quoq; ter mersum ærumnarum terque profundis  
 Fluctibus eripiet, nec clades septima tanger.  
 A letho, si dura fames, ab acinace, belli  
 Si furit horrendi rabies, te, Iobe, redemptum  
 Ille dabit: quin & viroso à verbere, lingua  
 Dum ferit, opprobriis procul, alta in turre latebis:  
 Nec te perniciēs, nec clades ulla nocentum  
 Debita flagitiis quatiet; sed lætus ovanſque  
 Ridebis, cum vāſta dabit deſertaque latē  
 Omnia Mars, aut dira fames; neque monſtra ferarum  
 Horreſces. Tecum ipſa colent ſaxa obvia campis  
 Æternum foedus; conſuetaq; bellua ſylvis  
 Mitescet poſito paulatim corde feroci.  
 Tum florere nova cernes tentoria pace:  
 Tunc iterum deſerta domus penetralia viſes  
 Votorum compos, ſucceſſuque omnia læto  
 Curabis: tum multiplici plantaria fætu,  
 Et prolem per ſæcla tuam, ſobolemque tuorum  
 Auctum iri aſpicias, ceu lætis gramina rivis  
 Luxuriant: tuq; ipſe ævi maturus avito  
 Succedes tumulto, qualis tibi tempore mæſiſ  
 Horrea larga ſubit maturi farris acervus.  
 Hæc nos en longo perveſtigavimus uſu,  
 Atque ita habere, animis ſinceri agnovimus: hæc tu  
 Accipe dicta, bonoq; tuo perſpecta reconde.



## CAP. VI.

*Iobus Eliphazi criminationi respondens, exponit afflictionum suarum gravitatem; cum de amicorum perfidia atque inhumanitate conqueritur; suamque in eo de quo accusabatur, innocentiam aperte assertit.*

**S**ic memorat, vocemque premit, dein talia Iobus:  
 O si indignantis nostros quis lancibus æquis  
 Expendat questusque graves, casusque stupendos,  
 Quis pressum (socii) miserum vidistis amicum!  
 Innumeras etenim, quas torquet pontus, arenas  
 Ærumnarum ingens superaret pondere moles;  
 Hinc gemitu repressa gravi luctantia duco  
 Atque absorpta malis verba, & vox faucibus hæret:  
 Quippe artus depasta imis stant fixa medullis  
 Tela Dei, fugitque atrum mens faucia virus.  
 Ipse Deus movet arma, Deus velut agmine facto  
 Irruit, ancipiti quatiens formidine pectus.  
 Numquid agris onager rudit ad nova gramina? numquid  
 Ad stabulum mugit taurus farragine plenum?  
 Num fatuum nullo sale tinctum arrideat? ovi  
 Aut quis in insipido sapor est albumine? quondam  
 Quæ renuit tetigisse animus, nunc tristia mensæ  
 Ferclâ meæ, ingrati nunc sunt fastidia victus.  
 Quis mihi quod toties petii, quis vota precesq;  
 Annuat optanti? ô utinam Rex ætheris altus  
 Expectata diu donet, dextraq; cadentem  
 Conterat exerta, mortique opponat amata!  
 Intereâ hæc misero superant solatia luctus,  
 Dum morbi infandus sine more exæstuat ardor  
 Visceribus, nec læsa dolenti Numina parcunt;  
 Fida quod ætherii haud suppressi oracula Patris,  
 Iustitiæve æquum filii fideique tenorem.

Sed



Sed mihi quæ tandem vires, quæ meta laborum,  
 Vt durem, speremque ægram producere posse  
 Lactatam tanto fatorum turbine vitam?  
 Saxea mîne animo vis est, chalybæave membris  
 Durities? quid præfidii, aut tutaminis usquam est  
 Omnibus exhausto iam casibus, omnium egeno?  
 Mœsto animi, fractoque malis vir fidus amico  
 Mittit opem, ni iura Dei, cultumque relinquat:  
 Me tamen ipsi etiam iam fratres rebus in arētis  
 Et consanguinei certant spe ludere vana,  
 Ceu torrens de monte ruens, vel qualis aquarum  
 Concitus cluvies decursu diffluit imber.  
 Hyberna occultus glacie nigrescit, & alto  
 Nix super incumbit cumulo, molemque recondit:  
 Verùm ubi Phœbæa torreret lampade mundus  
 Cœperit, extemplò fluidus dissolvitur humor  
 Omnis, & incassum sicco se quærit in alveo:  
 In varios latè consueto a tramite rivos  
 Effluit, in tenuesque facessit protinus auras.  
 Qui Temæ deserta, soli qui resqua Sabæi  
 Sole sub ardenti peragrant, hic dulce levamen  
 Nequicquam sitis expectant, puduitque dolosis  
 Spem posuisse vadis; namq; ad siccata ubi ventum est  
 Flumina, delusi, suffusique ora rubescunt.  
 Officii haud aliter spes & solamina vestri:  
 In nihilum nunc îsse queror, qui talibus ætæ  
 Casibus ah! duro nimium vidistis ocello,  
 Et stupuistis. Habet tantus fera pectora terror:  
 At quæ causa metus, Socii? dixine ego, ferte  
 Dona mihi, oculis expromite munera vestris?  
 Suppetiasve hostem contra populiq; furentis  
 Assultus voto optavi, precibusve petivi?



In melius mutati animos me recta docete,  
 Erroremq; meum, si quis, monstrate, filebo.  
 Maxima sermonis vis est, qui simplice vero  
 Fundatus, rabida temnit convicia lingua.  
 Sed quid vestra iuvant sine pondere iurgia? litem  
 De nuda institui duntaxat voce putatis?  
 An sine vi, sine mente sonos, & inania flabra  
 Creditis immergi tot fluctibus esse querelas?  
 In me ceu caris, gens sæva, parentibus orbum  
 Irruitis, durique epulas agitis iniquas  
 De socio. lam tandem oculis me quaeso benignis  
 Aspicite. An vobis coram, qui me intus & extra  
 Nostis, falsa loquar? versas ad seria mentes  
 Flectite. Iustitiæ mihi adhuc, mea gloria constat:  
 Num latitat fraus ore vafro? num recta palatum  
 A pravis sano nescit discernere sensu?

## CAP. VII.

*Iobus converso ad Deum sermone, & redintegratis de calamitate sua querimoniis, ad  
 se tandem redit, veniamque, & miseria sua levationem aliquam efflagitat.*

**S**Tat sua cuique dies, & vitæ his certa sub oris  
 Meta datur miseris mortalibus, utque diurnâ  
 Conductis mercede viris, statura figitur hora.  
 Vernula ceu longæ pertæsus lucis ad umbram  
 Anxiùs adspirat noctis, requiemque laborum,  
 Qualiter aut pactis, qui præstat munia nummis  
 Finem operis spe lenta, atque ore expectat anhelò,  
 Sic quasi sorte datum tardis sub mensibus ævum  
 Exigo perpetuis curarum fluctibus ætus:  
 Ipsaq; nox requiem concedere sueta, labores  
 Fert mihi continuos, ac morbi duplicat æstum.  
 Luce obitâ, ingrato si fors compono cubili

Languentes



Languentes artus, mox inquit, quando resurgam?  
 Quando erit, ut roseis tenebras aurora quadrigis  
 Vecta fuget? tantis mihi mens vel solis ad ortum  
 Excruciata malis, cura iactatur inani.  
 Vermibus induitur ceu veste, & Pulveris atri  
 Ramentis tota horrescit caro, ruptaque foedis  
 Solvitur ulceribus cutis, & liquefacta fatiscit.  
 Textoris radio, celeri qui stamina cursu  
 Percurrit, levior vitae gloria fluxæ  
 Avolat, & nullis reparanda absumitur annis.  
 Quod vitæ hîc agitur, par, ô Pater, esse memento  
 Ventorum flabris, rapido quæ turbine perflant  
 Terrasque, tractusque maris, coelique meatus  
 Aëreos. Extincti oculos non pristina pascunt  
 Gaudia, nec reducem posthac mortalia cernunt  
 Lumina; quin tuus ipse oculus, si a morte requirat,  
 Non tamen inveniet. Ceu deficit æthere nubes,  
 Atque leues disiecta procul se purgat in auras:  
 Sic quem dura semel cæco mors condidit antro,  
 Non ille ætherias evadet rursus ad oras,  
 Non sedes, non tecta redux deserta reviset,  
 Nec locus ipse suum noscet post fata colonum.  
 Ergo ego nec vocum parcus, nec fræna labellis  
 Iniectus, plenis, animi quæ dictat amaror,  
 Effundo buccis, meritisque assurgo querelis.  
 Numquid ego indomitum pelagus non molibus ullis  
 Arcendum, aut balæna, salis mirabile monstrum,  
 Ut circum posito ceu vallo ac mænibus altis,  
 Imperio vinclisque premas me & carcere frænes?  
 Si dixi accendet cum serus lumina vesper,  
 Solamen mihi sponda dedit, luctumque cubile  
 Leniet, horrificis celeratim insomnia visis



Objicis, & vigili conturbas pectora spectris.  
 Mens tantis cruciata malis, tot saucia curis,  
 Informis lethi nodo mutaverit ægram  
 Vltrò animam, fractisque adeò mortem ossibus ipsam  
 Prætulit. Cœli ah tædet convexa tueri  
 Tot pressum ærumnis, neque enim per secula vivam.  
 Parce, ô parce potens hominum rerumq; Repertor,  
 Nec misero usuram vitæ mihi longius, oro,  
 Indulge. Quid namque diebus vaniùs hisce  
 Qui mihi adhuc superant? quidve est mortalis, honore  
 Quem tanto afficias, cui mentem intendere creber  
 Digneris? Patriâ quem deniq; solis ab ortu  
 Quotidiè curâ invisas, examine justo  
 Explorans animi latebras, cæcosque recessus?  
 Quando aliorum à me deflectes lumina? quando  
 Absistes, mihi dum liceat glutire salivam?  
 Peccavi, fateor, quid agam? quo iniusta piabo  
 Ausa modo, ô Custos hominum? cur me tibi signum  
 Fixisti, infesta quo mittas spicula dextra,  
 Ut fierem gravis ipse mihi? cur pristina vitæ  
 Non aboles errata meæ, meritaq; remittis  
 Peccati poenas? mox namq; in pulvere pulvis  
 Decumbam, neq; me invenies, si forte requiras.

## CAP. VIII.

*Bildadus, Iobi sermonibus acerbissimè reprehensus, iustitiam Dei asserit, Iobumque tam-  
 minis, tum promissionibus ad resipiscentiam revocat, proposita umbratili impiorum,  
 certa vero et stabili piorum felicitate.*

**T**Alia perstabat memorans; cui talia contra;  
 Bildadus, quo tandem hæc usq; effaberis amens;  
 Quidve dolens rabido ore fremis, ceu murmura  
 Ponto indignantis? fas & sacra iuris. (Cauri  
 Subvertes.



Subvertet vis magna Dei? pessumne tonantis  
 Dextra dabit, iustis quod sanxit legibus, æquum?  
 Non ita; si nuper quidquam committere gnati  
 Hunc contra haud veriti, iustis ob crimina poenis  
 Addixit miseros. Sin tu autem impensius omni  
 Mane Deum supplex quæris, per vota precatus,  
 Si purus, scelerisq; expers, si es pectore rectus,  
 Illicet ille tui studio evigilabit, et ædes  
 Quas sine fraude coles, florenti pace beabit:  
 Immo perexiguum fuerit sors prima futuræ  
 Collata, immenso tibi quæ diviniûs auctu  
 Excrescet: generis tanta est opulentiæ sancti.  
 Consule seclorum super his monumenta priorum;  
 Vestigaq; animo seniorum facta parentum;  
 Hesterni nos namq; sumus, nec patribus olim  
 Gestorum gnari. Superis quos degimus oris  
 Sunt velut umbra dies, rapidis quæ provolat alis.  
 Illi te erudiant, illi tibi vera loquentur,  
 Certaq; deproment solerti oracula corde.  
 An sine limosa se uligine iuncus in altum  
 Subiicit? an sine aquis adoleverit ulxra palustris?  
 Dum viret, ecce manu nondum decerpta, repente  
 Vere novo ante alias arefcit funditus herbas:  
 Impia non aliter marcescit semita turbæ  
 Oblitæ legumq; Dei, cultusq; potentis.  
 Expectata hominis qui fraudes arte colorat,  
 Spes perit omnis, et eventu frustratur inani.  
 Ille velut tenui, quam finxit aranea tigno  
 Sublimis, fidit telæ, fragiliq; recurvus  
 Stat domui incumbens: domus inclinata ruinam  
 Cum sonitu trahit, incassum prensante labantes  
 Iuncturas Domino. Ille arvis succosus ayitis



Apricisq; viret, riguis ceu confita ripis  
 Arbos, quæ teneris supra hortum brachia ramis  
 Diffundens, altis radicum ad flumina fibras  
 Implicat, et vivis extructa palatia saxis  
 Desuper umbrifero sublimis vertice spectat :  
 At ferro simul institerint crebraq; bipenni.  
 Erudere agricolæ, radicitus omnis ab alto  
 Vulsa solo, atq; evicta frequenti verbere præceps  
 Corruit : excilam non ipsa agnoverit ultrâ  
 Terra parens, solitæ superat nec trama figuræ.  
 En quò lætitia, et simulatæ gloria gentis  
 Omnis abit; melior peregrino è stirpe refurget,  
 Desertoq; ingens florescet pulvere silva:  
 Quippe nec immunem sceleris fastidit Olympi  
 Regnator, neq; labe impurum et sordibus atrum  
 Sustentat dextra. Quin te si iuris & æqui  
 Ritè tenax fueris, iam iam eriget, Ille tuumq;  
 Os risu implebit, lætisq; resolvit ovanti  
 Labra modis: contra osores, ceu tegmine, velat  
 Dedecore, evertitq; hominum tentoria nequam.

## CAP. IX.

*Iobus hic Dei justitiam, sapientiam, atque potentiam pleno ore prædicat, & quidem magnificentiùs quam fecerat modo Bildadus. Inde verò ad Theſin rediens, adversariorum refutat sententiam, de repentino malorum exitio, deque felici bonorum statu: tandemque sua conscientia testimonio fretus ad Deum adversus ipsos provocat.*

**V**ix ea fatus erat, cæpit cùm talia Iobus,  
 Vera equidem novi & fateor quæ edisseris, esse.  
 Mortali quis namq; hominum de sanguine, magno  
 Collatus cum rege poli, cum Iudice mundi  
 Iustus erit? vanis si quis temerarius ausis  
Cernere iudicio, litemque intendere contra

Fidat.



Fidat, is obiectis non unum e mille refellat.  
 Quippe Deus sapiensque animo est & viribus unus.  
 Immenfis. Quisquamne illum mortalibus armis.  
 Impunè invadat? scelus hoc benè cesserit ulli?  
 Ille vel eductos ad coeli sidera montes  
 Eruit incautis (res visu mira) colonis,  
 Infensusque malis fundo subvertit ab imo;  
 Ille manu validâ terræ fundamina vastæ  
 Concutit, acq; altis reſeratum è ſedibus orbem  
 Convellit: motu attonitæ tremuere columnæ.  
 Illius imperio currum roſeosq; iugales  
 Siftit, & atrato ſol vultum obnubit amiçtû.  
 Ille poli nitidos tenebris obſignat ocellos,  
 Solus & ætherij pandit tentoria mundi,  
 Solus & æquorei calcât vada ſalfa profundî.  
 Arcturum ille ſonantem, atrumq; Oriona nimbis  
 Condidit; ac Pliadas, gratiſſima puppibus aſtra,  
 Quibque ſub Auſtrinis latitant penetralibus ignes:  
 Deniq; magna facit rerum miracula, nulli  
 Indaganda hominum, numero carentia certo.  
 Nam neq; quàm multæ ſpecies, neq; nomina quæſint:  
 Eſt numerus. Feret ecce Deus veſtigia coràm,  
 Nec tamen ipſum oculis cernam mortalibus. Omnia  
 Humani intuitus aciem, ſi tranſit acutam  
 Quantumvis fallit. Si in prædam abrepta capeſſit,  
 Reddere quis cogat, curvè, aiât, talia faxis?  
 Nemo adeo eſt vel mente ſagax, vel robore præſtans,  
 Decretam queat ut magni iram auertere l o v a s.  
 Aspice ut ille hominum vano turgentia ſaſtu  
 Gorda domat ſævo imperio, elatique ſuperbos  
 Patronos ultrice manu detrudit ad orcum;  
 Ergo quid illi amens reſponſem? aut irrita iactem



In Dominum frustra selectis iurgia verbis ?  
 Non ego, sim quamvis iustus, contraria dictis !  
 Dicta, Dei referam ; sed flexo poplite supplex  
 Exposcam vitiis offenso a ludice pacem.  
 Vix tamen, ut dederit facilem clamoribus aurem.  
 Ille meis, credam vota exaudisse vocatum.  
 Immani toties me pulsum turbine vindex  
 Conterit, impune & decumanis vulnera plagis  
 Ingeminans, animæ revocandis flatibus horam  
 Denegat, ærumnisque, cibo velut, implet amaris  
 Infelix pectus, repetito ac verberare sævit.  
 Si vires specto, validæ si robora dextræ,  
 Fortior ecquis eo ? si ius, vadimonia quis mi  
 Constituat, causamve iuvet ? si me assero iustum,  
 Arguor ore nocens, si culpæ & fraudis inanem,  
 Integrumque animi, mea me mox lingua malignum  
 Prodet iners, nec ritè animam norim ipse, peractæ  
 Pænitet ah vitæ ! verum magis omnibus unum  
 Angit, agitque ægram mentem ad lamenta ; subinde  
 Quod fontem, infontemque simul terrestribus oris  
 Absumit vis sæva Dei discrimine nullo ;  
 Namque reos scelerum nec opina ubi morte flagellat  
 Mortales, unà infontum fera vulnera ridet.  
 Aspice, terrarum concedit sceptræ tyranno,  
 Susque habitis qui deque bonorum legibus, ora  
 Iudicis obvelat, fasque omne & iura refigit ;  
 Hæc nisi cuncta unus magni gerat Arbiter orbis,  
 Quisnam igitur ? Sed, enim quam sint vice, gaudia, versâ  
 Fluxa pii generis, quam lætæ evanida sortis  
 Prosperitas, nostra exemplo sit vita ; tot antè  
 Auçta bonis, tot iamque malorum afflicta procellis.  
 Veloci, hæc inter, citiùs cursore, dierum



Momenta aufugiunt non vitæ experta secundæ  
 Fortunam, & celeri spumias salis ære ruentem  
 Prævertunt puppim, prævertuntque acré volentem  
 In prædas aquilam. Querulis si dixero, parcam  
 Vocibus, ærumnæ oblitus, positisque repente  
 Irarum stimulis, vires, ac prisca resumam  
 Gaudia, continuò curæque æstusque dolorum  
 Ingenti pavidam quassant formidine mentem.  
 Quî namque à tantis purgatum sordibus iri  
 Me sperem, Rex magne poli, quando ante tribunal  
 Ipse tuum fraudisque reus, scelerisque nefandi  
 Arcessor? frustra est equidem quodcunque laboris  
 Impendo toties in causâ & iure tuendo.  
 Abluerit nivis unda meæ contagia pestis,  
 Smegmaque mundarit palmas licet, illicò merges  
 Cœnosam caput in foveam. Me attingere vestes  
 Ipsæ horrent limo fœdatum membra tenaci:  
 Non Ille humanæ cretus de sanguine gentis,  
 Qualis ego, ut tanto responsam mutua Regi,  
 Experiarque foro, res & decidere sperem:  
 Nemo etiam medius nos inter, nemo sequester  
 Qui litem dirimat, iustoque examine penset:  
 Sed tamen amoveat modo virgam & verbera dura,  
 Nec maiestatis venerandæ exterreat horror:  
 Tum pulsa intrepidus fabor formidine, namque  
 Obiectæ toties mens haud sibi conscia labis!

## CAP: X.

*Renonat hic Iobus querimoniam suam; qua cum Deo expostulat de afflictionum suarum magnitudine, petitque ut vel tantillum sibi liceat respirare.*

**T**ædia me dudum tot tempestatibus actæ  
 Ceperunt vitæ, Arbitrio questusque, doloresque



Ire suo planctusque sinam, quò cordis amaror,  
 Quo morbi instigat vis indefessa loquentem.  
 Alloquar ipse Deum, tanta qui mole malorum  
 Sævit in expletum. Quid me, Pater optime, damnes  
 Ut fontem memora, & quo tandem crimine læsus,  
 Quidve dolens in eas tantæ certamina litis?  
 Tot iuvat immeritum, caput obicere periculis  
 Alme sator? dextræne tuæ, sophiæque stupendum  
 Aversaris opus? malè sanæ an prava catervæ  
 Consilia exemplo sacro illustrare voluptas?  
 Anne etiam tibi more hominum sunt carnea fraudi  
 Lumina, quaque acie cernit mortalis, eadem  
 Cernis & ipse? brevem tun' vitam in certa dierum  
 Distinctam annorumque agitas momenta, caduci  
 Nos qualem? ut sine fine meum tormenta per omnia  
 In scelus inquiras, summa & vi ferre sub auras,  
 Si qua te go satagas? scis me dispendia fraudum  
 Non petiisse, pedes non recto à tramite legum  
 Flexisse: Et quisque intereà est, qui vindicis instar  
 Prestò adsit, crebroque tuæ me verberare dextræ  
 Eripiat? tantâne, orbis Rex maxime, servum  
 Arte laboratum formasti, & pollice circum  
 Finxti adeò artificii, ut quæ vivum dextra creavit,  
 Nunc eadem absorptum perimat? memori, oro, revolve  
 Mente quòd argillam veluti me è pulvere vili  
 Fecisti, moxque in cumulum non multa moratus  
 Pulverem, tristi defunctum morte reduces.  
 Nonne velut fusum tua me lac ventre liquavit  
 Materno manus, & ceu pressa coagula casei  
 Densavit? non pelle olim, non carne tenellum  
 Vestiit, ac nervis compactosque ossibus artus  
 Firmavit? mihi tu vitam, vitæque beatæ



**Commoda largus opum indulsti, patriâq; revisens**  
**Conservasti animam tot per discrimina, curâ.**  
**At nihilo tamen ista minus, Deus alme, reposta**  
**Corde diu latuere tuo, sine Numine namq;**  
**Quæ tolero haud illata scio, si forsitan in te**  
**Peccavi, servasti oculo id quæsit acuto,**  
**Nec mea lustrali purgasti crimina lymphâ.**  
**Si vitam scelere obstrictam, si fraudidus egi.**  
**Væh mihi ! si iustam contra, labisq; carentem,**  
**Non tamen idcirco caput altiùs effero, tantis**  
**Opprobriis satur. ipse vide, pectus ipse ruentes**  
**Aspice res, casusque meos. cuncta esse liquebit**  
**Vt refero. Impasti tu quippe immane Leonis**  
**More furens arcta me circum indagine clausum**  
**Venaris, duplicansque modis mea vulnera miris**  
**Indignantem auges renouatis testibus iram.**  
**Vnius in miseri exitium. tormenta dolorum**  
**Alternis sese ingeminant, ac sæva malorum**  
**Obsidit legio, telisque horrentibus urget.**  
**Heu ! cur nam ex utero passurum talia matris**  
**Eduxti ? ô utinam nulli visendus, ibidem**  
**Expirassem ! utinam ad tumulum mox inde fuisset**  
**Instar abortivi elatus ! restantia vitæ**  
**Intervalla brevis spatium cum terminet horæ,**  
**Quin cessas, paulumque tuæ, Rex, desinis iræ ?**  
**Dum paullum recreer, viresque effusa resumant**  
**Membra, priusquam adeam cœca irremeabilis antri**  
**Limina, foeta situ, tenebrosi & imagine lethi**  
**Horrida, quæ nox, quæ nubes, quæ noctis & umbra**  
**Vndique Cimmeria obvolvitur caligine, & ordo**  
**Nullus ubi, lux nulla, ubi sunt, mera nubila, lychni.**



## CAP. XI.

*Sophar, damnatis Iobi sermonibus, potentissimam atque impervestigabilem Dei sapientiam celebrat, Iobumque propositis amplissimis promissionibus, hortatur, ut supplex penitensque ad Deum confugiat, qui bonos prosperat, malos verò exterminat.*

**T**Alibus incensus Sophar Namatita querelis,  
 Flammato has contrá prorumpit pectore voces:  
 Ergone tanta tibi, ut solitum, sine fine volabunt  
 Verba, nec occurret quisquam? num garrulus ore  
 lustus erit, causamque loquax evincet? ad ista  
 Quis sileat commenta? tuos te impunè sodales  
 Ludificantem adeò suffundet nemo rubore?  
 Ausus es alloquiis nimium turgentibus ipsum  
 Sic mundi Dominum aggredier. Purissima vitæ  
 Est series, coramque tuis ego mundus ocellis.  
 At verò ô utinam stellato è fornice vocem  
 Edat, & eloquio recludat labra tonanti  
 Te contra! o sophiæ reseret sacraria divæ,  
 Quò tandem acceptis graviores crimina plagas  
 Commeruisse tua agnoscas, multumque remitti  
 De poena admissi sceleris. Cæcolne recessus  
 Numinis æterni penetres, aut alta supremi  
 Vestiges oculo mortali arcana Dynastæ?  
 Altior ille altis cælo labentibus astris,  
 Quid facias? imo longeque profundior orco est,  
 Quî capias animo? quî vili in pulvere repens  
 Illo pervenias? tanti sapientia Regis  
 Terrarum extremis profert se longiùs oris,  
 Latius & pelagi terras lambentibus undis.  
 Si rerum invertat faciem, cursumque suëtum  
 Naturæ, si cuncta locum concludat in unum  
 Quæ distincta prius; si dissita colligit idem,

Quis



Quis quæso impediet, quis contra nitier ausit?  
 En cœcas hominum mentes & inania corda  
 Qui novit penitens, curæque inania gentis  
 Ausa videt, non ille admissa piacula iustis  
 Lancibus expendet, plectetque, ut mentis egenus  
 Et vœcors sapere incipiat, moresque feroces  
 Ponat homo, agresti licet ortu ut pullus onagri.  
 Verum agè, sume animos etiamnum, & pectore ab imo  
 Præteritæ commissa dolens vitæ, ocyus ambas  
 Suppliciter cum voce manus ad sidera tende;  
 Dein peperit quæcunque malis dextra artibus, ultrò  
 Restituas, residere domi non passus iniquo  
 Parta dolo. Tum lætum erectus ad æthera vultum  
 Incedes, expersque situ liberque pavore.  
 Tum mala tot, tantosque obliviscere labores  
 Exhaustos: Lapsique velut de montibus unda  
 Torrentis sicco exarescit protinus alveo,  
 Sic veterum memor effigies sensusque malorum  
 Illicò vanescet, seclumque orietur ovanti  
 Splendidius Phœbo, medium cum traicit axem  
 Decreta ætherio ponens discrimina mundo.  
 Ipse autem Eois surgenti è montibus astro  
 Par eris, atque mali securum certa fovebit  
 Spes animum, figesque altis tentoria fessis  
 Munita, & nulla trepidus formidine, molli  
 In lecto placidum duces per membra soporem.  
 Certatim assurgent populi tibi, & ora reflexo  
 Poplite submissi poscent. Contrà, impia sontum  
 Lumina deficient, nec erit super ulla pericli  
 Iam fuga: dumque volunt sperantque ingentia, lethum  
 Cuncta superveniens frustratur vota repente.



## CAP. XII.

*Jobus, reprehensa amicorum arrogantia & factu, Axioma ipsorum refellit, docens & suo ipsius exemplo & communi experientia, bonis plerumque male esse in hac vita, & malis bene; neque id tamen adversari sapientissima Dei providentia, de qua hic longè melius discessit quam illi fecerant.*

**D**ixerat. Vixit quem contra talibus Heros  
 Ingreditur. Populus vos soli scilicet estis,  
 Scilicet & sophiæ vobiscum fama peribit.  
 Verùm & cor nobis rerumque scientia longo  
 Explorata usu, nec mentis acumine vobis  
 Sum minor. In crasso quis quamlibet aëre natus  
 Non eadem capiat, pleno non prædicet ore?  
 Sed tamen (infandum!) vobis miser usque ego & usque  
 Ludor, ut infidus quem afflictum ridet amicus,  
 Audit at in dubiis clamantem rebus Olympi  
 Regnator: Vir ludibrio est sincerus & expers  
 Flagitii, colit una Dei qui Numina mente  
 Innocua: quin & gradiens per lubrica, iamque  
 Lapsurus, tremulis dum fert vestigia plantis  
 Temnitur infelix securâ à gente nocentum  
 Ceu titio ambitus, defectaque lumine tæda.  
 Hæc inter placidâ sedenim tentoria pace  
 Prædonum florent; quique iram immanibus ausis  
 Irritant Domini, iucunda per otia vitam  
 Felices peragunt, his cœli copia pleno  
 Inque manus cornu quæ poscunt omnia fundit.  
 Consule iumenta, & cœlo genus omne volantum,  
 Telluremque roga, & pelago genus omne natantum,  
 Cumque his humano sermones confere ritu,  
 Cuncta hæc te erudiant, te quæque ita habere docebunt.  
 Quis nisi mentis inops nescit, dextrâ unius istud

Arbitrioque



Arbitrioque Dei fieri? quis nescit ubivis  
 Terrarum ætheria quod vitæ vescitur aura,  
 Huius ab imperio pendere, & cum penes esse  
 Non alium, humani generis spirabile lumen?  
 Nonne auris purgata probat, quæ gratia verbis,  
 Quod vitium insit, uti vitiorum immune palatum  
 Quolibet explorat gustu tentante sapores?  
 Magna quidem est senibus rerum sapientia, magna  
 Longinquo annorum spatio prudentia constat.  
 At penes illum unum sophiæ stat vera perennis  
 Gloria, et immensum robur, rebusque gerendis  
 Consilium solers, gnava & vis enthea mentis.  
 Ille quis instauret, Domini quæ dextra furentis  
 Destruxit? quis claustra domus, quis carceris arcti  
 Quas clausit, referare fores & vincula fidat?  
 Si fontes cohibet, vel aquas in nubibus altis  
 Suspensas tenet, extemplò frugesque, solique  
 Arescit facies. Si rursus mittat aquai  
 Coelitus immensum glomeratis imbribus agmen,  
 Mox pluviis sata læta undis hominumque labores  
 Diluviat, fundoque solum subvertit ab imo.  
 Vis ingens illi, & non enarrabile textum est  
 Cœlestis clypei. Nutu illius omnia passim  
 Existunt. Errans, erroris & author ab uno  
 Ætherii pendet divino Numine Regis.  
 Ille animos, mentemque orbis sapientibus omnem  
 Eripit. Ille duces populi, qui regia vastæ  
 Sceptra regunt terræ, celsorum & corda Tyrannum  
 Infatuat, quin mundi etiam Rectoribus aufert  
 Imperium, vinclo, quo plebs constructa, soluto,  
 Funibus & lumbos duro sub carcere vincit.  
 Ille suis Proceres spoliatos viribus, hosti



Deserit in prædam, populique immensa potentis  
 Robora convellit. Facunda ille ora disertis  
 Obstruit, ac sanæ longævis munera mentis  
 Iudiciumque adimit; quoties generosa pudendis  
 Corda virum aspergit maculis, Zonamque Potentum  
 Solvit honorificam? tenebris demersa revelat,  
 Lethalesque umbras in luminis exerit auras.  
 Ille modò exauget populos, modò destruit auctos:  
 Ille modò in varias terrarum disiecit oras,  
 Disiectosque iterum in sedem modò contrahit unam:  
 Quinetiam excelsis Idem primoribus Orbis  
 Immani succensus ab ira expectorat omne  
 Consilium, atque vagos deserta per avia, tritum  
 Nulla ubi callem hominum monstrant vestigia, sævus  
 Dispellit: mediis palpant sine luce tenebris,  
 Et passu huc illuc miseri titubante feruntur,  
 Languida ceu nimio percussi tempora Baccho.

## CAP. XIII.

*Iobus, taxata iterum Amicorum arrogantia, & inhumanitate, refutatisque eorum criminationibus, negat se de sua apud Deum salute unquam desperasse: deinde depressus Dei terribilem potentiam maiestatemque, ipsumque statuit Iudicem totius Controversie; ac tandem ad sua infirmitatis & miserie exaggerationem redit.*

**H**Æc oculis ego cuncta meis, hæc auribus hausi  
 Percepique animo. Quæ vos novistis, & ipse  
 Novi equidem, haud ullo vestrum minor His sed o-  
 Fert animus cœli Dominum terræque potentem (missis  
 Affari, & notas audire ac reddere voces.  
 Vos quippe artifici mendacia fingere lingua  
 (Triste Sodalitium) docti, circumque latenti  
 Fraude venire pios. Medici vos estis ad unum  
 Infidi, ignarique omnes. Utinam ora libellis

Iam



Iam tandem iniecto quasi freno clausa prematis!  
 Id sophiæ magnum vobis foret omnibus instar.  
 Multa tegit sapiens prudenter, multa tacendo.  
 Quare agedum haud duræ pandantur questibus aures,  
 Atque animis faciles quæ dicam advertite vestris.  
 Vosne dolis effata Dei, vosne alta Tonantis  
 Iura strophis tanta confictis arte tueri  
 Fas erit? ane novis tam iusti ludicis ergo  
 Criminibus terrere virum, cui crimina cordi  
 Nulla, decet? vestrone egeat Rex maximus orbis  
 Auxilio, causæque impar habeatur agenda?  
 Has apagè infandas tutandi Numinis artes.  
 Si vos ille dolis velum prætereignaris  
 Scrutari aggreditur, si peruestigat acuto  
 Corda oculo, an bene vertat? an ipsum illudere (Inepti)  
 Luditur ut mortalis homo, sperastis lōvam?  
 Scilicet immanis vos rite redarguat ille  
 Flagitii, si quem falso, sub iuris amictu,  
 (Divinæ ut fiat præstandæ a crimine salvæ  
 Iustitiæ studio) sceleris damnare paratis  
 Immeritum. non tanti animos & pectora turbat  
 Maiestas Regis? non formidabile Numen,  
 Cum tonat, abruptisq; ingens micat ignibus orbis,  
 Terrorem incutiat? Fastu quodcunque superbo  
 Iactatis, cinis est, putriq; hæc condita limo.  
 Membra lutum referunt. Nunc labris parcite, & ipsa  
 Quo res cunq; cadat, dudum meditata profabor.  
 Cur rabido impatiens divellam dente lacertos?  
 Quidve animæ optandam furiata mente salutem  
 Projiciam? En, perimat me quamvis, omnis in illo.  
 Spes erit. Ore tamen gressus verace tuebor  
 Usque meos summo vel coram Iudice. dextram.



Ille salutiferam mihi, sat scio, ab æthere pōrget  
 Ne perdar; iustæ tanta est fiducia causæ.  
 Iuris at obtentu qui fraudem & noxia vitæ  
 Facta tegit, non ille Dei præsentia viset  
 Lumina. Nunc igitur mea dicta audite faventes,  
 Quæque fero placidas, quæso, demittite in aures,  
 In ius ire paro fidenti pectore, litem  
 Digero, meque foro iustum fore quolibet ausim  
 Credere. Quis vestrum, ô socii, iam litiget unâ  
 Nobiscum? me namque dolor non pauca volentem  
 Dicere conficeret, si causam lingua silendo  
 Prodiderit. Verum interea duo o Arbiter orbis  
 Deprecor; inde tuum sistar citus ante tribunal  
 Impavidusq; : manus paulum suspende potentis  
 Verbera, queis adeò lacerantur membra, nec ultra  
 Me tuus horrendo consternat turbine terror.  
 Deinde voca, & responsa dabo, aut loquar ipse, loquentem  
 Tu post excipies. Quot sint, agé, crimina vitæ  
 Exactæ, lapsusque doce delictaque, leges  
 Queis violasse tuas iure arguar? heu! quid amicum  
 Subtrahis aspectum, vultusque aversa recondis  
 Lumina? quid me hostem veluti tanto impete sævus  
 Persequeris? foliumne levi quod flamine raptat  
 Aura teres? æstusve tuæ sic sæviet iræ  
 In stipulam, quæ spontè ad flammam admota, repentè  
 Vritur? en calamo me contra vindice mille  
 Scribis amatores, commissorumque iuventæ  
 Fraudis ut hæredem pœnas expendere cogis.  
 Quippe pedes arcta constrictum compede servas,  
 Atque iter omne notans tibi nequâ elabar, ad usque  
 Plantarum articulos iræ vestigia figis.  
 At tuus interea stipulæ foliive caduci



Par famulus senio exeditur putredinis instar,  
Aut triti, quem blatta vorax consumit, amictus.

## CAP. XIII.

*Iobus hic totus est in deploranda humana vita brevitate, et miseria, modo in genere, modo habita peculiari miserrimi sui status ratione, de quo modestè cum Deo exponitur, ut ad commiserationem ipsum flectat.*

**S**anguine foemineo cretum brevis excipit ævi  
Terminus angusti, & curis mordacibus angunt  
Mille hominem æumnæ, gravior quas ira subinde  
Infligit tua. Vitali vix Luce potitus  
Mortalis, subito ceu flos succiditur, umbra  
Ceu levis avolat haud stabilem sortitus honorem:  
Tantæne ergo miser curæ est tibi homuncio, divi  
Hunc super ut sacros intendas luminis orbes  
Magne sator rerum, solerti & singula censor  
Acta viri observes oculo, mecumq; severus  
Iudicio certes? quis mundum è semine præstet  
Immundo? vitii nemo est & criminis experts.  
Quum sua cuique dies, numerataque tempora mensium  
Annorumque sient angustis clausa caducæ  
Limitibus vitæ, quos vltra haud tendere fas sit:  
Parce ferire novis famulum, Pater optime, flagris,  
Parce, precor, captum donec perfecerit ævi  
Curriculum, ut pacto qui munia fungitur ære.  
Fætibus arboreis superat vel stirpe recisâ ..  
Spes vitæ: inde novus longo haud post tempore surgit  
Surculus, et læto florescit caule propago.  
Arida consenuit quamvis sub pulvere radix,  
Pulvereq; extinctus iaceat tibi truncus, odore  
Fœcundo irrignæ mox suavè regerminat vndæ,  
Atque novâ ceu planta recens revirescere fronde



Cernitur adnatis protendens brachia gemmis.  
 Ast vitâ simul excessit, simul atra subivit  
 Regna homo, in æternam vitali lumine noctem  
 Cassus, ubi est? ubinam defunctus morte locorum  
 Invenias? ut aquis solito abscedentibus alveo  
 Siccatum arescit flumen; sic cuius in auras  
 Lux abiit, gelidoque iacet sub marmore corpus,  
 Non ille has tumulo surget redivivus in oras,  
 Cæca nec excutient lethæum lumina somnum,  
 Aurea dum tacito volvuntur sidera mundo.  
 O utinam procul ore tuo sub mole sepulchri  
 Depressus, tantæ donec deferbeat iræ  
 Flamma tuæ, latitem, præfixaque tempora ponas  
 Nos quibus invisas memor, & bona gaudia reddas?  
 Num quid homo infernis remeabit vivus ab oris,  
 Quem semel atra dies tulit, immerfitque tenebris?  
 Militiæne omnes vana expectabo per annos  
 Spe requiem, milero dum tu mihi summa ruentis  
 Fila legas vitæ, meq; hinc magè id omnibus unum  
 Optantem votis, ad te, & tua regna reducas  
 Mitior, atq; manus opus immortale requiras?  
 Tu gressus mihi quosq; notas et singula vindex.  
 Gesta, nec ullius commissi debita differs.  
 Supplicia. in oculis velut obsignata recondis  
 Crimina, et iratus sceleri scelus affuis altum  
 In cumulum. vt rapido quassatus flumine pessum.  
 Mons datur, atq; imis rupes è sedibus ingens  
 Mota ruit; lapides ut duros sæpe cadendo  
 Vnda cavat, pulvisq; agri congestus aquarum  
 Eluvie plantas & terræ germina sternit;  
 Irrita sic hominum tenues vanescere in auras  
 Spes & vota facis longum expectata, manusque



Vis immensa tuæ mortalibus usque misellis  
 Prævalet, atq; modis mutatos lumina miris  
 Ablegat. Gnatos magnarum an dives in auret  
 Rivus opum, contræve gravem patiantur egeni  
 Paupertatem, ignominiamque, ea cura caducum  
 Non tangit patrem: tantum his dum vivit in oris,  
 Mille ægros cruciant artus tormenta, dolentem  
 Mille animum vexant curæ, molesque malorum.

## CAP. XV.

*Eliphaz in, asperrima increpatione premissa, Iobum tum insipientia, tum protervia in Deum arcescit, non aliter interpretans quæ ille pro sui defensione protulerat, quàm si manifestum Dei contemptum præ se ferret, et inani tunc suam opinionem animi mulceret. Deinde verò iustissima severitatis divine iudicia in sceleratos quosque graphicè describit, et in Iobum non obscure detorquet.*

**V**ix ea fatum Eliphaz irato pectore Iobum  
 Aggreditur, duris insultans vocibus ægro.  
 Ergone vir sapiens euri ludibria verbis  
 Iactabit rabidis, ventoso et folle receptas  
 Reddet iners auras? fas quenquam iurgia dictis  
 Irrita vaniloquis in vulgus spargere, & aures  
 Futilibus sine more pias obtundere nugis?  
 Tu sacrum evertis væ sano corde timorem  
 Numinis ætherii, tu summo debita ferre  
 Vota Deo renuis, proprio et tua proditur ore  
 Improbilas. Tua nam te lingua, haud nostra, miselle,  
 Dum turbæ pellacis amas linguasque, dolosque,  
 Damnat, et ipsa reum peragunt tua lobe, labella.  
 Tunc hominum princeps primæva ob origine mundi  
 Hausisti ætherias vitæ auras? tunc creatus  
 Ante ipsos colles, ductosq; ad sidera montes?  
 Tene unum de gente hominum penetralia cœli



Intrare indigetem, divinæque abdita mentis  
 Nosce arcana deus voluit? reliquisque negata  
 Omnibus, in te uno fixit sapientia sedem?  
 Immo ecquid scis ipse, tuos quod iure sodales  
 Effugisse feras? censent tibi pervia soli,  
 Quæ nos prætereant? en, en tibi canus, & ævo  
 Heic provectus adest, qui natu grandior ipso  
 Patre tuo. Tun' blanda Dei solamina temnis  
 Quæ tulimus? maiusve premis quid pectore clausum,  
 Quo tibi mens adeò rapitur transversa? superbi  
 Quid sic collimant oculi? quid turgidus effers  
 Indignantem animum, torvoq; furentia vultu  
 Lumina, supremum cœli terræq; laceffens  
 Regnatorem âspris impuri vocibus oris?  
 Mortali quî stirpe satus sit purus, & expers  
 Flagitii? quis fæmineo de sanguine veram  
 Iustitiæ laudem meritò sibi vendicet? ipsis  
 Cœlicolis Deus ecce suis sanctisq; Ministris  
 Non credit; coramq; illo non sidera cœli  
 Munda satis: quî mundus erit, quî sordibus ergo  
 Liber, homo invisus, fætensq; et inutile pondus  
 Telluris, qui mente avida, & quasi gutture sicco  
 Omne genus scelerum bibit, ut bibit arida limpham  
 Terra. O ne pigeat te nunc sermonibus aures  
 Attentas adhibere meis. te nota docebo,  
 Quæq; oculis vidi exponam cuncta ordine, quæq;  
 Narravere sophi, nec celavere, vetustis  
 Accepta a patribus: quæis unis summa potestas  
 Concessa in populos et florentissima regna  
 Terrarum, quiq; invicto se pectore & armis  
 Tutati externum straverunt funditùs hostem.  
 Perpetuo innumeris hominum gens impia curis

Excrutiata.



Excruciata gemit, superis dum fluctuat oris,  
 Ceu mulier summos paritura experta dolores,  
 Vitamq; in luctu trahit & squalore, nefanda  
 Ob scelera; annorumq; truci stat fixa tyranno  
 Meta brevis. Gravis attonitas circumsonat aures  
 Terrorum strepitus, mediaq; in pace cruentus  
 Opprimit incautum nec quidquam tale timentem  
 Vastator. Non ille, nova ceu luce fugatis  
 Moerorum tenebris, remeare ad pristina vitæ  
 Gaudia speret inops: quin & cervicibus ensis  
 Imminet assidue mortemq; intentat amaram.  
 Nudus, iners, rabidaq; famis compressus orexi  
 Quæritat erro vagus panem per strata viarum,  
 Fatalemq; diem sibi mox instare, rependat  
 Qua scelerum pœnas, novit. Crudelis ubique  
 Luctus, ubiq; pavor, & plurima mortis imago  
 Terrificant sine fine animum; forsque omnia versans.  
 Prævalet afflicto, rex ut fortissimus hosti  
 Ante expectatum positus stat in agmine castris:  
 Quippe Deum contra stolidis temerarius ausis  
 Sustulit ille manum, obfirmato & pectore cœli  
 Immortale petit Numen mortalibus armis.  
 Tortum illi omnipotens immani percitus ira  
 Irruet in collum, & clypei septemplex orbes  
 Perrumpet iaculis. multo ut cava lumina pingui  
 Turgescat, licet alta strigas super ilia ducat,  
 Excisasq; urbes desertaq; limina dives  
 Extruat, & lapidum cumulos in regia vertat  
 Atria; non auri componet multa cupiti  
 Pondera, nec stabili constabit parva tenore  
 Copia, non vanos, queis se iam iactat, honores.  
 Latius extendet titulosq; & stemmata gentis.



Omnia pendebunt opera interrupta, nec unquam  
 Se miser è tantis tenebrarum & fortis iniquæ  
 Casibus expediet. Tencros fera flamma vireti  
 Torrebit ramos, iaculataq; ab ore Tonantis  
 Flamina dispergent male lusus inanibus umbris  
 Non hæc ille sibi deberi præmia sperat,  
 Vt cadat ante diem, nec brachia fronde virescant.  
 Ocyor horrifico tempestas turbine coelo  
 Immissa abripiet uvas, ceu vitis, acerbæ  
 Illius; atque oleæ flores ut decurrit Auster:  
 Sic ubi divinæ vis implacabilis ira  
 Incubuit semel, actutum nomenq; decusque,  
 Progeniesq; perit, sceleratæ et gloria turbæ.  
 Namq; hominum, sua qui specie pietatis inumbrant  
 Flagitia, infamem tenebris manus impia vitam  
 Incomitata trahet: nec non tentoria donis  
 Corruptorum Vltrix absument flamma, nocenti  
 Qui concepta animo scelera enituntur, et alto  
 Quotidiè infandas concinnant pectore fraudes.

## CAP. XVI.

*Iobus de injuria sibi ab amicis facta conquestus, agnoscit magnitudinem miseria sibi divinitus inflata, sed negat tamen, gravissima imprecatione adhibita, se eorum scelerum esse conscium, quæ ipsi aperte adeo imputaverunt amici.*

**H**Æc vix ediderat, cum sic incepit Iobus;  
 Quid mihi multiplici, toties audita, loquela  
 Ingeminas, Eliphaze? aures quid tundis inani  
 Alloquio! Paracleti estis mihi quisq; molesti  
 Ventosis qui finis erit, quæ debita verbis  
 Meta? quis indomitas tantus dolor excitat iras,  
 Vt gravido infandas eructes pectore voces?  
 Numnam ipse innocuum pravo damnantibus ore

Vterer



Vterer eloquiis, in vōsq; indigna vicissim;  
 Per varios eadem si vos fortuna labores  
 Iactaret, mala congererem, motoq; cadentum  
 Riderem ærumnas capite, et dispendia durus?  
 Immo equidem appposito potius sermone labantes  
 Fulcirem socios, et dictis lenibus, ultrò  
 Commiserans ægri casus solarer amici.  
 Sed quid agam? aut quid iam misero mihi deniq; restat?  
 Eloquar, an sileam tanto in discrimine rerum?  
 Si loquar, vsq; tamen gravi & vsque exercita luctu  
 Mens refugit, nullumq; ferunt lamenta levamen.  
 Sin taceo, quid & inde mihi decedit acerbo  
 De morbo? innumeris quassatum pectora curis  
 Lassatumque premunt sævi tormenta doloris.  
 Omnibus orbatus gnatis dudum, omnibus unà.  
 Desertus famulis, te devastante penates  
 Iova meos, solis vitam in magalibus æger  
 Exhaustusque agito. Rugæ, quibus undiq; vultum  
 Fœdasti, ductis veluti per pallida sulcis  
 Ora, meæ testes sunt & quasi stigmata cladis;  
 Testis & ipsa cutis siccata protinùs æstu  
 Mœrorum assiduo macies. furor Omnipotentis  
 Collatis veluti me adversum in prælia signis.  
 Irruit, atq; modis discerpit tabida miris  
 Membra: ferox sævis apri de more furentis  
 Dentibus infrendet, crebrisq; ardentia flammis  
 Lumina terget, atroxq; in inermem vibrat, ut hostis.  
 Nec satis: En patulis inhiantes faucibus ægras  
 Gens inimica genas probroso verberare cædunt,  
 Coniunctisque animis simul agglomerantur & armis.  
 Vnius in miseri exitium. quin me Arbiter Orbis  
 Irarum insolitos volvens sub pectore fluctus

Sontibus



Sontibus ad prædam exposuit, durisque nocentum  
 Obiectum manibus vaga per dispendia duxit.  
 Felix nuper eram, lætusq; per ocia vitam  
 Ducebam, rapido cum me ceu turbine stratum  
 Attrivit, prensaque ferus cervice minutim  
 Allisit, metamq; sibi, quo spicula dextrâ  
 Mitteret infestâ, posuit. circum agmina sæva  
 Stant iaculatorum, renesque atq; intima telis  
 Viscera diffidunt, funduntque per atria stricto  
 Ense fel evulsum, nullis flectenda precantis  
 Suppliciis. Cladem cladi, & nova vulnera priscis  
 Addit, & assiduis lacerat languentia plagis  
 Membra Deus, milesque velut fortissimus, in me  
 Incurrens validi manifestat robora brachî.  
 Sed quid ego tantis iactatus casibus egi?  
 Immundo Cilicum tabentes tristior artus  
 Vestitu involvi, decorisque oblitus avari,  
 Et cinere, & turpi foedavi pulvere frontem.  
 Spurca luto veluti lachrymis mihi lumina squalent  
 Perpetuis, lethique umbræ morientibus hærent  
 Palpebris: hæcque infelix dudum omnia, lova  
 Sic volvente, fero, quamquam vis impia palmis  
 Nulla meis, puraq; Deum prece castus adorem:  
 Quod si vana loquor, si fusi sanguinis unquam  
 Iure reus peragor, ne tu, ô iustissima tellus  
 Conde sinu, placida nec clamans audiar aure.  
 Sidereis fidus vitæ est mihi testis in oris,  
 Testis et ipse Deus, vigili qui lumine cuncta  
 Conspicit. O socii, facundi ô Rhetores, illò  
 Mens animi grauib; iamdudum saucia curis  
 Stillantes oculorum orbes collineat. ô si  
 Fas homini sit Marte pari contendere tecum

Rex



Rex superum, humano ut qui cunctis sanguine, amico  
 Non dubitat certare suo ! numerata caducæ  
 Nam vitæ momenta instant, & terminus ævo  
 Præscriptus, iamiamque viam lethalibus umbris  
 Horrendam, nulli unde datur remeare, capello.

## CAP. XVII.

*Iobus confirmationem causa sua gravissima reprehensione pertexens, Eliphazum ad Dei ipsius tribunal provocat. Deinde Amicos ad respicientiam hortatus, miseria sua deplorationem redintegrat, eamq; flebili pro sua lamentatione concludit.*

**H** Alitus ipse graui confectum membra dolore  
 Destituit, vitæque vigor iamiam omnis in auras  
 Avolat, ætatisque paratum in flore sepulchrum est :  
 Quinetiam socii (peream si ficta repono)  
 Illudunt misero, ridentq; immanè cachinnis  
 Continuis. Non ullum oculis, non pectore somnum  
 Accipio, fannis adeò divexor amaris.  
 Fac, Pater alme, datis vadibus nostrumque duorum  
 Nomine, communem quis litem terminet æquo  
 Iure, quis ille autem, quis erit ? mihi pignoris ergo  
 Ille manum pacto complodat foedere. Cœcas  
 Quippe his commertâ, novi, caligine mentes  
 Obtæxti, hoc iustam testatus Numinis iram  
 Ob scelera ; idcirco non attollentur in altum,  
 Sed causâ, ut meruere cadent. Pellacia amicis  
 Quisquis adulandi studio mendacia fingit,  
 Illius horrendo gnatorum lumina fato  
 Deficient. Verum interea per compita, vulgi  
 Ludibrium fio, vitiosæ & fabula turbæ.  
 Lumina item tanto dum mens mihi fluctuat æstu  
 Calligant, neq; iam corpus, sed corporis umbram  
 Gesto miser, trepidoque stupent hæc pectore quotquot;

G

Nec



Nec mundi impietas, nec ficti credulus error  
 Præscripto avertit sacrosanctæ à tramite legis.  
 At nihilo tamen ora minus feret armaq; iustus  
 In simulatorem, contrâq; audentior ibit.  
 Monstratum sibi iustus iter carpitque, tenetq;  
 Mordicus, intentent quantumvis omnia mortem  
 Præsentem; viresq; novas acquirit eundo  
 Qui manibus, qui mente pius. Resipiscite tandem  
 O locii, inque viam sanæque ad munia mentis  
 Confesso ingenuè, spretoque errore redite.  
 Vos inter siquidem sapiens mihi nemo repertus,  
 Nemo qui appositis soletur vocibus ægrum.  
 Hei mihi! quàm celeri vitæ momenta volatu  
 Aufugere? brevis spes longas horula in auras  
 Abstulit aërias, jam totas lumina noctes,  
 Sol quasi nocte solum collustret lampade, ducunt  
 Insomnes, mage nec fruor ortæ munere lucis,  
 Quam verso quando atra polo terram umbra tenebris  
 Obruit. amissæ subeat spes siqua salutis,  
 Frustrâ est: una mihi superat domus atra, sepulchrum:  
 Sternoque in tenebris thalamum, tumultoq; latenti  
 Dico, Pater meus es; vosque ô, materque, sororq;  
 Vermiculi. Quæ jam milero tot funera passo  
 Spes reliqua est? quisquàmne olim volventibus annis  
 Florentem aspiciet votisq; à morte potitum?  
 Veçte sepulchrali mecum hæc demissa sub antro  
 Descendent, pariterque in pulvere cassa quiescent.

CAP.



*Bildadus, Iobe acriter reprehensio loquacitatis, arrogantia, atque impatiencia, impro-  
borum clades et exitium eleganter describit.*

**T**Alia fatus erat, cepit cum talia Bildad;  
 Quem quaeso dabitis finem Iobe, ore loquendi?  
 Discite iam tandem iustis expendere gnari  
 Lancibus hac quæ dicta tenus discussaque utrinque,  
 Noster ut ad certum referatur sermo tenorem.  
 Quid brutis similes pronum spectantibus orbem  
 Nos tibi, Iobe, tuisque adeo sordemus ocellis?  
 Fare agedum, cunctas qui sic effundis habenas  
 Irarum, atque animam furiata mente miscellam  
 Dilaceras, terræne Orbis, te propter, habenas  
 Deferet omnipotens, consuetoque ordine rerum  
 Everso, stabiles convellet sedibus imis  
 Saxorum moles, actosque ad sidera montes?  
 Nunc ergo hæc animo (res est non parva) reponere  
 Ritè memor. Vitiis gaudendum extinguitur omnis  
 Splendor, honorque et opes, & priscae insignia gentis  
 Stemmata, nec longum superat scintilla favilla.  
 Quinetiam sine luce domus, sine honore penates  
 Nequam hominis clausi circum nigrantibus umbris  
 Calligant, oleique absumptam alimenta lucernam  
 Destituunt, solitis defectum viribus arctus  
 Cogit in angustum callis, pessumque maligno  
 Consilio ruit ipse suo. Vestigia reti  
 Implicat, & qua tendit iter cunq; ambulat altum  
 In cassum, laqueumque inopinus calce prehendit.  
 Horridus in iaculis, telisque minacibus acer  
 Invadit prædo: latitatque infida doloso



Pulvere decipula, & quà quà via ducit, eunti  
 Stant nexi funes, terrorum hunc agmina mille  
 Exagitant, tergoque dato in diversa vagari  
 Palantem subigunt. Iuvenili robore cassum  
 Conficit atra fames, infernisq; undiq; Diris  
 Armata obsessum comes ad latus adsit Erynys.  
 Devorat implexos ramosis nexibus artus,  
 Devorat infamis sœva inclementia lethi;  
 Spesq; domus, sobolisque; et, queis se iactat, honorum  
 Mox omnis rapido ceu flumine pulsa peribit,  
 Ad Regemq; adigent terrorum fata merentem:  
 Incolet horror atrox crebris tentoria furtis  
 Extructa, & multo commistas sulfure flammis  
 Vsta voment. Fibras radicum arescere cernas  
 Infernè, sursumq; acie frondentia cædi  
 Brachia. Viventum superis cita devolat oris  
 Fama mali sic commeriti, atq; obliviam nomen  
 Lethæa expungunt. Vitali lumine functum  
 Nemo recordatur. Depulsus luce tenebris  
 Mergitur æternis, patrio et proci exulat arvo.  
 Non illi soboles, non illi filius, ore  
 Qui patrem referat, serive è stirpe nepotes:  
 Nullus ei superest everis sedibus hæres.  
 Tanta hæc posteritas olim ventura stupebit  
 Excidia, & lustris genitos præsentibus ingens  
 Terror habet, miseri spectantes funera fontis.  
 Scilicet hæ sedes, hæc sunt devota nocenti  
 Tecta, Dei summum renuenti agnoscere Numen.

CAP.



*Iobus damnata iterum Amicorum inhumanitate, exaggeratisq; calamitatibus sibi diminutis inflatus, ad commiserationem ipsos hortatur, & fidei, speiq; sua in Domina ratione allata, ab infestatione sui debortatur.*

**I**obus ad hæc, quo me usq; ægrum fractumq; dolore  
 Excruciare novo iuvat, et sermonibus aspris  
 Atterere? en decies ignominiaque probrisq;  
 Infonem afficitis, laxaq; pudoris habena  
 In me hostili animo ut peregrini insurgitis. Esto,  
 Erravi, mecum maneat meus error. Iniqua  
 Quod si ore infido convitia spargere certum est.  
 In socium, et casus grandire opprobria nostri.  
 Discite vi quanta res fundo everterit imo  
 Omnipotens sine more meas, utq; undiq; iactis  
 Retibus in laqueos me mira induxerit arte.  
 Vis inimica furit clamantem adversus, & auræ  
 Omnia discerpunt, ac nubibus irrita donant  
 Lamenta. Haud quisquam est, qui quod peto, quodq; re-  
 Guttare iam toties rauco ius reddier æquum (posco)  
 Postulet. Hinc atque hinc glomeratis undiq; turmis  
 Anfractus sepsit Deus, occultosque recessus,  
 Et tenebris callem gradienti involvit opacis.  
 Nominis ille mei famam super æthera noti  
 Abstulit, & claro nudavit stemmate frontem:  
 Aridam uti fossor plantam radicibus imis  
 Strenuus ablaqueat, circumfossamq; revellit,  
 Mecum ille haud aliter furiali percitus æstu  
 Egit, & evulsæ penitus velut arboris omnem  
 Spem tulit, infestisq; ut in hostem sæviit armis.  
 Quinetiam assidue hæc magna stipante caterva



Sternit iter, tenditque furens tentoria circum.  
 Fratres ille meos a me carosque propinquos  
 Et socios, notosque procul crudelior egit.  
 Namque ex quo infensi me contra efferbuit ardor  
 Numinis, en patrio coniuncti sanguine mecum  
 Cognati, affinesque oculis se quisque repente  
 Subtraxere meis; afflicti & longa sodalis  
 (O dolor) antiquos cepere oblivia amicos.  
 Iamque ego vel famulis, ancillisque advena vilis  
 Ducor, ut externum vultu averfantur iniquo.  
 Si vernam appello, precibus si invito benignis,  
 Responsum surda nil secius abnegat aure.  
 Quin animæ gravis aura meæ, gravis halitus oris  
 Vxori est, dilecta licet per pignora, gnatos,  
 Per connubia nostra orem dulcesque hymenæos.  
 Ipsi me pueri, & quos fama obscura recondit,  
 Despiciunt, quæisque inferior velut, ore pudorem  
 Testante, assurgo, probris sannisque pudendis  
 Excipiunt, grato, & fungentem munere rident.  
 Quid quod et alta animi quibus olim arcana suæram  
 Credere, fraterno quos sum complexus amore,  
 Me fugiunt, odiisque onerant, telisque refracta  
 Pace, petunt, lævis ut cernunt omnia faris  
 In peius ruere & retrò sublapsa reterri.  
 Ossa cuti sine carne meæ sine viribus hærent;  
 Nec nisi gingivis toto mihi corpore quidquam  
 Iam sanum superat. Tandem ergo ô parcite amico,  
 Et miserescite ei, quem summi ludicis ultrix  
 Dextra ferit. Cur nam Domini de more sodalem  
 In miserum furitis? mentes satiare cruentas  
 Non potis est absumpta caro, non squallida foedo  
 Membra situ plagisque? Vtinam dicentis ab ore



Fusa meo descripta forent impressaque fido  
 Verba libro ! ô utinam ferro sculpanthur acuto,  
 Aut plumbo, aut lapidi longum mansura per ævum !  
 Vivit enim novi, Vindex, Authorque salutis  
 Ille meæ, et terris stabit post fata superstes.  
 Quin licet erosa cute fluxum hoc corporis olim  
 Excisum fuerit simulachrum, in carne videbo  
 Hac Dominum ipse meum nihilominus, atq; tuebor  
 Hisce illum haud aliis oculis : quanquam intima renum  
 Interea tristis consumit viscera morbus.  
 Verius ergo foret vos dicere, cur ita lobum  
 Persequimur, dictisque adeo vexamus amaris  
 Consortem ? pensis num iusto examine cunctis  
 Me solido causam paret fundamine nixam  
 Rite agere, atque æqua pugnam de lite subisse :  
 Proinde Dei iam nunc vobis fero ab ense timete,  
 Ense furor tantus scelerum plectendus, ut esse,  
 Qui meritas repetat pœnas a fonte, sciatis.

## CAP. XX.

*Sophar responsandi occasione ex verbis Iobi arrepta, in eo totus est, ut doceat, improbos post brevem rerum prosperarum letitiam, repente de jici, ac tandem malè perire, id ita postulante summa Dei justitia.*

**S**ic ait. inde Sophar Namatites talia contrà  
 Subiicit. Ista memor mecum dum mente revolve  
 Quæ minitare tuis flammato pectore Amicis,  
 Iobe, reis veluti conflati criminis altum  
 In cœli, terræq; Deum, tibi pauca referre  
 Urgeor, et veros festino expromere cordis  
 Offensi motus. Tot tantaq; crimina, terres  
 Quæis socios, et probra tuis mî obiecta querelis  
 Audio; sed fraudis mens non sibi conscia spontè

[ Suggest



Suggestit infandis quæ fas opponere dictis.  
 Tene fugit quod longo exploratum omnibus usu est,  
 Ex quo olim mundi Genitor mortalibus ægris  
 Arva colenda dedit? Nimirum infida vetustis  
 Haud repeti à seclis sceleratæ gaudia gentis;  
 Nec simulatoris, qui fictis impia sacris  
 Prætexit, fluidam longum consistere posse  
 Lætitiâ, vanosq; tumet, quibus ille, triumphos.  
 Alta poli quamvis adeat fastigia fama,  
 Pulset & altriferos elato vertice circlôs  
 Fraudis amans, tamen haud longo pòst tempore fædi  
 Stercoris ille sui æternum de more peribit.  
 Vicini attonitis mirati mentibus omnia  
 In peius, retróq; gravi sublapsa ruina  
 Conclamant, ubi nunc gazis quem vidimus amplis  
 Florentem modò & veloci ut vaga somnia cursu  
 Diffugiunt, sic vita hominis sic gloria nequam  
 Avolat, & nocturna velut dilabitur umbra.  
 Nulli abitus, nulli vestigia cœca patefcunt.  
 Non illum vltra oculus, non quos conseruat agros,  
 Exhausta aspicient post fata. Immò illius olim  
 Posteritas miseranda gregis vel pauperis auram  
 Captabit, quæq; ille manu per vimque dolumq;  
 Caput, ad extremum cogentur reddere palmæ.  
 Adde quòd et teneræ commissa piâcla iuventæ  
 Ossa luent iugi morborum exesa dolore,  
 Innumeræq; ægrum morte adventante sequentur  
 Ærumnæ ad tumulum, cippoque abdentur eodem.  
 Dulcescat licet ore malum, velut esca palato  
 Apprime arridens, retinet quam lingua remansam  
 Sæpius, & grato recreantem labra sapore;  
 Attamen inuersum fuerit simul, atq; receptum

Pectoris



Pectoris in latebras, sed firmo aspidis imis  
 Visceribus. quas sorpsit opes, modo gutture crudas  
 Evomet: invitoque Deus ventre eruet omnes.  
 Deinde ipsum, patulo quasi suxerit ore colubri  
 Pestiferum in venas virus, quasi noxia tactu  
 Vipera lethali miserum percusserit ictu,  
 Auferet atra dies, et funere merget acerbo.  
 Non ultra aërii mellis manantia succo  
 Flumina, butyrove amnes et lacte fluentes  
 Aspiciet: contraq; alieno parta labore  
 Necdum absorpta, brevi subigetur reddere iusta  
 Mensura, haud opibus multum letatus iniquis.  
 Quippe inopes attrivit atrox, & sorte paterna  
 Exuit oppressos quā vi quā fraude nefandi  
 Prædonis ritu, quasque haud extruxerat ædes  
 Diripuit: quumq; ipse nihil sibi duxerit esse  
 Ad ventrem implendum satis ingluviemque voracem,  
 Irrequietus aget vitæ restantia lustra,  
 Nec longo optatis gaudebit tempore gazis:  
 Nil reliqui, quod mandat, erit: quin ocyus omnis  
 Effluet, incassum sēclis speranda futuris  
 Pristina prosperitas. Cum satque superq; beatum  
 Se credet, summoq; evectum culmine rerum,  
 Ecce superveniet confestim angorq; dolorque,  
 Et scelerata manus turmatim invadet inermem.  
 Si ventrem farcire cibo per fasque nefasq;  
 Quæsito accurat, divinæ protinus iræ  
 In caput, inque dapes summo pluit ignis olympo.  
 Ferrea si verò devitat spicula tergo,  
 Illicet adductus fugientem atq; eminentis arcus  
 Aeneus infesto transfigit vulnere telum:  
 E pharetra simul eripitur, simul altius ictas



Transadigit costas; effuso et felle coruscum  
 Prodit ab exanimis confosso corpore pilum.  
 Quid multa? æternis agiturum horroribus ævum;  
 Exigit impietas, densiq; obscura tenebris,  
 Caligo incumbit latebris tectisq; nocentis;  
 Humano sine flatu ardens, sine foliibus ultro  
 Accensa, impuris maculatum pectora nævis  
 Flamma vorat: teriturq; pari (res certa) ruinâ:  
 Qui laribus superat gnatusve, hæresve relictis.  
 Insidias, scelerumq; dolos, admissaque furta  
 Si qua tegat, reteget quod conspicit omnia cœlum;  
 Ipsaque iam tellus ceu facta e matre noverca  
 Instabit contrâ, Dominiq; vbi ferbuit ira,  
 Proventus reditusque domus, divesq; supellex  
 Defluet, ut rapidus montano flumine torrens.  
 Hæc quondam se digna ferent a Iudice fontes  
 Præmia, et hæc cœlo merces decreta scelestis,  
 Blasphema qui voce Deum cœlumque lacesunt.

## CAP. XXI.

*Jobus blanda præfatione usus, amicorum propositionem de infelici improborum statu  
 confutat, negans id perpetuè evenire, cum sepe è contrariò prosperè hic vivant, placidè  
 moriantur, et sobolem opibus abundantem relinquunt, ex quo inferi se jure ipsorum  
 consolationes, responsionesq; rejicere, tanquam vanas, et à veritate alienas.*

**D**ixerat. Vixit contrâ sic reddidit Heros:  
 Attentas adhibete meis sermonibus aures:  
 Hoc ego, non aliud posco solamen; & æquo  
 Ferte sodalem animo, verbis dum debita vestris.  
 Expediam; fannis dein me de more solutis.  
 Excipite. Anne mihi rem cum mortalibus esse:  
 Creditis? ipse Deus, Deus ecce horrenda misellum  
 In famulum arma movet: qui non arctata dolore

Mens



Mens tantò affludis singulibus illa pulset?  
 Me me ô tandem oculis, oculis, spectare benignis  
 Attoniti, premitte ora manu, & compescite labra:  
 Ipse meas equidem quoties cum mente recordor  
 Casusq; æmulusq; animi exhaustosq; labores,  
 Horresco, et subitus totos tremor occupat artus.  
 Interea lætam cur alta in pace nocentes  
 Felicemq; agitant vitam? cur cana senescit  
 Cur opibus, gazisq; Arabum turba impia pollet?  
 Aspice, stat multos cladis secuta per annos  
 Progenies, longâq; vident succedere stirpe  
 Natorum Natos, & qui nascuntur ab illis.  
 Præterea sine lite domos, sine Marte quieti  
 Tecta colunt, laribusq; pavor procul exulat omnis,  
 Nec super insonuit flagris Deus, ecce maritam  
 Taurus init vaccam, nec nisu semen iniquo  
 Effundet genitale sui bos tempore partus  
 Completo factum edit hero, neq; morbida abortat  
 Emissi vario per prata nitentia flore  
 Lætantes saliant pueri luduntq; petulei  
 More ouium, pugnaq; cient simulachra per herbam;  
 Vocem alacres tollunt cælo ceu tympana, dulcem  
 Ceu citharam, et festis genialia ad organa late  
 Cantibus exultant: deinde ævi suaviter acti  
 Munere defuncti placidis post fata quiescunt  
 Sedibus, & magno tumuli donantur honore,  
 Experti exiguos aut vita aut morte dolores.  
 Hi tamen ore Deum sic ipsum affariet ausi  
 Sacrilego. Procul à nobis, procul esto: tuarum  
 Non gustu capimus, non cognitione viarum.  
 Quis Deus, ut legis mandata invisa severæ  
 Præstemus? quid casta opus est per vota precosq;



Poscere opem & infanda hæc blaterant impune. Sed ipse  
 Non equidem, idcirco penes istos arbitror esse  
 Prosperitate frui stabili: neq; iniqua nocentum  
 Consilia arident. At enim lux aurea quando  
 Destituit, fontes? quando obruit horrida nimbis  
 Tempestas? quoties irato à Iudice tantis  
 Præmia flagitiis capiunt condigna? per orbis  
 Ecquando varias disiectos cernimus oras  
 Ceu paleæ glumas, volucris quas concita gyro  
 Aura rapit? quoties Nati scelerata parentis  
 Facta luunt? quoties pater ipse ob crimina poenas  
 Dat meritas, sævæq; manus fera verbera sentit?  
 Ecquando madidis jam jam periturus ocellis  
 Pernitiem videt illa suam? quoties ve furore  
 Spumantem pateram commoti Numinis haurit?  
 Desertæ quæ cura domus, quæ cura relicta  
 Post se proles eum tangat iam lumine cassum,  
 Immunisq; mali decurso tramite vitæ  
 Nunc agè, mortali quisquam ne è semine cretus  
 Omnipotentem Orbis Dominum qui celsa gubernat  
 Templâ poli, sapere edoceat, rerumque rueri  
 Imperium? quem tanta hominum dementia cepit?  
 Ecce tibi è binis pariter pravæve, piæve,  
 Succedunt vni feliciter omnia; magnis  
 Floret opum gazis, placidamq; per otia vitam  
 Dives agit, post lætus obit, plenusq; dierum:  
 Multo illi assiduè redeunt multa trahia lacte  
 Plena domum, & pingui crassescunt ossa medullâ.  
 Alter at infando longum trahit æger amaram  
 In luctu lachrimisq; animam, nec opima secundæ  
 Fercula gustavit mensæ, tandemque miscellam  
 Pertæsus vitam satis concedit iniquis.

Verum



Verum ut dissimili, superis dum vivitur oris;  
 Conditione sient, simili post funera sorte  
 Æquantur tumulo, et vermis simul obtegit ambo.  
 Ecce autem motusq; animi commentaq; vestri,  
 Quæ contrà struitis, sat nota. Hæc namque malignâ  
 Mustantes memini vos nuper dicere linguâ,  
 Tectum augustum, ingens centum sublime columnis  
 Principis, atq; auro postes spoliisq; superbis  
 Fulgentes vbi nunc? vbi nunc tentoria sontum  
 Auratæq; trabes, veterum decora alta parentum?  
 Quin vero hæc gressos (missa jam protinus omni  
 Lite) viatores super his, peregrèque reversos  
 Percontati estis? signa hi certissima namque  
 Quærenti illorum modò quæ mihi dicta dedissent:  
 Nempe quod adversos, cum fors gravis omnia versat,  
 Impius exitovans casus, cœliq; furentis  
 Lethifera evadit non leso pectore tela.  
 Ecquis eum vitæ coram ausit nequiter actæ  
 Arguere? aut justas, impune ob crimina pœnas  
 Exigat? ad manes postquam his concessit ab oris,  
 Lætitiæ, rerumq; satur, lucisque, sepulchro  
 Conditur in molli, tumuloq; quiescit avito:  
 Dulcescunt illi glebæ, vallesq; virentes  
 Ad bustum & longo post se trahit ordine cuncto  
 Semine mortali genitos, communis ut olim  
 Lethi eadem innumeris calcata est semita turmis,  
 Ergo quid insulsis ægrum mulcere loquelis  
 Tentatis? quid vana adeò solamina profunt,  
 Et responsa sonis nimium differta sinistris.



## CAP. XXII.

*Eliphazus hoc tertio congressu absurda quadam ex Iobi dictis perperam interpretatus colligens, aperte ipsum accusat, ut inhumaniter, amare, crudeliter, imò & impiè, auctoritate sua et opibus abusus. Itaque propositis tuis iudiciis Dei adversus impios, tum benedictionibus erga pios ad respiciendam ipsum hortatur.*

**H**Æc ubi dicta : Eliphaz commoto ita pectore fatur ;  
 Mortaline satum cretum conducere reris  
 Posse Deo ? sapiens animi sibi proderit ipsi,  
 Non Domino, si recta sapit : quid magnus Olympi  
 Terrarumque Parens, nutu qui sidera torquet,  
 Inde voluptatis capiat, quod purus et expers  
 Tu tibi sis vitii ? quid eum juvet, obsecro rectum  
 Si tua justitiæ trirint vestigia callem ?  
 Tene reum fontemque facit, litemque severus  
 Intentat metuens sibi ne furialibus ausis  
 Officias ? apage ! exuperat numerumq ; modumque  
 Improbilas tua, et effusis grassatur habenis  
 Fas omne abrumpens, tu capto pignore lævus  
 Oppressisti inopes nullo discrimine fratres,  
 Et miserum lacera vix tectum veste popellum  
 Nudasti. Peregrè tot cœli incommoda passi  
 Totque viæ non fonte sitim, non pane furentem  
 Hospitis esuriem modico tua copia, lobe,  
 Leniit. Interea Domino patuere potenti  
 Arva tua, et dites tecum confidere regno  
 Iussisti. At censu spoliata paupere vota  
 Frustratus viduæ, orbatis patre brachia durus  
 Trivisti, sobolem nil commiseratus egentem.  
 Iure ergo & laqueis te circum et retia cingunt  
 Incautum, subitusq ; ægros, pavor occupat artus.  
 Horrendæ ex oculis tenebræ cœlumque diemque

Palpanti



Palpanti eripiunt, decumano et gurgite mersum  
 Obruit agmen aquar. Tu fors hæc pectore demens  
 Volvebas : Qui celsa colit tentoria cœli  
 Astriferasq; super sublimi vertice sphæras  
 Eminent, ætherio quâ tam procul axe remota  
 Noscat ? inaccessis qui cernat clausa tenebris?  
 Interjectæ aciem divini & lumina visus  
 Obtundunt nubes, quarum sub tegmine denso  
 Abditus; his quid agant mortalia pectora in oris  
 Nescit, et excelsos securus obambulat orbes.  
 At verò (ô nostris nunquam flectende loquelis)  
 An tibi seclôrum non observata priorum  
 Semita, quam trivere mali technisq; nocentes ?  
 Nempe hos, castigante Deo sic crimina fontum  
 Abtulit ante diem crudeli et strage peremit  
 Vis cœli : pessumq; solo fundamen ab imo  
 Spesq; domus ruit, effuso velut agmine torrens  
 Fertur in arva furens. Causam petis ? ore profano  
 Ausi illi ætherium sic compellare Parentem  
 Infani : Procul à nobis, procul esto. Sed illis  
 Quid quæso, Omnipotens blaterent quò talia, fecit ?  
 Innumeris non ille bonis opibusq; superba  
 Quamlibet ingrata repleat tecta catervæ?  
 Ergo quid indecorisq; adeò injustæq; cohortis  
 Consilia à nostris sic discordantia laudem ?  
 Immo animo procul illa meo, procul ore recedant :  
 Flagitiis meritas solventem sanguine pœnas,  
 Sontem insons oculo læto aspicit, omine tanto  
 Exultans, miserisq; pio vir corde nepotes  
 Ridet, ubi res qualq; videt vitamq; bonorum  
 Liberam ab excidio florere, omnesq; vicissim  
 Flagitiosæ hominum turbæ et tam indigna loquuntæ

Reliquias.



Reliquias penitus flammis coelestibus uri.  
 Quare agè, mitte metum, malè amicas mitte querelas,  
 Cumq; Deo assuescas, veniam pacemq; per aras  
 Exquirens; hinc certa salus, hinc larga redibit  
 Copia. Fac memori legum præcepta capeſſas  
 Mente, olim Dominus sacro quæ tradidit ore,  
 Sensibus atq; imis coelestia dicta reponere.  
 Si precibus, si corde Deum scelus omne peroso  
 Indeses placare studeſ meliora secutus:  
 Continuò priscamq; decus, vitæq; refundet  
 Gaudia præteritæ. Laribus procul exulet omnis  
 Improbitasque, dolusq; tuis, jus regnet & æquum:  
 Tunc auri immanem, Domino tribuente, beatus  
 Sub pedibus tellure premeſ vim, pulveris instar,  
 Atq; polo eductæ rupis de more recondes  
 Congesta in cumulos obrizi immensa metalli  
 Pondera. Tunc cunctis qui solus sufficit, aurum  
 Ipse erit argentumq; tuum, roburq; perenne;  
 Inq; vno tum, Iove, Deo lætabere mentem,  
 Sublimesq; hilaris tolles ad sidera vultus.  
 Placatus facili te orantem exaudiet aure,  
 Tuq; illi plena persolves debita acerrâ  
 Vota. Ratum faciet puro quod pectore cunq;  
 Decernes, pulsaque atræ caliginis umbra,  
 Prævia lux grato perfundet lumine callem,  
 Felicemque dabit successum rebus agendis.  
 Cum fastu tumidos, opibusque et honore superbos  
 Dejectum it celso Dominus de culmine fontes,  
 Tum lætus positus, dices, mœroribus alto  
 Me locat in solio favor & clementia Patris  
 Ætherii. Nam fractum animos humilique tenentem  
 Ora modo obtutuque lubens defendit, & ipsis



Ille tui (haud dubium) studio tum parceret iniquis,  
Quos foedis scelerum purgata a sordibus, olim  
Eripiet supplex meritis tua dextra flagellis.

## CAP. XXIII.

*Iobus de sua calamitatis magnitudine pauca praefatus, ad Dei ipsius tribunal rursus provocat, aequitate causa fretus, et certo conscientia sua testimonio. Deinde acquiescere se testatur in liberrima potentissimaeque Dei administratione; ita tamen ut non possit non perturbari hoc misera rerum suarum statu, mirabundus qui fiat, ut in tantis malis tandem possit miseram vitam trahere.*

**I**Obus ad hæc querula respondit talia voce:  
En rursus ad tristes etiamnum inflectere sensus  
Verba adigor; veterisq; mali lamenta subinde  
Erumpunt magis atq; magis, vincente querelas  
Vulnere, quod læsis præcordia ad intima venis  
Infixum latet. O utinam quis pandat apertum  
Dux mihi fidus iter divini ad limina Regis!  
Hic equidem ad solium tam sancti iudicis ultrò  
Impavidus sistar causam tot crimina contra  
Acturus, plenis rationum hic pondera buccis  
Attulero, præsensque sciam quæ mutua reddat  
Dicta meis, quid lite super pronunciet ille.  
Mene potens Genitor non æqua in prælia poscat,  
Contendatq; una telis cælestibus ægro  
Cum famulo, invictæ confusus robore dextræ?  
Non ita: quin potius magnarum pondere presso  
Ærumnarum animos, vires, roburque ministret.  
Heic pietatis amans, objecti heic criminis expers  
Causam lætus ager; speremq; hoc Iudice, fraudum  
Absolvi æternum. Sed quò vestigia vertam?  
Antrorsum si abeo Phæbææ vbi lampadis ortus  
Astra fugat, frustra est: si post dein tendo retrorsum,



Qua ponto alipedes Titan demergit anhelos,  
 Incassum heic etiam rimantem luserit error.  
 Ad lavam si pergo, ubi agit miranda, nec illic  
 Prætereuntem oculus capiet; si denique dextrum  
 Spectat ad Austrum acies, simul heic indagine vanâ  
 Non visenda Dei mortales quærimus ora.  
 Hoc tamen hoc rebus superat solamen in arctis,  
 Perspectos quod ut ille tenet moresque viasque,  
 Quæque dolens patior; sic postquam singula vitæ  
 Gesta recognorit, nitido mox purior auro  
 Fornace egrediar. Divi vestigia Patris  
 Sollicito pressi pede; nec malus error, amorque  
 Deius à legum præscripto tramite gressum  
 Deflexit: non sacra Dei mandata rebelli.  
 Detrectavi animo curvas cum fonte secutus  
 Nequitiae salebras. Epulis præ dulcibus, ipsa  
 Præ vita, vitæque bonis memori omnia corde  
 Condita divini servavi oracula Verbi.  
 Sed quid ego hæc autem nequicquam ingrata revolve?  
 Si capit arma Deus, si bellum inferre pararit  
 Mortali; stertque hæc, divæ sententia menti,  
 Ecquis ei de gente hominum, superumque resistat,  
 Inceptoque adigat positos desistere telis?  
 Quod sibi decrevit faciendum haud multa moratus  
 Exequitur, quodque immani, in me percitus ira  
 Consuluit pro jure suo, pro robore dextræ  
 Efficiet; penes illum hujus non pauca tenoris.  
 Ergo vel intuitu tam magni Numinis vno  
 Terreor, et vigili perpendens omnia cura  
 Horresco, ancipiti mentem formidine pressus.  
 Quippe animum sine fine ægrum liquefecit amaris  
 Sollicitudinibus; Deus ingentique stupore



Pectoris ima mei perfudit viscera, tantis  
 Mærorum in tenebris quod adhuc mihi vita supersit;  
 Inque dies grassante malo languentia cesset  
 Lumina semianimis lethæa obvolvere nube.

## CAP. XXIII.

*Docet hic Iobus adeo occultam esse iudiciorum Dei rationem, ut de ea nemo quidquam  
 statueret possit, cum tot improborum generibus alii quidvis malorum per totam vi-  
 tam impune perpetrent, alii vero pœnas repensè luant.*

**Q**UÏ rerum Genitor pœnas devota nocentum  
 Tempora non omni miseros celarit ab evo  
 Mortales, quum sancta virum dilectaque cœlo  
 Progenies, quæ ritè Deum novitque, colitque,  
 Iudicia in seros nescit dilata scelestos?  
 Limitem agri removet vicini, armenta que raptat,  
 Rapta que furtivo pascit gens impia fæno  
 Impunè, à stabulis asinum vel pauperis orbi  
 Avertunt, viduæq; inopis pro pignore (ne quid  
 Intentatum vsquam scelerisve dolive supersit)  
 Accipiunt taurum: nec non de calle viarum  
 Distractos tennes, pullosq; occulta subire  
 Antra metu subigunt, cæcisq; latere cavernis.  
 Quin omnis cultusque Dei, jurisq; piorum  
 Immemores, onagrorum instar deserta per avia  
 Aggrediuntur opus, primisq; cadentibus astris  
 Gnaviter illicitas quærent per inhospita prædas  
 Tesqua, latrociniiis assueti et vivere rapto.  
 Prædoni, puerisq; escam viduata colono  
 Dant loca; agrisque iidem furaci gramine latè  
 Non sua falce metunt, frugesq; et dulcia vitis  
 Munera surripiunt quæ vi, quæ fraude clienti.



Vestibus hæc inter spoliati atque omnium ege-  
 Pernoctant inopes gelidi sub fornicis axe,  
 Nec leve brumali nudatis frigore tegmen  
 Suppetit. Argentes ponunt in pulvere costas,  
 Pertusique altis lapsa de montibus unda  
 Saxa petunt ulnis, specubusque abduntur opacis.  
 Hæc foris ausa manus scelerata : domique vicissim  
 Matris ab uberibus teneros (miserabile visu)  
 Pupillos rapiunt ; ablato & pignori amictu  
 Pauperis extremo sine veste, cæcæque vagari  
 Per loca sola sinunt operas, in messibus usi  
 Queis fuerant, vacuas, jejuno et ventre remittunt.  
 Quique oleum eliciunt pacta mercede taperis  
 Inter olivarum series, quique ipsa racemis  
 Haud lecas ac jussi tumidis spumantia calcant  
 Prela, siti pereunt, armis technisque nocentum  
 Urbis oppressa gemit, latè et ploratibus auras  
 Implent : atq; omnes quos dira morte tyranni  
 Tollunt voce una inclamant, precibusque reposcunt  
 Vindictam assiduis ; nec Rex tamen ætheris altus  
 Tantorum opponit scelerum se inmanibus ausis.  
 Defensi tenebris et dono noctis opacæ  
 Flagitiosa cohors hominum, queis nomina mille,  
 Mille nocendi artes, lucem magis omnibus vnam  
 Odere, ignarique viæ quam signat Olimpo  
 Mundi oculus, loca cæca legunt, silvæque latebras.  
 Pars surgente die, cum vix orientia solis  
 Cernere tela datur, stratis exurgit, ege-  
 Ut jugulet ; pars sole parat sua furta cadente.  
 Sedulus observat creperæ confinia noctis  
 Mæchi oculus, dicitque, oculus me nullus, opinor,  
 Conspiciet, larvæque genas incedit opertus.



Nocte fodit quas manè domos & tecta notarat  
 Effractor; refugitque hominum fur lumina, lucis  
 Nescius: auroræ sunt his exordia primæ  
 Lethalis velut umbra. Simul fax aurea Phæbi  
 Nativos reteggit depulsa nocte colores,  
 Illicet horrendæ terrentur imagine mortis,  
 Ne sua furta dies veriti ferat alma per auras.  
 Huc illucque leves fluitant, velut undula quovis  
 Pulla Noto; forsque exitio devota perrenni  
 Non iterum vitis flor. scit more putatæ.  
 Sorbet ut ariditas, ut solis flamma nivales  
 Solvit aquas æstate nova; sic protinus omnes.  
 Æruscatores lethi domus atra, sepulchrum  
 Abripit incautos, capiuntque obliviam fontis  
 Matricem. Fit grata brevi suavisque sub antro  
 Vermibus esca avidis, non priscae gloria famæ,  
 Nec longum memoratur honos: siccae arboris instar  
 Succisæque imis radicibus ocyus omnis  
 Impius aret humi, subitoque infrangitur icu.  
 Quippe ferox sterilem, thalami quæ præmia novit  
 Nulla, terit, viduamq; malus malè tractat egentem.  
 Quinetiam excelsa per vim de sede potentes  
 Dejicit, infestisque adeò premit undique telis,  
 Ut vitæ sibi quisque suæ, vitæq; suorum  
 Diffidat. Nihilo interea minus omnia votis  
 Respondent. Deus huic amplas, quæis nititur amens.  
 Fundit opes, tenditque oculos in commoda fontum:  
 At verò ut modicum summa ad fastigia surgant,  
 Mox lapsu graviore ruunt; nulloque relicto  
 Hærede, è celso detrusos culmine cunctos  
 Vidimus, et superis excisos funditus oris,  
 Ceu minimo spicæ suprema cacumina nisu.



Effracta intoreunt. Nunc eja agè, dicite, numne  
Vana canam? eloquii queis me falsi arguat actor  
Aut dicta in nihilum referat, verbisq; refellat?

## CAP. XXV.

*Summam Dei potentiam, maiestatemque hic pradicat Bildadus, ut ex comparatione illius lobum innocentiam suam asserentem reprehendat.*

**S**ic ait. Huic Bildad Suchites pauca vicissim  
Ore refert. Mundi imperium rerumque potestas  
Summa Deum penes est, et formidabilis orbi  
Majestas. Ille unus agit securus Olympi  
Sedibus excelsis, placidèq; immensa gubernat  
Templa poli. Innumeras numero comprehendere turmas  
Quis potis est, magno Patris quæ ad iussa paratæ  
Agmine stant circum? quem non super aurea Iovæ  
Lux surgit? quem non radiis illustrat amicus?  
Ergo agè quî tibi justus erit cum Numine tanto  
Collatus mortalis homo? quî a crimine purus  
Quem peperit malè pura nurus? si scandimus orbes  
Ætherios, lunamq; Deo (quæ prima vagantes  
Occurrit stellas inter) componere mens est,  
Protinus hæc terris lucem obscurata negabit,  
Ipsa nec astriferæ coràm illo sidera spheræ  
Munda forent. Quî mundus homo; qui vermis? et ortus  
Semine ab humano qui verme abjectior imo est.

## CAP. XXVI

*Iobus Bildad sermone ironicè rejecto ostendit se æquè atque illum Dei potentiam sapientiamq; nosse, ut qui longè magnificentius deus differat, quam fecerat Bildadus.*

**H**Æc ille. Iratis cui lobus talia verbis  
Subjicit. Egregiè tu cassum robore opisq;  
Scilicet expertem juvisti, effœtaque morbo

Brachia



Brachia firmasti. Tu rectum scilicet unus.  
 Ante alios sapiens, homini (Bildade) ministras  
 Consilium stolido, reliquisque ignota recludis  
 Arcana, & late cœlorum oracula pandis.  
 At verò hæc cumam sophiæ documenta dedisti,  
 Cujus et egressa est anima ex te, iterumque revixit  
 Eloquiis monitisq; tuis? cœlestia parcis;  
 Quid mihi regna Dei narras et robora verbis?  
 Stelliferæ non ille domus tantum atria celsa  
 Temperat: en liquidis etiam quodcunque sub undis  
 Vitæ exors latitat; quodcunque et munere ibidem  
 Vitæ fruitur dextra pollente creavit.  
 Nuda patent cava busta Deo, nec Tartara fontum.  
 Devota exitio divini Numinis acres.  
 Effugiunt oculos, intentaque lumina fallunt.  
 Ille Aquilonari conversos cardine cœlos  
 In vacua extendit, terræque immobile mira  
 Arte super nihilum suspendit in aëre pondus.  
 Ille cavis pluvias in nubibus alligat undas,  
 Constrictasque tenet vinclis, ne nubila mole  
 Findantur, pectusq; effusis imbribus orbem  
 Diluvient, solii retinetque arctatq; patentem  
 Ille superficiem, pulchroque ut tegmine, passis.  
 Nubibus hinc illinc cœli per inania velat.  
 Ille vadis posuit fines et claustra marinis  
 Non peritura, diem Phæbus dum ducit Eoo;  
 Alternisq; polum condit nox atra tenebris.  
 Cœlorum sine more tremunt nutantq; columnæ  
 Increpitante Deo quassæque immanè stupefunt.  
 Ille unus vasti findit resonantia ponti  
 Equora vi dextræ; tollentemq; altius undas.  
 Oceanum nutu mulcet solerte, superbos



Imperio vinclisq; premens, et carcere fluctus.  
 Illius ætherios ornavit Spiritus orbes,  
 Extruxitq; Manus sinuosum marmoris anguem,  
 Et quæ marmoreo fert monstra sub æquore Pontus.  
 Ecce viarum hæc pauca Dei atq; extrema potentis  
 Indicia, hæc dîæ virtutis symbola, cuius  
 Ad nos vix tenuis famæ perlabitur aura.  
 Æterni quis mente Patris, penes omnia quem sunt,  
 Concipiat vires? quis fortis robora dextræ,  
 Nomenq;, ut tonitru quod totum personat orbem.

## CAP. XXVII.

*Iobus de fide et integritate sua, deque amicorum injuria paucis prefatus, ostendit hanc esse unam temerarii ipsorum judicii de se causam, quod afflictiones non ex utendi modo, sed ex numero et magnitudine messantur. Deinde hac data occasione agit speciatim de afflictionibus et pœnis impiorum, ne quod de eorum prosperitate dixerat, perpetuum se id statinere, falso existiment.*

**S**ic memorat, querulisq; ultra sermonibus ægrum  
 Permucere animum, fidosque expromere sensus  
 Progreditur. Cœli Numen quod secula degit  
 Æterna attestor; juris licet ille tuendi  
 Arma modumque mei mihi subtrahat, atq; misellum  
 Ærumnarum undis immergat pectus amaris,  
 Nil sceleris tamen ore meo, nil criminis iri  
 Prolatum, neque facta dolis mendacia linguam  
 Dicturam, hæc dum membra reget mea spiritus almo  
 Flamine, vitales dum carpam naribus auras.  
 Absit uti ventosa adeò et male sana loquentes  
 Iustificem, quæ magna volant, quæ impunè minantur  
 In fonti exitium, dum vivam, non erit unquam  
 Vanus ut ipse meam, causa illius, integritatem  
 Dissimulem verumq; negem, me fassus iniquum

Constanti



Constanti firmata gradu vestigia, legum  
 Præscriptas tenere vias semperque tenebunt,  
 Suscepto haud unquam flexura a tramite gressus  
 Nec mea me, ætherii dum velcar luminis aura,  
 Arguet admissi sceleris, labisq; probrosæ  
 Dedecore afficiet mens fraudis nescia corde.  
 Qui me aded hostili, ut facitis vos, inq; merentem  
 Persequitur; quicumque odiis me exercet acerbis,  
 Sons ille ante alios sit oportet et impius omnes.  
 Spes super ecqua homini, placitis qui obtendit opacam  
 Flagitiis nebulam, partisque incumbit avarus  
 Diuitiis, animam cum invito extraxerit ultrix  
 Vis Dei? in aduersis faciline exaudiet aure  
 Clamantem, flentemque Deus, pessumque ruentem?  
 Numquid is æterni, quem tempserat antea, Regis  
 Nomine se pascet, supplex et sedulus omni  
 Tempore te, Pater alme, haud cassa in vota vocabit?  
 Divinæ miranda manus, audite, docebo  
 Vos opera, arcanâque Dei quæ mente reposita  
 A seclis retegam. Verum hæc quando omnia longo  
 Cernitis ipsi vsu, quid sic vanescitis ore  
 Irrisi, et stolidam me adversus voce tonatis?  
 Ecce, repertores scelerum hæc divinitus omnes  
 Sors manet, hæcque ferent olim sibi certa tyranni  
 Præmia, delictis supremo à ludice tantis  
 Decreta. Innumerosi gnatorum agmine mensam  
 Cingat progenies, cunctos tamen occlusus ensis  
 Hauriet, et sævo demerget funere ferrum.  
 Si qui autem extincta maneant de gente nepotes,  
 Rancidulo ne pane quidem restantia, gnati,  
 Pignora crudelem satiabunt ventris orexin.  
 Quod si etiam acceptis pars cladibus ulla supersit,



Æthere vix calsi terræ infodientur amara  
 Nec numero, nec honore, peremptos morte nec ipsa  
 Deslebunt viduæ fælices funere tali.  
 Impius argenti cumulos si pulveris instar  
 Aggerat, et multo intextas sibi comparat auro  
 Innumeras vestes, fulgenti et murice picta  
 Stragula, quæ cœni vilescant more lutosi,  
 Has Deus et vestes, aulaeq; transferet omnia  
 Ad vitæ melioris herum, partasq; dolosis  
 Artibus argenti moles vir sanctior olim  
 Dividet, et fontum spoliis gaudebit opimis.  
 Ardua si qua sibi solidoque palatia saxo  
 Struxerit, æternùm quasi duratura, caducam  
 Illa casam referent tinea, vel qualia vili  
 Congesta è stipula custos umbracula condit.  
 Qui nuper locuples, pulchri qui nuper et ampli  
 Hæredi Dominus, mox nudus inopsq; jacebit;  
 Nemo illum excipiet, nemo miserefcet egeni;  
 Languentes huc orbus opis torquebit et illuc  
 Frustrâ oculos. Terrorum acies, velut unda, repente  
 Obruit incautum, mortemq; infesta minatur  
 Præsentem misero: cœca illum nocte per umbram,  
 Cuncta ubi dalcis habet terris animalia somnus,  
 Surripiet turbo, brumalisque impetus Euri  
 Sedibus ejiciet patriis. Fera spicula sævus  
 Mittit in adversum vindex, neq; parcat acuta.  
 Quærenti incassum fugiendo evadere tela,  
 Explodetque manu pereuntem, et sibila tollet.



## CAP. XXVIII.

*Iobus per comparationem humana sapientia cum divina, ostendit quā hāc prae illā admirabilis sit, et hominibus quantūvis sagacibus, rerum humanarum peritissimā impervestigabilis. Quod argumentū eo sine tractare videtur, ut declaret hanc esse alteram erroris amiserunt causam, quod cum ignorent occultam illam Dei sapientiam ita tamen de calamitatis suae causa disputent, ac si omnia Sapientia Dei arcana penitus nota atq; perspecta haberent.*

**A**bstusis lateat quamvis sub viscera terræ  
 Argentum venis, atq; auri fulva metalla,  
 Arte tamen solerti hominum comperta, fodinisq;  
 Eruta mortales dextrè recoquuntur in usus.  
 Ferrum etiam ex altis terræ penetralibus arte  
 Elicitur, formamq; æris lapis igne liquatus  
 Induit. horrendis quin et (res nota) tenebris  
 Impiger innatæ vel solo lumine mentis  
 Lucem infert mortalis homo, specuumque penetrat  
 Intima, et abductos atra caligine lethi  
 Altè vestigat lapides. Si fluminis alveo  
 Deserto, pulsifq; sua de sede colonis  
 Diluvio, in terras hac torrens amnis et illuc  
 Difluat haud pedibus vadentum pervius, haustas  
 Graviter immissis illò siphonibus undas  
 Deducunt alio artifices, siccantque latebras.  
 Terra est fœcundæ Cereris quæ lætâ supernè  
 Munera fert, fundoque eadem suffossa profundo  
 Sulphureum exhalat glomeratis nubibus ignem.  
 Inde sibi effodiuntq; operæ poliuntque nitentes  
 Saphiros, aurumque alto de pulvere tractum.  
 Non illò pertingit avis, non lumina milvi  
 Obtutu quamvis multum pollentia vivo.  
 Non ipsi hæc catuli loca calcavere ferarum,  
 Nec leo per cœcos fixit vestigia calles.



Mittit homo in cautes et saxa immania dextram,  
 Subvertitq; imo montes a stirpe revulsos.  
 Ille etiam excisa rivos & flumina rupe  
 Diffundit: cauto ille oculo pretiosa sub altis  
 Omnia cernit aquis, objecta et mole coercens  
 Torrentes fluvios, in apertam abscondita profert:  
 Suntque opera humani hæc non contemnenda cerebri.  
 At Patris ætherii mens et sapientia rerum  
 Cœlestum quibus è latebris, quibus obsecro, venis  
 Elicienda? ubi vitæ habitat Prudentia rectrix?  
 Illius immensum cognovit nemo valorem,  
 Nec certè his usq; superis reperitur in oris.  
 Non latet illa meis penetralibus, inquit Abyffus,  
 Nec mecum in liquidis errat sub gurgite regnis  
 Pontus ait, reboatq; auri non ulla repositi  
 Vis æquat Sophiæ pretium, neque pondera summa  
 Selecti argenti: non est pensanda metallis  
 Quæ tibi fundit Ophir. Sapphiri honor aureus illi  
 Cedit, Onyxque micans, et fulvæ copia massæ.  
 Non adamas, non aspra ex auro pocula mundo  
 Hanc rediment: nihil est quod pulchra corallia laudes,  
 Gemmasque; ipsa nihil quoque et huc collata patentis  
 Conchea bacca maris, Nilove allata smaragdus:  
 Deniq; ut hoc uno comprehendam singula verbo,  
 Illa vel obrizo longè est pretiosior auro.  
 Nunc agè, qui tanto præstatis acumine mentis,  
 Vnde cedò adveniat sapientia, ubi ve locorum  
 Vera suas posuit rerum prudentia sedes?  
 Illa sinu Patris latitans mortalia fallit  
 Lumina terrenis viventum in finibus; acres  
 Fallit et alituum visus per inane volantum.  
 Immo etiam tenuis vix famæ adlabitur aura

Illius



Illius ad nos, orcus aethumq; fateretur.  
 Vnus iter Sophiae Deus & vestigia sacrae  
 Humanis ignota animis, habitaculaq; novit  
 Aeterna. Ille unus, vastum qui condidit Orbem,  
 Orbis ad extremas circumfert lumina metas,  
 Cernet et astriferi quicquid sub vertice regni est.  
 Cum quondam aëriis aptaret pondera ventis,  
 Ne maria ac terras secum, coeliq; profundi  
 Tecta ferant rapidi: justis cum appenderit undas  
 Lancibus æquoreas, demensumque imbribus æquum  
 Poneret, à divo riguis quò pendeat humor  
 Imperio; cùm et fulminibus signaret apertum  
 Flammaramq; globis per coeli nubila callem;  
 Iam tum solus eam vidit, visamque probavit,  
 Illius ad pulchram conformans singula normam,  
 Sacrumque hoc homini documentum tradidit ore,  
 Corde timere Deum puro sapientia prima est,  
 Et vetitum fugisse malum Prudentia summa.

## CAP. XXIX.

*Iobus antea a vita prosperitatem exoptans, cum pluribus verbis describit, non nihil etiam de integritate sua atque innocentia intermiscens.*

**D**Ixerat. Et tristi sic orsum perficit ore.  
 O utinam in melius mutato Numine, menses  
 Præteritos, vitæque dies feliciter actæ  
 Rex superum referat mihi! cùm procul omnibus ipsum  
 Ille malis, procul ærumnis, sacra undique tectum  
 Ægide servaret, circum et frontemq; laresque,  
 Fœderis usque memor facti, splenderet alma  
 Lampade; quæque pedum ferrent vestigia plantæ,  
 Panderet optatum mediis mihi lumen in umbris.  
 Qualis eram viridante ævo, cùm remque domumq;



Ille meam aspiceret propius, blandoque foveret  
 Numinis afflatu præsens: cum ad iussa paratis  
 Undique stipabar gnatis, fidisque ministris,  
 Et circumfluitante pedes surasque lavarem  
 Butiro, pinguesque olei mihi funderet amnes  
 Ipsa silex, regno incolumi, cum denique regis  
 Os habitumque, gerens gradiren spectabilis urbe  
 Ad portam, dare jura meis ubi civibus æqua  
 Consuevam, aut solio plateæ per strata sederem.  
 Tum juvenum mihi turba genas suffusa rubore  
 Cedebant viso, vultusque et lumina veste  
 Condebant; tum decrepitos assurgere canos  
 Cernere erat, plantisque senes adstare sedenti  
 Sub tremulis. Tacita intenti tunc ora tenebant  
 Terrarum Domini, et digitis labra compescebant.  
 Quinetiam siccis Procerum vox muta potentum  
 Faucibus hærebat, suppresso & lingua palato.  
 Quæ me auris famamque mei super æthera noti  
 Nominis audierat, felicem terque quaterque  
 Dicebat. quique olim oculus moresque viasque  
 Viderat, insigni pietatem laude ferebat.  
 Quippe malis quoties pressos, durisque petentes  
 Calibus auxilium juvi? quot patribus orbos,  
 Vindice quot nullo defensos rebus in arētis  
 Asserui? extremis quoties servata periculis  
 Iamque aliter paritura manus mihi fausta precata est?  
 Conjugis amissi deflentem funera cari  
 Ad cantum quoties converso in gaudia luctu  
 Excivi viduam? speciosæ cycladis instar  
 Iustitia indutus gradiebar, et illa vicissim  
 Me cincta æternum divinæ laudis honorem  
 Conciliavit: amor juris mihi regia palla,



Et diadema sacrum. Miseris pro lumine cecis,  
 Pro pede sæpe fui claudis, pro patre catervæ  
 Exhausti census. Gnavoque examine litem  
 Scivi ipse ignotam. Fabricantum prava molares  
 Diffregi, tortasq; avidis è faucibus ultor  
 Eripui dextra furtorum vindice prædas.  
 His ego nequicquam confisus talia mecum  
 Infelix tacito volvebam pectore : felix  
 Extrema in proprio deponam flamina nido,  
 Et pelagi innumeras longæva æquabit arenas  
 Annorum series : radix mea, ut arboris oras  
 Fontis ad irriguas expositæ ; hæretq; supernè  
 Roscidus in ramis lætùm florentibus humor.  
 Quotidiè mihi crescit honos, nova gloria crescit,  
 In manibusque novas vires sibi sufficit arcus.  
 Flexanimo nuper cuncti dicentis ab ore  
 Pendebant taciti, atq; arrectis auribus haustum  
 Consilium grato laudabant murmure nostrum ;  
 Nec quisquam ex omni, quantus sit cunque, senatu  
 Excipere alternis potuit mea verba loquelis ;  
 Usque ad eò dulci ceu stillans plurima melle  
 Mulcebat placidis animos oratio dictis.  
 Quisq; mea, ut pluvias cunctantes hortus, hianti  
 Ore expectabant monita, et mihi guttura, ut ales  
 Ad vespertinam, pandebant arida, lympham.  
 Si ridere animus, lætamq; expôrgere frontem  
 Fors tulerat, missa paulum gravitate ; jocatum  
 Credebat nemo quasi tantum ad seria factum,  
 Nemo mei id popper turbabat lumina vultus.  
 Deniq; si quando mihi visum invisere amicos,  
 Sublimi ante alios quoscunque in sede locabar  
 Protinùs, et magni me regis more tenebam,



Qui circum armato stipatus milite turmas  
Erigit, et dictis moerentia pectora mulcet.

## CAP. XXX.

*Iobum ex comparatione pristina felicitatis sua praesente describit infelicitatem, contemp-  
tum et abjectionem, in qua immerenter apud omnes erat, maxime apud vilissimos  
quosque et abjectissimos.*

**T**alis eram regno dum stabam nuper avito  
Dives & incolumis, nunc fatis omnia postquam  
Et ruere in pejus cepta, et sublapſa referri,  
Mutata est rerum facies; jamque ecce minores  
Me natu juvenes patientem talia rident,  
Quorum ego vel patres pridem florentibus annis  
Servando pecori sprevissem admittere nostris  
Cum canibus: juvenum quid enim me fortia dextris  
Robora, quidve senum vitiis effœta senectus,  
(Queis etiam cano prudentia defuit ævo,)   
Iuvisset? loca senta situ, perq; auia mundi  
Lustra, meras inter tenebras, inopesque, famisq;  
Compressi rabie errabant, virgulta secundum  
Carpentes halimi salsa ex uligine stirpes,  
Iuniperique focis radicem imponere sueti,  
Quò caleant nudo gelidi sub vertice cœli,  
Aut rabida ingrato satient abdomina victu.  
Urbe, domo extorres, profugique, & noxia furum  
Turba velut, diris populi clamoribus acti  
Sedibus è patriis, torrentum in vallibus, inque  
Abstrusis terræ latebris saxisque labantes  
Vix habuere casas. Inter dumeta gregatim  
Vrticaſq; inter compuncti infueta rudebant  
Insulsum, stolidumque genus, sine nomine plebes,  
Quique



Quique mage immundo quem calcant, pulvere viles.  
 His ego nunc rerum tot post dispendia fio  
 Nænia, et appositus fœcunda ad pocula sermo.  
 Me vitant fugiuntque, odiis me quisque nefandis  
 Infaustum velut auspiciū execrantur, et ora  
 Projectâ haud puduit toties fœdare salivâ.  
 Nempe ex quo omnipotens nervum mihi solvit et arcum,  
 Afflixitque malis, mox omnis fræna pudoris  
 Excussi, haud ultrâ nostri formidine vultus  
 Tanguntur. Petulanti etiam per compita risu  
 Vix prima egressi teneræ cunabula vitæ  
 Ad dextram insurgunt pueri, raptimq; prehensum  
 Dejectumq; premunt pedibus; per tergaq; tritum  
 Perniciëi mea culcat iter lasciva juvenus.  
 Nec satis. Occluduntq; vias, atq; omnia latè,  
 Nequâ iter, effugiumque foret mihi, claustra locorum  
 Obsidunt, duplicantque malis mala, cladibus ægrè  
 Exhaustisque novas addunt, jam jamque cadentem  
 Vi summa impellunt; nec habent, quo talia patrent,  
 Adjutore opus; avulsa ceu sepe, ruentes  
 Quâ data porta ruunt turmatim, eversaque læti  
 Per loca se æquorei devolvunt gurgitis instar.  
 Undique terrorum facies, gravis undique summi  
 Imminet exitii metus, et magis omnibus unam  
 Dilectam mihi sævâ animam formidine terret,  
 Insequiturq;, ater turbo velut, omnia flabris  
 Involvens; vitæq; salus jam pristina fugit,  
 Ceu nubes celeri quæ pulsa evanuit Euro.  
 Ergo malis tot victa, in meq; effusa liquefcit  
 Vis animæ, æumnæque dies maioribus instant  
 Passibus, & de nocte, queis cùm blanda relaxat  
 Corda hominum, curasque fugat, jam tum dolor ingens



Æstuat, et teneras ossa intima ad usque medullas  
 Pertundit; plusq; æquo agitata arteria febris  
 Ægra per immensum grassanti viscera, pulsus  
 Urget inequales. Quin morbi et tanta subinde  
 In miserum sævit rabies, ut plurima tetrus  
 Ulceribus manans sanies turparit amictus,  
 Ingenuum immutans maculoso sanguine lumen:  
 Ac veluti angusto collum constringitur ore  
 Lucertum tunicæ, sic me Deus undique cinctum  
 Comprimit. In cœnum projectus membra lutosum,  
 Pulveris immundi cinerisq; ego sordibus atris  
 Assimilor. Quodque his gravius, quas suffero, plagis,  
 Ad te vociferor toties, sanctissime; castis  
 Cum precibus, Pater, et dura tamen aure vocantem  
 Negligis, utque adstem supplex, a supplice flectis  
 Lumina. Crudelis mihi jam tu factus acerba  
 In me odia exerces divinæ et robora dextræ;  
 Sublatumque levi veluti per inania gyro,  
 Ventoque impositum rapis, & compage soluta  
 Nervorum, effetisque relaxas viribus artus.  
 Imminet, experior, vitæ suprema caducæ  
 Hora mihi, jam jamque horrendi ad tecta sepulchri.  
 Omnibus, ætherias qui in terris carpimus auras,  
 Invisenda, vocor: dextram non mittit Iova  
 In tumultum, ad vitæ ut, defunctos luce reducat  
 Lumina, in adversis quanquam fractisq; vocarint  
 Rebus opem cœli submisso pectore quondam.  
 Pauperis afflictas non res ego, mæstaq; luxi  
 Funera? non duris miserorum in casibus altum  
 Ingemui largis humectans fletibus ora?  
 At læta interea speranti tristitia quæq;  
 Obveniunt, lucetq; excors dum præstolor almas,  
 Improvisa



Improvisa nigris subito nox advolat alis.  
 Hei mihi ! continuis jamdudum viscera flammis  
 Torrentur, requiemque negat vis actior omnem.  
 Prævenit me læva dies exercita duris  
 Fatorum eventis, aterque, haud ætheris æstu  
 Haud Phœbi nimis velut ignibus ora perustus  
 Ambulo, et exhaustum plagis circumfero corpus.  
 Ecce etiam in medio lamenta incondita cætu  
 Edo miser, raucusque ferit vaga sidera clamor,  
 Qualem per Lybyæ fundunt deserta dracones,  
 Aut quantos ululæ malè amico gutture pulli  
 Congeminant questus, posuit cutis atra colorem  
 Nativum, morbi que ardor cava torruit ossa.  
 Ipsa quoque in lessum cithara et lachrimabile murmur  
 Nunc abit, illatosq; gemunt mea nabilia casus.

## CAP. XXXI.

*Iobius antea vite sue velut catalogum contexens, integritatem, innocentiamq; suam copiose exponit, singula fere percurrrens utriusque tabula legis mandata et officia, quæ studiosè à se esse præstita divinis atque imprecationibus confirmat; et quidem eo fine, ut et calamitatis suæ indignitatem exaggeret, et amicorum criminationes aperte refellat.*

**A**ttamen immunis scelerum neq; conscia fraudis  
 Mens cum oculis castum, testor, mea fœdus inirat,  
 Turpia ne videant, ne lustrent prava. Cupitæ  
 Quid namque impuro spectassem lumine vultum  
 Virginis? à summo quæ ludice præmia machis  
 Debita, quæ fontes maneat fors novimus; ingens  
 Scilicet exitium stygiisq; horrenda caminis  
 Supplicia infami cœlis devota catervæ.  
 Ecce autem vigili qui conspicit omnia ocello,  
 Non vitæ videt ille meæ callemque, viasq;



Comprenditque pedum numero vestigia certo :  
 Si mundi illecebris mens vanis capta recessit  
 Tramite de recto, si festinavit ad artes  
 Planta malas, vetitamque viam pede pressit avaro;  
 Me Deus æqualis appensum examinet, oro,  
 Lancibus, atq; expers quàm sit mea crimine vita  
 Condiscat. De calle vagus per devia si pes  
 Deflexit; si vana oculi simulachra secutus  
 Est animus, donisque manus, vel sanguine dextra  
 Deturpata fuit; quos en consecvimus agros  
 Advena possessor teneat, sataque omnia prædo  
 Devoret et segetesque evulsæ ac gramina ab ima  
 Radice æternum pereant. Si Fœmina pectus  
 Illicito malè casta meum pellexit amore,  
 Si laqueos, si rete vater pro limine amici  
 Disposui; molat ipsa aliis mea, fœdere rupto,  
 Cara tori consors, prostetq; ut nobile scortum.  
 Grande hoc namque nefas foret, et plectenda severo  
 Iudicio improbitas, quæ me velut ignis ab alto  
 Missus, ad interitum mox consumpsisset, agrorumq;  
 Eradicasset proventum funditus omnem.  
 En famuli si quando mei, si jura ministri,  
 Ancillæve, ubi lis mecum incidit ulla, superbus  
 Despexi : quid namque in jus si vaderet unà  
 Omnipotens, facerem ? quid ve illius ante tribunal,  
 Si vitæ discat quæsitæ gesta, referrem ?  
 Qui me utero finxit, nonne idem finxit & illum  
 Extruxitque ambos vitali semine in alvo ?  
 • Anxia si tenuis frustravi vota popelli,  
 • Et conversa in me viduarum lumina durus  
 Confeci, aut solus congesta opsonia cellis  
 Absumpsi, haud orbo decisa hinc parte puello;



(Hic quippe à teneris, cœu patris in ædibus, annis  
 Accrevit mecum; viduæque ego egentis ab ipsa  
 Dux matrice fui superas vix missus in oras.)  
 Si quem inopem, nudumque acris per frigora brumæ  
 Adspexi pereuntem oculis immitibus asper,  
 Nec super injectâ defendi a frigore veste;  
 Ni renes lumbique mihi sunt fausta precati  
 Nudorum, multo pecoris qui vellere nostri  
 Incaluere. Manus si quando parentibus orbum  
 Oppressit mea iudicis quod habere paratos  
 Me scirem in portis, vitæ, actorumque patronos;  
 E lumbo scapula ipsa humero mihi decidat ultro,  
 Luxaque fractis solvantur brachia nodis.  
 Exitium mihi namque et inevitabile dextræ  
 Diuinæ telum, stolidæ quo crimina gentis  
 Castigat Deus, ingenti fuit usque pavori.  
 Si quam ego fulgenti posui spem vanus in auro,  
 Dixique obrizæ, mea tu fiducia, massæ.  
 Si fortè in cumulos adeo crescentibus altos  
 Divitiis nimium mens est lætata caducis,  
 Incubui que opibus fallaci pollice partis:  
 Si rosei aspectus solis, si splendida lunæ  
 Cornua cingentis cœli convexa negatum  
 Lege Dei ad cultum me clàm illexere; pudenda  
 Siqua os, siqua manus dedit oscula, pignus honoris  
 Idolo exhibiti; certè hoc capitale fuisset  
 Flagitium, et rigida damnandum ludicis urna,  
 Quod Dominum qui templa poli colit alta, negassem  
 O foris si clade mei, si casibus unquam  
 Exultavi animo rebus lætatus acerbis:  
 Quando oris ne plectra quidem sum passus in hostem  
 Peccare, adversæve animæ non fanda precari.



Lassa philoxeniae si turba domestica nostrae  
 Sæpius officiis non dixerit, ec quod edendi  
 Tempus erit, vacuum satient quo opsonia ventrem?  
 (Non ego namque foris gelidi sub fornice cœli  
 Sustinui in nudo peregrinum pulvere noctem  
 Transigere: atq; meæ patuerunt ostia villæ  
 Omnibus hæc nostras juxta tendentibus ædes.)  
 Turpia præteritæ si quando ego crimina vitæ  
 Gentis hypocriticæ celavi more, sinuque  
 Impius ocului delicta latentia cœco,  
 Dispeream. Quod gessi olim nomenque decusq;  
 (Nota cano) multisterrorem millibus & si  
 Inferret, minimum nihilominus ipse verebar  
 De plebe offendisse, intentusq; ora tenebam,  
 Præque metu gressum privato haud limine movi.  
 O si me facili ludex bonus audiat aure!  
 Hic mihi quippe scopus, justæ hæc est meta querelæ,  
 Vt Deus alloquiis responset mutua nostris,  
 Atque afficta mihi fido notet omnia libro  
 Actor, eum nisi gestem humeris, ut cara solemus,  
 Sublimem, cidarisque instat cava tempora circum  
 Annectam capiti; gestæ nisi singula vitæ  
 Sponte Deo recitem vestigia, primus et ipse  
 Iudicis ad solium fidenti pectore vadam,  
 Iure reus peragar, si denique ut omnia paucis  
 Complectar, meus inclamat me fundus, et arvi  
 Flent porcæ; si fructum, operis mercede negatâ,  
 Absumpsi, aut dominos, justosque, ut prædo, colonos  
 Enecui; infœcunda seges latè horreat alpis  
 Triticeo pro farre rubis, surgatque vice hordei  
 Infelix lolium, & steriles dominantur avenæ.  
 Sic ait, et presso finem dedit ore loquendi.



## CAP. XXXII.

*Elius partim lobo, partim etiam Amicis graviter succensens, quòd utrinq; peccari videret, loquendi occasionem sibi jam silentio illorum oblatam arripit, et ab excusatione orsus exponit fusius tum disputationis modum et formam, qua est usurus, tum habenda orationis necessitatem.*

**T**VM demum focii tres lobi, Eliphazque, Sopharque, Bildadusq; Suhita, labris ad talia clausis.  
 Desivere loqui, nil quicquam tendere contrâ  
 Dignati, quòd nempe suo iustissimus ille  
 Iudicio sibi semper, & expers criminis esset.  
 Hoc Elius Buzita genus, Baracheleq; patre  
 Natus, Arameæ claro de sanguine gentis.  
 Non tulit, irarumq; omnes effudit habenas.  
 In lobum primò, quia se præ Numine summo  
 Asserere haud dubitet iustumq; & labis inanem.  
 Nec minus in ternos etiam lobi inde sodales  
 Insurgit flammato animo, tam turpiter ausos  
 Condemnare virum, quem ceu ratione carentes  
 Hactenus haud ullo rationum pondere possent  
 Vincere, & appositis memorata refellere verbis.  
 Ille diu tacitusq; lobum, si plura dictis  
 Fors paret addere, tresque itidem expectarat amicos,  
 Omnibus inferior natu quòd is esset et usu;  
 At tribus ut nullum vidit superesse (tacente  
 Iam lobo) sociis responsum, has pectore voces.  
 Edidit irarum flagranti percitus æstu.  
 Quum grandes senio, cani quum sitis ab annis,  
 Ipse autem iuvenis, tacui, linguamq; repressi  
 Hactenus, offensæ veritus depromere mentis.  
 Sensa meæ coràm senibus: dixiq; loquantur  
 Annosi, quos longa dies, quos cana senectus  
 Et sapere & dignas docuit proferre loquelas.

[Nunc



Nunc sedenim exerior nil mentis acumina posse  
 In nobis, nihil ingenium sine Numine Patris  
 Ætherii, qui corda movet, qui flamine sacro  
 Dat sapere. Haud semper qui clari nomine, rectis  
 Consiliis pollent; nec cani ætate, quod æquum est  
 Sat sapiunt. Nonnulla igitur me audite loquentem;  
 Et notos liceat mihi tandem exponere sensus,  
 Quando habitis dudum iam tot sermonibus, ipse  
 Temporis impendi tantum, & quæsitæ labore  
 Hinc inde arrectis rationum auctaria cepi  
 Auribus. Ecce autem cunctis examine pensis  
 Æquato, in miserum quæ declamastis amicum,  
 Iudice me, vestrum nemo est qui criminis illum  
 Arguat appositè, nemo, qui mutua lobo  
 Pro re verba ferat. Nihil est, mihi credite, linguâ  
 Ista quod insultanti adeò iactetis in auras,  
 Nos veram attigimus sophiam, primamque malorum  
 Tantorum labem: magni Deus arbiter orbis,  
 Non homo sic meritum telis cœlestibus illum  
 Insequitur pravæ commissa ob crimina vitæ.  
 Ille quidem adversus me iratæ haud spicula linguæ  
 Distrinxit, fateor, neque item vestigia vestri  
 Conflictus malè tuta sequar, prædicta subire  
 Dum lamenta paro. Iam tum formidine mira  
 Attoniti pressis omnes mutescere labris,  
 Nec quidquam fari ulterius, quasi voce loquaces  
 Destituente. Diu patiens, frustra que moratus  
 Conticui, opperiens doctæ responsa coronæ.  
 Cuncti autem perculsi animos, victiq; pudore  
 Stant muti, nihil adversus iam dicta valentes  
 Hiscere, dicam igitur iam tandem pauca virili  
 Pro parte, atq; animi quæ sit sententia pandam



Cor mihi per multo gravidam sermone coarctat  
 Spiritus, effervetq; mero ceu plena recenti  
 Cupa, novive utres, quorum ni clausa relaxes  
 Spiramenta, brevi effuso vinaria musto  
 Cella natet. Loquar ergo, datur dum copia, mentem  
 Quo paulum recreer, meditataq; pectore dudum  
 Pregnanti effundam, ac labris effabor apertis  
 Quæ latuere diu compresso cordis in antro.  
 Nullius ad nutum componam verba, sed ore  
 Vera pio referam; nulli pellacia vano.  
 Palponum ritu affingam cognomina: veras  
 Immutare tremo voces, ne me illicet instar  
 Turbinis abripiat patrantem talia FACTOR.

## CAP. XXXIII.

*Elius à præfatione incipiens, quadam Iobi dicta repetit, eaq; minus dextrè interpreta-  
 tus pluribus refellit. Deniq; verò ipsum vel ad respondendum, si quid habeat, vel ad  
 assentè audiendum quod præterea dicturus sit, invitat.*

**E**Rgo agedum placidis sermones auribus hauri  
 lobe meos, capiasq; animo dicenda sereno.  
 Præmeditata diu, et quasi prægustata palato  
 Expediam, mentiq; adeò sententia quæ sit  
 Non dubiæ, eloquiis sincero pectore fusis  
 Exponam: fraus nulla labris, fallacia verbis  
 Nulla meis. Quin & mortali urgeris ab hoste  
 Mortalis. Divina Patris, qui temperat orbem,  
 Dextra eadem me teque, ut nosti, effinxit, & auras  
 Ætherias idem divi dedit halitus oris.  
 Quare agè, verborum me contra aciem instrue, siquid  
 Responsi superat, coramque in prælia prodi.  
 Tecum ego nunc paribus vice summi & nomine Iovæ

M

Congrediar



Congrediar telis; sum massa etiam ipse lutosa  
 Decilus. Non ulla mei vis acrior oris  
 Terrorem incutiet: nec te super ardua duro  
 Pondere dextra cadet. Verùm quid pluribus usus?  
 Auribus ipse meis tales cum murmure voces  
 Iactantem audiui: sceleris sum purus, & expers  
 Flagitii, sum mente pius, neque pectore labes  
 Vlla meo; irrumpt tamen ille, ansamque requirit  
 Quà fontemq; hostemque velut me conterat. Arcto  
 Ille pedes cippo Vindex inclusit, & omnes  
 Intentis oculis, quà quà vestigia flecto,  
 Observat gressus. Sedenim ut tibi paucula reddam,  
 Quis justum te, Iove, pium quis censeat istis  
 Vocibus utentem? nescis mortalibus unum  
 Omnibus immortalem Orbis præstare Parentem?  
 Tantane te generis tenuit fiducia vani,  
 Cœlicolũm ut magno demens contendere Regi  
 Non dubites? cui namque suæ Deus omnia mentis  
 Consilia, arcanasq; vias, & facta revelat?  
 Multa semelque, iterumque monet, loquiturque subinde,  
 Nec tamen ad divæ repetita oracula vocis  
 Advertunt homines animum. Per somnia fessos  
 Cum fovet alta quies; per noctis spectra grauat  
 Cum somno in thalamis posuerunt mollibus artus,  
 Tum surdam retegat miseris mortalibus aurem,  
 Castigatque malos, et pravis debita factis  
 Supplicia obsignans, decretas imprimit altis  
 Mentibus ærumnas; ut sancto corda dolore  
 Compuncti, salebras vitiosæ et devia vitæ  
 Ocyus evitent, animique elata superbi  
 Flamina compescant; ne fortè aut peste perempti  
 Mergantur foveis, aut sævo viscera ferro

Trajecti pereant. Quòd si nil proficit istis  
 Omnipotens monitis; tum morbo protinùs ægrum  
 Increpat immisso, tristique affixa cubili  
 Membra dolorificis pertentat & ossa flagellis  
 Intima. Tum panem stomachus fastidit orexi  
 Dejecta, & tetrico bellaria respuit ore.  
 Inde caro ex oculis macie confecta suprema  
 Deficit, & non visa priùs, jam corpore toto  
 Ossa extant; moxque ad tumulum, lethalis & umbræ  
 Regnum anima appropinquat. Verum si nuncius adsit  
 Interpretæ Dei multis è millibus unus,  
 Qui vera ægroto juris sacraria pandat,  
 Rectamque erranti non vano hortamine monstret  
 Ad meliora viam: Deus & miserebitur ægri  
 Illicet, & redimi, subeat ne triste sepulchrum,  
 Mandabit; dicetque, satis pro crimine factum est  
 Iam mihi, cõmissique lytrum, gratumque piamentum  
 Inveni sceleris. Tali recreata redibit  
 Voce caro, priscusque vigor, viresque tenellis  
 Quales in pueris, quales juvenilibus annis.  
 Ille Deum supplex orat, sacrisque litatis  
 Conciliat: Deus illum audit, mentemque recenti  
 Lætitia exhilarat, vultusque dat alma videre  
 Lumina, tecta prius, meritoque aversa scelestis  
 Omnibus. Haud fictis deflenti crimina guttis  
 Iustitiam reddit, sanctæq; exordia vitæ.  
 Ergo ubi convaluit, sævis quasi faucibus Orci  
 Erutus, extemplò socios adit, atq; salutis  
 Rite memor, magnaq; hominum spectantecaterva,  
 Peccavi, inclamat, fasque omne & jura sacrarum  
 Perverti legum, nec mihi mea profuit unquam  
 Improbilas. At enim iam factus mitior, Orco



Me Deus asseruit, iussitq; potirier alnum  
 Lumen ab integro. Bis terq; hæc omnia præstat  
 Pro solita bonitate Deus, sicq; arguit acti  
 Mortalem sceleris, rursus ut bonus eruat ima  
 E fovea miserum, terreniq; Orbis amico  
 Lumine, mærorum post tristia nubila donet.  
 Nunc agedum missis, quibus æthera questibus imple,  
 Respice ad hæc, res est non parva, audique, fileque,  
 Et loquar. Interea siquid tibi suppetit ore  
 Dicendum, eloquere, & nostris agè mutua dictis  
 Redde metu posito. Te justificare lubenter  
 Ipse velim, causamq; pii tutarier æquam:  
 Sin minus: aure meam facili quæso accipe mentem.  
 Ore favens, sophiæ te veræ arcana docebo.

## CAP. XXXIIII.

*Elius post præfationem summa plenam gravitatis, repetit accusationis sua capita, eaq; refutat à iustitia & operibus Dei, unicuiq; secundum opera reddentis. Deinde præmissa ad resipiscentiam hortatione, petit à Deo ut panis Iobus edoculus, rectius de ipso et sentire in posterum et loqui discat.*

**H**æc ubi dicta, Elius, verso sermone coronam  
 Ad circumstantem, vos ô, qui pectora, rerum  
 Gnara, inquit, geritis, faciles audite loquentem,  
 Quæq; habeo dicenda animis advertite vestris.  
 Auris namque probat verba & dijudicat, escam  
 Qualiter oblatam sapit exploratque palatum.  
 Ergo agedum chari, nos inter agamus amici  
 Ex æquo, et iusta pendentes omnia lance,  
 Quid legi conforme, bonum quid fasq; sciamus.  
 Nam Iobum has memini nuper fudisse loquelas,  
 Sum pius, immunisq; doli, sum iustus, & expers  
 Criminis; & nil iura minus mihi debita cœlum

Abnegat.

Abnegat, infandis adeò dum cladibus ægrum  
 Obruit. In causam ipse meam quid mentiar ore  
 Falsiloquo? tela aspra Deus plagasque nocentes  
 Innocuo inflixit tergo, et sine crimine plector.  
 Hæc ille. Et quisquam toto reperitur in Orbe  
 Terrarum lobo similis, qui vana propinat  
 Verba suis, & ad instar aquæ ludibria vulgi  
 Haurit iners, quique et comitem se jungit iniquis,  
 Et vetitum sectatur iter gressusq; malorum,  
 Prolatisq; amens horrendum hoc insuper addit;  
 Fixa quid in Domini pressis vestigia signis  
 Me posuisse juvat sacra per compendia divi  
 Tramitis? O Legum gnari, cordataque turba,  
 Qui rerum æquata libratís pondera lance,  
 His nonnulla super placidi me audite ferentem.  
 Absit ut omnipotens, qui nutu sceptrá gubernat  
 Terræque, tractusq; maris, cœliq; profundi,  
 Quamlibet exiguæ temeretur crimine labis,  
 Aut minus ex æquo quid perpetrasse putetur.  
 Ille suum reddit cuique, et sine fraude rependit  
 Præmia; quæque homines animo sectantur hiantes,  
 Illa ferunt, tribuente Deo, qui legibus æquis  
 Omnia, nec temerè quidquam cœlove, solove  
 Exequitur, nedum ut sancti jus inque merentis  
 Pervertat. Quis eum, cœli cui sidera parent  
 Angeliciq; Chori, terræ præfecerit Orbi?  
 Quis, cedò, vasti alius jecit fundamina mundi,  
 Constructamq; suo unius molem ore gubernat?  
 Si Deus intentis adeò exploraret ocellis  
 Corda hominum, ut poscis, penitusq; adverteret ora,  
 Protinùs hinc alio revocatâ flaminis aurâ  
 Vitalis, cuncti expirent, in humumq; revertant.



Corpora. Siquid habes mentis sanæ, ista benignis  
 Auribus hauri, animoque, haud sunt temnenda, reponē.  
 Numquid is imperium terræ mereatur & Axis,  
 Cui fas exosum, cui jus, quibus æqua Regentum  
 Fulta stat in populos subiectaque regna potestas?  
 Numve iniustitiæ damnabit homunculus ipsum  
 Iustitiæ Authorem? num regi dicere quamvis  
 Terreno, ô Nequam! num prisco stemmate claris  
 O pravi! liceat? Domino qui criminis ergo  
 Affingi invidiam par sit, qui cuncta coercet  
 Pollenti imperio? non ille excelsa potentum  
 Suspicit ora Ducum: pariterque opulentus, inopsq;  
 Illi agitur nullo semper discrimine, cunctos  
 Vt qui una de massa homines formavit, eisque  
 Humanæ indulget ceu visum est commoda vitæ.  
 Momento intereunt, unaque heu nocte moventur  
 Sedibus ingentes populi. Sine viribus ecce  
 Corruit humanis folioq; Tyrannus avito  
 Vi cœli eiicitur, mora nulla, nec ista tenore  
 Aut certa ratione carent. Circumspicit omnes  
 Quippe vias hominum Deus, & vestigia mente  
 Observat vigili. Scelerum fabricator opacas  
 Captat, & incassum latebras cœlestia lovæ  
 Lumina non tenebræ, non mortis imagine cœca  
 Infames fugiunt umbræ: neq; durius ille  
 Asperiusq; imponet onus quam facta reposcant  
 Peccantum, ut merito nimium quis jure rigorem  
 Exprobrare Deo possit, litemq; movere.  
 Hinc nulla præeunte, homini, quæ cognita, causæ  
 Cognitione, alios opibusque & honore potentes  
 Conterit, immundoque alios è pulvere sumptos  
 Sublimi locat in folio; sicque ille nocentum



Facta recognoscit, spectandaque prodit in auras.  
 Quin ipsis etiam tenebris, quibus ante latebant  
 In lucem versis, miseros castigat amaris  
 Suppliciis, magnoque hominum persape theatro,  
 Ut meruere dolis, collisos perdit ad unum,  
 Scilicet æterni quod cultu Numinis omni  
 Abiecto, sacra iura Dei sprevere rebelles;  
 Signatasque vias, & summi iussa Magistri.  
 Præmia tantorum scelerum manus impia tandem  
 Hæc habet; oppressæ per eos ad fidera turbæ  
 Clamor it, & crebris pulsat mugitibus aures  
 Ætherii Patris, qui vocem & vota gementum  
 Exaudit. Quis, pacem illo donante, tumultum  
 Inferat, & tristi permisceat omnia bello?  
 Sin placida infensus vitiis averterit ora,  
 Quæ gens, quisve hominum mortali semine cretus  
 Placata aspiciet? vitæ ille & mortis in omnes  
 Ius habet, & pro jure vetat ne turba nocentum  
 Gaudeat imperio, aut laqueis simulator iniquis  
 Constringat populum. Nunc ergo lite remota,  
 Offensum sic lobe para mollire Parentem;  
 Dura quidem sed iusta fero: non amplius amens  
 Vincula disrumpam; tu me, quæ scire necesse est,  
 Quæq; latent, Pater alme, doce: si ob crimina pœnis  
 Tot mulctor, vitæ doleo commissa, nec ultrà  
 Peccare est animus: sic te, sic farier æquum est.  
 Arbitrione tuo fontes ad digna reposcat  
 Supplicia Omnipotens? tuve aversabere, magnus  
 Quæ mundi Dominus de te olim sancit æquo  
 Iudicio? pœnis ne modum finemque statutis  
 Præscribes? egon' ista probem? Si suppetit ore  
 Responsum, eloquere. At rerum legumque peritus;



Sat scio, quique sapit, pleno omnibus annuet ore  
 Auditis, mecumque feret te, lobe, loquutum  
 Inscitè, et sine mente sonos sparsisse dolentes.  
 O Pater, ô cæli Genitor, communia propter  
 Cum pravis responsa lobum lustraminis asprî  
 Subiicias flammis, oro, resipiscere donec  
 Condiscat, tumidum & superatâ mente remittat  
 Flatum animi : namque ille scelus sceleri adiicit altum  
 In cumulum, plauditque manu nos inter, et ore  
 Plurima vafano in Domminum dicteria jactat.

## CAP. XXXV.

*Pergit Elius absurda quedam ex Iobi dictis perperam collecta refellere, argumentis à summa Dei maiestate deductis ; ntpote cui nemo neque iustitiâ prodesse, neque iniustitiâ obesse possit : atq; hinc ansam sibi arripit hortandi lobum, ut jam rectius iudicet, et in Deum speret.*

**T**Alia perstabat memorans, sicque insuper idem  
 Progreditur. Ratione putas constare loquelam,  
 Quâ miser ætherio te fers mage Numine justum,  
 Dicisque, integritas quid vitæ profuit actæ ?  
 Quidve lucri hinc capio, scelerum præ labe ? querenti  
 Hæcego jam paucis placidum tibi, lobe, tuisq;  
 Responsum expediam sociis. Cœli aspice molem,  
 Aspice sublimi suspensas æthere nubes,  
 Præq; ima quantum tellure ea machina, disce,  
 Promineat, quantumque Deus qui celsior illa est ?  
 Si pecces, quæ tu inde Deo dispendia summo  
 Attuleris ? si multiplici fœcunda stolone  
 Crimina frondescant, quid ei tamen illa, quid orbis  
 Rectori officiant ? sin contra iustus et expers  
 Flagitii fueris, tua quid pietasq; fidesq;  
 Contulerit lucri Domino ? quid ceperit ille

De manibus, te dante, tuis? mortalibus ægris,  
 Tu qualis, nocet impietas, iisdemque vicissim,  
 Non Domino, prodesse solet mens conscia recti,  
 Quæque agili Altrææ sequitur vestigia planta,  
 Sæpe quidem tenues clamant sub fasce superbi  
 Imperii, vocemq; ob duri infesta Tyranni  
 Brachia commistis tollunt ad sidera crebris  
 Lamentis, gemituque & fœmineo ululatu;  
 Nemo sed in tanto rerum discrimine, dicit,  
 Conditur ô ubi Iova, meus, qui carmina noctu  
 Psallere dat, vultusque sui fulgore tenebras  
 Irradiat, læto permutans tristia cantu;  
 Qui nos præque feris agri, præque aëris alti  
 Alitibus sapere edocuit, rerumque latentes  
 Nosse vias, causasque? atroci idcirco potentum  
 Attriti fastu clamant, geminantque per auras  
 Murmura flebilis, at facilem plangentibus aurem  
 Iure negat Dominus; nec enim malè sana dolosi  
 Vota precesque hominis, dura aut lamenta patienti  
 Aure trahit, neque damna nepoti illata moratur  
 Omnipotens. Quantò ergo minus te exaudiet, ore  
 Dicentem impuro, tibi nusquam occurrere, nusquam  
 Certa satis divæ ac moderantis singula mentis  
 Spectari in terris vestigia. Talibus eja  
 Iam missis, te ritè, tuasq; examine coràm  
 Pende vias justo, culpamque; ac ludicis iras  
 Supplicibus supera votis, Dominumque tenacem  
 Promissi expecta. Nihil est præ crimine poena,  
 Nil præ flagitiis tot, plaga inflicta merenti  
 Numine ab irato nuper tibi; multa; vitæ  
 Dissimulat delicta tuæ, mecum ergo sodales  
 Dicite vaniloquis fundit temeraria labris  
 Iobus, & infandas cumulat sine mente querelas.



## CAP. XXXVI.

*Elms adhibita rursus gravi profectione, summam Dei suetur potentiam, bonitatem, iustitiam & misericordiam, ut quas Iobus deterere visus erat suis querimoniis. Sermone vero ad Iobum accommodat, ut tandem comparatione sua iustitia & infirmitas cum infinita Dei notitia & potentia, sese illi totum submittere discat, & misericordiam illius quam humillimè implorare.*

**H**Æc fatus, placido susceptum ita perficit ore  
 Sermone. Expecta paulum, & me recta monentē  
 Hortantemque audi, quo rem tibi apertius omnem  
 Sedulus exponam; mihi enim non pauca tuendæ  
 Iustitiæ, causæq; Dei dicenda supersunt.  
 Cuncta autem primâ repetens ab origine pandam  
 Quæ dudum comperta habeo; sanctiq; Parentis  
 Expediam rata jura mei. Mendacia nulla,  
 Nullus erit verbis fucus, pigmentave docto  
 Peniculo falsum celantia: cordis & oris  
 Integri affectum sermo testabitur omnis  
 Certantis tecum ætherio pro Rege sodalis.  
 En Deus immensis sit quamvis viribus unus;  
 Unus & invicta virtute & robore cordis  
 Polleat, haud quenquam generis de stirpe caduca:  
 Despicit humani; sed nexibus undique feedis  
 Peccati implicitos; vitiorum & pondere segnes.  
 Non longum patitur vitæ luce potiri.  
 Pauperis e contra jus afflictæq; catervæ  
 Afferit; innocuo nec vultus lumina amici  
 Subtrahit à cœtu. Tales cum regibus alto  
 Collocat in solio, summumq; ad culmen honoris.  
 Ejectos umbone regit per secula divo,  
 Nequis eos, patria quos visum attollere dextra,  
 Deiciat. Quod si arcta liget vestigia compes,



Si gravibus fuerint tetro sub carcere stricti  
 Funibus, antea tunc gesta latentia vitæ  
 Obiicit ante oculos, admissaque crimina monstrat  
 Invaluisse mora: surdis dum vellicat aurem  
 Recta monens, sua detque obliquo absistere fraudum  
 Tramite. Si dictis parent, si iussa Tonantis  
 Corde pio faciunt; mox verso in gaudia luctu,  
 Longævam peragunt nullo discrimine vitam:  
 Sin minus; in gladios, & morti tela parata  
 Ut meruere, ruent; sophiæq; & mentis egentes  
 Auferet incautos subiti inclementia lethi.  
 Qui namque infandis fallaci pectore fucum  
 Inducunt vitiis, & crimina noxia juris  
 Obtentu velant, immanem Numinis iram  
 Offensi cumulant: nec enim cum funibus illos  
 Constringit Deus, exclamant, veniamq; per auras  
 Exquirunt. Teneræ idcirco sub flore juventæ  
 Infames inter pueros, mollesque cinædos  
 Effundent animas, æternâ & lumina nocte  
 Claudentur. Vice versa inopi, fractoq; salutem  
 Quam petit, axe Deus mittit, atq; aure prehensum  
 Admonet officii, lato solamine curas  
 Mœroresq; levans, & duræ incommoda vitæ.  
 Quinetiam haud ficto si flêsses crimina corde,  
 Te velut è salebris & diri faucibus orci  
 In latam planamq; viam duxisset, & alta  
 Pace lares, mensam dapibusq; beasset opimis.  
 At vero anfractus sontum ut legis, impia gentis  
 Iudicia infidæ laudans, sic ritè teneris  
 Iudicio sontum, remanetque immota, severus  
 Quam de te statuit Iudex sententia. Flagrans  
 Æstuat ira Dei: cave, ô cave lōbe, flagellis



Ne te ille obtritum petimat. Non gaza, nec ingens  
 Vis auri merita dabit unquam à morte redemptum.  
 Num cumulos spectabit opum? num splendida gentis  
 Stemmata? non fulvum, cui parent cuncta, metallum  
 Igne repurgatum, non fortis robora dextra  
 Quidquam heic proficiant. Noctis ne rumpe quietem  
 Anxius inquirens, cur te, tantosq; per orbem  
 Evertat populos & florentissima regna.  
 Ad stolidi illa, tuus quæ tristi è pectore motor  
 Expressit, ne verte animum. Deus omnibus unus.  
 Vi dextrae, invictisque animi virtutibus anteit.  
 Quis par consiliis dandis, quis laudibus illi  
 Contendat sophiæ? Domino quis certior index  
 Monstravit quod carpat iter, rectique suetum  
 Præscripsit callem? quis denique criminis ausit  
 Arguere æternum cœli terræque Monarcham?  
 Ergo agedum, his tandem missis, miranda memento  
 Pangere facta Dei, magnum quæ sparsa per Orbem  
 Terrarum haud dubio mortales lumine lustrant,  
 Conspiciuntque stupente animo licet eminus omnes.  
 Maximus ille opifex rerum est: ille omnia solus  
 Immotis regit imperiis, neque pervia menti  
 Humanæ est tanti Majestas Numinis. Ævum  
 Degit ut æternum, sic divæ sæcula vitæ  
 Annorum nequeunt numero comprehendier ullo.  
 En liquido extenuat subtractas æquore guttas  
 Lympharum, & pluvias resolutis aëre nimbis  
 Eliquat, è supero placidè stillantibus axe  
 Nubibus, & grato sata læta rigantibus imbre.  
 Magna quis extensas capiat per inania nubes,  
 Vibratasque altæ cava per tentoria sphaeræ  
 Cum sonitu ingenti flammæ? fulgore corusco

Irradiat



Irradiat sursum nebulas, tenebrisq; deorsum  
 Radices pelagi, terræque extrema patentis  
 Obnubit, populos per quas sæpe ille rebelles  
 Castigat, tristes effundens æthere nimbos.  
 Sæpe idem arentes misso prolixius imbre  
 Fœcundat placatus agros, largasque ministrat  
 Mortali menses, & vitæ alimenta caducæ.  
 Ille rubente volâ fulgur regit, utque feratur  
 In nubem oppositam iubet, & mox nuncius alto  
 Cœli implet strepitu fragor & mugitibus Orbem,  
 Dum calida in gelidam certat perrumpere nubes  
 Æmula & irarum magno velut acta furore.

## CAP. XXXVII

*Elins susceptum sermonem de admirandis Dei operibus pertexens, varia hic describit  
 Meteora, eorumq; omnium usum ex sapientissima Dei administratione explicat gravi  
 adhibita cohortatione, ut Iobus comparatione immensa Dei potentia & sapientia  
 tenuitatem suam agnoscat, neq; ultratum Deo congradi uelle audiat.*

**C**Or mihi, dum tacita mecum hæc ego mente revolve  
 Admiranda manus divinæ facta, subinde  
 Palpitat, emotæque tremunt formidine fibrae.  
 Auribus ô patulis, vibrata tonitrua cœlo  
 Accipite, horrissonoque Deus quos mittit ab ore,  
 Quosque sub ætherio mugitus dirigit axe.  
 Ecce vel extremas jaculatur fulgura ad oras  
 Terrarum, candente manu, quæ protinus ingens  
 Vox sequitur, rugiensque fragor, dum Iova tremendo  
 Ore tonat, totumq; vagas per inane procellas  
 Fulminaque & crebræ sinuosa volumina flammæ  
 Contorquens, rauco quatit altum murmure cœlum.  
 Magna ille humanique omnem superantia captum  
 Ingenii, pollente facit miracula dextra.



Iussit? extemplo densum nivis agmen ab alto  
 Depluit, & molli tellurem vestit amictu.  
 Nunc tenui Omnipotens agros rigat imbre virentes,  
 Nunc rapido effundit largos cum turbine nimbos;  
 Ac pluvio totum contristat flumine cœlum.  
 Diffugit actutum consuetæ ad recta colonus,  
 Dum sine more ruunt fetis è nubibus undæ,  
 Disiectisque rubens latè micat ignibus æther.  
 Interea que suos, cessante opere, ordine servos  
 Dinumerat, terris ut possit sole reducto  
 Exercere diem. Tunc & fera quæque repente  
 Lustra petit, cœcosq; specus, & permanet antris.  
 Illius imperio gravis è penetralibus Austri  
 Tempestas oritur, frigusq; Aquilonis ab axe.  
 Illius ad flatum subito rapidissima mundi  
 Flumina concrescunt & erant quæ nuper in oras  
 Effusa, angustis constringunt frigora claustris.  
 Ille modo exhaurit gravidas (dum aspergine prata  
 Irrigat optatâ) nubes, cœlumq; fatigat:  
 Fulmineas modò dædaleæ sola in ultima terræ  
 Dispergit nebulas, displosæ & spicula flammæ.  
 Illius hæc nutu in gyrum volvuntur, & omne id  
 Quod præscripsit, agunt; seu castigare nocentes,  
 Sive juvat siccis pluviis adaquare cupitis  
 Canvalles, sterilesque agros; seu deniq; iusto  
 Gratificari. Eho nunc paulum lobe resiste,  
 Arrectaque hauri mecum aure immensa potentis  
 Facta Dei, memorique animo miracula pende.  
 Tunc modum nosti aut seriem, qua nubila cœlo  
 Disponat, lucemq; Deus splendescere, pulsa  
 Nube, det ætheriam? tun' nosti ut lancibus æquis  
 In medio appensæ se nubes aëre librent?



Num tibi nota, Deus quæ omniscius edit in astris  
 Portenta? an caleant cur mæssis tempore vestes,  
 Sintque oneri, austrinis, nosti, levè flantibus auris?  
 Tunc Deo præsens, opiferque, ô amice, fuisti,  
 Cum superas latè coelorum expanderet arces  
 Sidereosque orbes, speculi cum fusilis instar  
 Splendentem ætherii molem firmaret olympi?  
 Fare agè, siquid habes de tantis dicere rebus,  
 Et simul edoceas quæis compellare Tonantem  
 Alloquiis par sit. Cæcis nos namque tenebris  
 Præstrikti, fœdæque gerentes conscia labis  
 Pectora, non illi confidimus hiscere contrâ:  
 Quod si clâm queritor, quis ei lamenta gementis  
 Deferat? audentem majestas protinus oris  
 Divini horrendo velut absorbebit hiatu:  
 Adversi radios & tela nitentia solis  
 Non ferimus rectis oculis, cum nubibus Euro  
 Discussis cœlum purgavit ventus apertum,  
 Aut Borea gelidi spirante à cardine mundi  
 Exoritur rutilo lumen fulgentius auro:  
 Qui Patris ætherii, solem qui condidit, ora  
 Spectemus, lucemq; & formidabile Numen?  
 Viribus immensis Deus est, vultuq; tremendo,  
 Atque hominum longè superat mens enthea captum:  
 Robora si spectes, si recti & iuris amorem,  
 Ille utroq; cluit, nec quenquam more Tyrannum  
 Opprimit, aut pœnis sine causa exercet amaris:  
 Propterea que timor tanto & reverentia Regi  
 A genere humano debetur, honosque perennis.  
 At vero haud cunctos, superis quos conspicit oris,  
 Prudentes videt esse animo, rerumque peritos.



## CAP. XXXVIII.

*Deus ex inopinato apparet in nimbo, Iobum graviter reprehendit ut insipienter locutum; cumque velut in arenam provocans, ad tenuitatis suae & inscitiae confessionem adigit, prolatis horum argumentis ab operibus tam Creationis, tam Administrationis univ[er]se, praesertim in Meteoris.*

**H**Æc ille. Ignifero tam demum è fornice cœli  
 Omnipotens Genitor, rerum cui summa potestas.  
 Sic Iobum aggreditur, nimboque affatur oborto;  
 Iste quis est, mea qui tenebris involvit opacis  
 Consilia, arcanasq; vias, legesq; verendas,  
 Qui vanis sine mente sonis & questibus auras  
 Verberat, exactamque canit sine crimine vitam?  
 Nunc agè, quando tibi tanta est certare voluptas  
 Cum Domino, accinctis descende in praelia lumbis  
 Miles uti, si qua est præsens in pectore virtus  
 Iobe tuo, mecumq; manum committe duello.  
 Te prior ipse rogabo, meæ sunt namque loquendi  
 Iam partes, tu, si quid habes, occurre vicissim,  
 Et mihi quod rogo, fac notum: Vbi nempe locorum  
 Sub prima enascentis eras cunabula mundi,  
 Cùm magna artificij jacerem fundamina dextra  
 Terrenæ molis? dic, si quod mentis acumen  
 Restat adhuc sanæ, quis tanti corporis aptas  
 Mensuras posuit, super extenditq; rubricam  
 Latomus, & certa structuram æquavit amussi?  
 Da, quibus incumbant Orbis fundamina palis,  
 Et lapidem angelli quis primum, imumque locavit,  
 Maxima quo lætæ solidatur machina terræ?  
 Immo vbi eras, cùm læta auroræ sidera primum  
 Concinere in nostras dulci modulamine laudes  
 Inciperent? ubi eras, cùm dilectissima Patris

Æterni



Æterni soboles, cœli quibus annuo regnum,  
 Iubila voce dabant hilares testantia mentes?  
 Indomiti quis vasta maris dic æquora, ab alvo  
 Materna ætherias velut erumpentia in oras  
 Oppositis clausit valvis, claustrisq; repressit,  
 Ne secum rapido convellant gurgite mundum?  
 Nonne ego, qui pelagi lymphis pro tegmine nubes  
 Injeci, densaque salum caligine, parvos  
 Qualiter infantes involvit fascia, cinxit?  
 Nonne ego? qui fines certo metasq; statuto  
 Fluctibus apposui, tumidoq; repagula ponto;  
 Et dixi, huc tantum venies, neve æstibus ultra  
 Progrediare sino. Heic animos, heic pone furentes  
 Oceane, horrifonos heic frangant littora fluctus.  
 Fare etiam (ut cœli rursum ad convexa reflectas  
 Lumina) tun' soli, vitalem ex quo hauseris auram,  
 Exortus, obitusq; sui præcepta dedisti,  
 Auroræq; locum ceu fixa lege notasti,  
 Vnde tibi extremas magnum per inaneprehendat  
 Terrarum metas, roseis dum lutea bigis  
 Trajicit ætherios orbes? ut noctis amata  
 Defensos tenebris exorta luce latrones  
 Excutiat terris, abigatque per avia mundi;  
 Vique argillæ instar, figuli quæ pollice formas  
 Induit innumeras, terra immutetur ad ortus  
 Pœhæos, capiatque novos à sole colores,  
 Quæis, pulchrâ veluti decorantur pascua veste;  
 Denique ut officio lucis capiantur iniqui,  
 Et vitæ infames spolientur lumine, fractis  
 Viribus, & fastu depresso animisq; superbis.  
 Rursus an abstrusos penetraſti imosque recessus  
 Æquoris immensi? num cœca voraginis antra



Calcasti ? nigraeve patet tibi janua mortis,  
 Lethalisque umbræ sedes, & mænia Ditis ?  
 Tune soli mensus lati spatia ultima, nosti  
 Extensis qua terra tenus se porrigat alis ?  
 Lucis ne hospitium, tenebris num regna dicata  
 Lustrasti, ut propria velut in regione prehensas  
 Solerti ipse manu ducas per nota viarum ?  
 Scilicet hæc nosti lobe, & cum conderet Orbem  
 Diva manus, tum natus eras, multusque tuorum  
 Annorum est numerus. Sedenim cedo numquid adisti  
 Thesauros nivis ? instructas num grandine cellas  
 Inspecti aërias, lapidosi & nubila nimbi,  
 Quæ seclerum in poenas & præmia iusta recondo ?  
 An tibi nota via, in varias quæ dissilit æthræ  
 Lux partes, terramque super dispergitur Eurus ?  
 Ecquis aquæ ductum ruituro coelitus imbrum  
 Dividit, aut nitidum designat in aëre callem  
 Per medias, flammis, nebulas ? quis inhospita mundi  
 Tesqua rigat pluviis ? solam vacuumque colono  
 Quis lavit immixtis terram alto è fornice bullis,  
 Vt, quæ sicca prius, largo humectata liquore  
 Luxuriet, campique herbis fragrantibus balent ?  
 Quis Pater est pluvialis aquæ ? quis & aëre guttas,  
 Stillantes genuit roris ? da, cujus ab alvo  
 Prodierit glaciale gelu ? quis nocte pruina  
 Brumali gelidam, frigusq; arbusta perurens,  
 Ac durescentem, lapidem velut, æquoris undam,  
 Extima ubi vastæ facies concrescit Abyssi,  
 Formauit ? Pliadumne potes constringere vernas  
 Delicias, hiemesve acrem cohibere rigorem,  
 Vinculaq; Orionis, rapidum quibus attrahit Eurum,  
 Solvere ? num ardentis stellam proferre Coronæ

Tempore.



Tempore ritè suo, nec non & ducere Plaustrum,  
 Arcturumque vales & motus legeſque polorum  
 Luſtraſti? monitiſve tuis errantia coelo  
 Sidera perficiunt curſum, imperitantq; latenti  
 Adſpectu terris? juſſune excita vocantis  
 Iobe tuo nubes effuſis imbribus arva  
 Proluet? emittes tu quaſlibet Orbis in oras  
 Fulgura? fulmineæ capient tua juſſa ſagittæ?  
 Quis ſophiæ arcanis decorat præcordia, menti,  
 Quis dedit & ſapere, & rerum primordia noſſe,  
 Naturæq; vias? ſuperi quis nubila mundi  
 Enumerat ſapiente animo? quis denique coelo  
 Suſpenſos gravidis proſternit nubibus utres,  
 Vt latè imbriferis perfuſo pulvere guttis  
 Arentes æſtuglebas tibi glutinet unda?

## CAP. XXXIX.

*Deus hic à generali rerum adminiſtratione ad ſpecialiorem quorundam animalium deſcendens, Iobum cecitatis ſuæ, atq; imbecilitatis ſumma convincit, ut qui inferioribus iſtis noſiſque animalibus curandis par non ſit, quibus tamen omnibus tanta facilitate Deus provideat.*

**P**Rædam ne immani per devia luſtra lænæ,  
 Quæ longo effectos ſenîo vix promoveret artus,  
 Venari tibi cura datur? catuline furentis  
 Ingluviem ſaturas rabidam, dum delitet altis  
 Ad prædam ſpecubus, depreſſo & corpore cœcas  
 Inſidias meditatur atrox? quis nam avia corvis  
 Per rura impaſtis quæſitam comparat eſcam,  
 Dum crocitant pulli jejuno ventre, Deumq;  
 Inclamant, dubio alarum per præta volantes  
 Remigio, & raucis poſcentes pabula roſtris.  
 Rupicolæne capræ partum & ſtata tempora gnaro



Observas animo ? vel quantos cerva labores  
 Parturiens ferat ? an lunam in cornua flexam  
 Momenta enumeras, quæis foetum gestat in alvo  
 Conceptum ? gravidine uteri fera tormina nosti,  
 Et quæ se incurvans pariat, partusque dolores  
 Cum foetu ponat ? viden' ut vel tempore parvo  
 Hinnuli agris miro solidati robore membra  
 Invaleant, crescantque foris, nec ad ubera matris  
 Egressi redeant ? quis aperto carcere Onagrum  
 Indomitum emisit ? quis capto vincula solvit ?  
 Ipse ego solus ei pro cæcto tesqua colonis  
 Nuda dedi, & sterilem innata falsugine terram.  
 Urbanos ridet strepitus, & liber ab omni  
 Servitio, duri non audit iussa magistri.  
 Ardua terrarum, vitides quibus anxius herbas  
 Vestigat, stabulum sunt illi & pascua læta.  
 Num tibi Rhinoceros cornu frontemque decorus  
 Serviet, et privos per te mitescet in usus ?  
 Præsepi cicut ille tuo stabitne, jugove  
 Cum bove iunctus agros unco sulcabit aratro,  
 Porcasque à tergo rastris confringet inertes ?  
 Tune illi, magno quod præstet robore, fidas  
 Credulus ? illi operas, messisq; impune labores  
 Committes ? tua sperato cum fœnore reddet  
 Semina, maturas referet sub horrea fruges ?  
 Nunc age, & ad pictas oculos converte volucres.  
 Stellatis tua numne manus vestivit ovantem  
 Pavonem plumis ? num Struthio (lobe) camelus  
 A te habet alarumque decus, pennasque superbas,  
 Quòdque sua in Libycis linquit securior oris  
 Ova, fovenda ipsis, quibus occultantur, arenis,  
 Nec pedibus tritum iri hominum, nec calce ferarum



Errantum meminit? duræ de more novercæ  
 Duriter illa suos, quasi non sua pignora, pullos  
 Tractat, & incassum partus perfuncta labore  
 Nil metuit miseræ per tanta pericula proli:  
 Quippe illi sophiamque Deus geniumq; negavit  
 Providum, & humanis concessas mentibus artes.  
 Ipsa tamen pernix pedibus, pernixq; volatu  
 Fertur in aërios campos sublimis, & acrem  
 Ridet equumq; equitemque, & cursu præterit ambo.  
 Tune ferocem animis, fortemque ad prælia finxit  
 Alipedem? fremitune jubas, collumq; tonitru  
 Induis? huncve, locustæ instar, terrore fugari  
 Posse putas vano? patulis en naribus ignem  
 Terrificum volvens generoso pectore fumat,  
 Telluremq; cavat pedibus, quassatq; patentes  
 Quadrupedante sono campos, gestitq; minaci  
 Ob vires animo. Mavortia fertur in arma,  
 Fertur in occursum telorum hostisq; pavorem  
 Impavidus ridet; suntq; illi prælia ludus.  
 Tantus amor pugnae, tantæ est victoria curæ.  
 Armorum temnit strepitus; neq; territus ensis  
 Vibrantis specie revocat vestigia. Sævam  
 Non pharetram sonitu, non hastam aut pila tremiscit.  
 Emicat, arrectisque fremit cervicibus, irâ  
 Terribilis, cursuque citos dum provocat Euros  
 Effossam deglutit humum. Si rauca cruentum  
 Buccina dat bello signum, vel si tuba, nescit  
 Stare loco, pugnaq; avidus vix classica Martis  
 Insonuisse putat. litui ad vocem exilit, auras  
 Hinnitu complens, horrentiaque eminus arma  
 Fulmineumque Ducum tonitru, fremitusq; potentum  
 Olfacit. Hæc pecoris laus est & robur equini.



Tune etiam Accipitrem celeri petere astra volatu  
 Edocuisti, alasq; calentem expandere ad Austrum?  
 Imperiis excita tuis Iovis ales in auras  
 Pennarum rapido per inania nubila motu  
 Evolat ætherias, sublimi & vertice petrae  
 Extruit hospitium, prærupta eductaque cœlo  
 Saxa colens arcesque, cupitam unde eminens escam  
 Scrutetur, prædamq; oculis exploret acutis,  
 Ac prævisa, suam quâ fuso sanguine pascat  
 Pullitiem, alitibus sectetur funera pennis.  
 Ecquid ad hæc (Deus inquit) ais? sacro & insuper ore  
 Sic lobum increpitat: Dominum ne, ardentia forti  
 Qui regit astra manu, quisquam, dum litigat unâ,  
 Erudiet? si mecum ultrâ contendere mens est,  
 Fare agè, & objectis nunc sodes mutua redde.  
 Dixerat. Huic lobus breviter sic insit amaro  
 Pectore. Mene, hominem vilem, Pater optime, mene  
 Responsare Deo? jam jam ultrò ego pressa tenebo  
 Labra manu: semel atq; iterum male sana locutum  
 Me fateor, culpæq; pudet, pudet usq; furoris  
 Heu tanti! nihil auditis miser amplius addam.

## CAP. XL.

*Deus lobum ex vimbo rursus compellens, & velut ad novum certamen excitans, reprehendit graviter quod in Iustitia sua & integritate tuenda immodicus fuisset. Deinde illum magis magisq; in superioris argumenti fide confirmaturns, divinitatem suam potestatem, proposito perillustri illius exemplo, asserit.*

**H**Æc ubi dicta, Deus rursus per nubila vocem  
 Edit, & increpitans pavidum compellat lobum.  
 Nunc agè, si qua tibi est generoso in pectore virtus,  
 Ense latus, lumbosq; armis ad prælia cinge  
 Bellator veluti, jamq; ad responsa parator

Reddenda



Reddenda ore pio cunctis quæ te ipse rogabo.  
 Iudiciumne miser speras dissolvere, & ut sis  
 Iustior, injustum statues me impunè? lacerti  
 Suntne tibi, ut lovæ qui temperat omnia, fortes?  
 Terrifica tun' voce tonas, dextraque rubenti,  
 Ut facio, rapidæ jacularis spicula flammæ?  
 Veste nitens pulchra formosos indue cultus,  
 Regaliq; habitu, divino atq; ore verendus  
 Iudicis æterni sacrum conscende tribunal.  
 Immanes animi disperge hinc inde furores,  
 Fastuq; elatos tumido præcordia torvis  
 Mortales oculis, si quid potes, aspice, & Orco  
 Sic meritos demitte; oculis, inquam, aspice torvis  
 Elatos, omnemque abigas ad nigra superbum  
 Tartara. Gaudentem vitiis, ubicunque locorum  
 Invenias, contunde gregem, pariterq; sub alto  
 Pulvere conde malos; conde ora, omnemque nocentum  
 Pro scelere æternis famam constringe tenebris.  
 Tunc equidem te, Iobe, tua pollente fatebor  
 Servatum dextra, tollamq; ad sidera laude.  
 Nunc autem pede ut ipse tuo te ritè deinceps  
 Metiri, finesq; intra consistere discas,  
 Ad nostræ monumenta manus restantia gnavos  
 Verte oculos aciemque & sanæ lumina mentis.  
 Contuere anguimanum turrato corpore Barrum,  
 Quem tecum his pariter feci considerare terris.  
 Ille feras quamvis miranda corporis alti  
 Mole omnes superet, quæ devia lustra pererrant;  
 Non tamen ex-rapto reliquarum more ferarum  
 Vivit, at irriguas, ceu bos, depascitur herbas.  
 Maxima vis lumbis, roburq; patentibus alvi.  
 Grande latet sinibus; nec non ingentis & instar.



Eductam cedri celeri quatit impete caudam.  
 In varios abeunt ramos, contextaque fibris  
 Vincla Cremasteres. Tubulos imitantur ahenos  
 Ossa cava, et ferroque horrent, & vectibus artus.  
 Scilicet hæc, inter magni miracula mundi  
 Bellua divi operis caput est specimenque stupendum.  
 Procera, qui fecit eum, promuscide latas  
 Ense velut stricto armavit ad prælia nares.  
 At nihilo tamen ille minus, quæ gramina passim  
 Proveniunt altis terrarum in montibus, hisce  
 Vescitur, infestus nulli, & contentus abundè  
 Sorte sua, victuq; dato. Quin ludit ibidem  
 Seposito pecus omne metu, saliuntque catelli.  
 Frondosi nemoris recubat sub tegmine; ripas  
 Quærit arundineas, ramorumque abditur umbra  
 Fœcundas inter salices torrentis ad oras.  
 Si quando ingreditur violenti fluminis alveum,  
 Stringit aquas, frangitque sua, velut objice posito,  
 Mole, maris fluctus. Iordanem crederet omnem  
 Faucibus admotum se posse haurire. Quis illum  
 Venator capiat sine fraude, altaeque latente  
 Tendicula nares & rostrum insigne terebret?

## CAP. XLI.

*Deus proposito hic altero potentissima administrationis suæ exemplo, videlicet Levia-  
 than, descriptioni illius plurimum insistit, ut & lobo & nobis omnibus ostendat quàm  
 reverenda sit & tremenda Conditoris majestas & potentia.*

**A** Spice nunc aliud visu mirabile monstrum,  
 Balænam, immani verrentem pectore marmor.  
 Tune trahes mediis incautam è fluctibus hamo,  
 Fune vel immerso linguæ? tun' naribus indas

Transfixis



Transfixis juncum ? tu spinæ cuspide malas  
 Pertundas ? num victa preces geminabit, & ore  
 Blandiloquo veniam supplex vitamque reposcet ?  
 Tecumne æternum domitatrix bellua fœdus  
 Icet, & imperium famulari lege subibit  
 Iobe tuum, cunctos vitæ ut tibi serviat annos  
 Mancipium veluti ? ludesne ea, ut alite parvo,  
 Apponesq; levi devinctam fune puellis ?  
 Hac super instituent epularum lauta sodales,  
 Venumve exponent dissectam in membra propolis ?  
 Tunc forare vales impactis altiùs uncis  
 Terga feræ, frontemq; dolosa involvere nassâ ?  
 Injice ei, sodes, bellator strenue dextram,  
 Injice, at actutum fato perimendus acerbo  
 Non tanti vlteriùs perges meminisse duelli.  
 En quicumq; parat technisve armisve furentem  
 Aggredier, vana spe mentem eludit hiantem,  
 Soloq; aspectu monstri concidet oris.  
 Nemo licet triplici cingatur pectora ferro,  
 Corde ferox adeò est, vel dextræ robore præstans,  
 Impunè ut valeat vastum expergiscere Cetum.  
 Quis se ergo impavidus me coram sistat, & armis  
 Audeat imparibus mecum contendere demens ?  
 Mene prior juvit, collato aut munere quisquam  
 Prævenit, condigna datis cui præmia reddam ?  
 Quin mea solius sunt quæ tu cunque sub alto  
 Contemplare polo, quâ quâ vaga lumina flectas.  
 At nunc fert animus, quando huc oratio nostra  
 Devenit tandem, Balenæ immania magnæ  
 Et membra, & vires, & corpus mole tremendum,  
 Structuræq; omnem penitus narrare decorem.  
 Magna quis illius reteget tibi stragula ? quisve



Diductum os geminis subigat parere lupatis;  
 Ferreaque ingentis recludat claustra palati?  
 Aspice, ferratos quantus circum undique dentes,  
 Terror agat, quanto stridant quasi cardine rictus,  
 Aspice, squamarum compacta ut scuta catenis  
 Implexis solident latum durissima tergum,  
 Nexuque in se adeò coëant conserta stupendo,  
 Nullus ut heic auræ pateat ventove meatus,  
 Nec quovis valeant disrumpi vincula nisu.  
 Horrifonos patulis ronchos ubi naribus edit  
 Sternutamenti similes gravis illicet ignis.  
 Emicat, atque oculi lato circum orbe micantes,  
 Auroræ radios, & solis clara laceffunt.  
 Spicula. Terrificis fax missa è faucibus ingens  
 Irradiat pelagus, gutturque immane coruscis  
 Undique scintillat flammis, ac fumeus æstus  
 Naribus emanat, qualem spumantis aheni  
 Lympha foco calefacta leves emittit in auras.  
 Immo etiam accensas (dictu mirabile) prunas  
 Exhalat, flammæque vomit vasto ore furentes.  
 Preterea in rigida monstri cervice recumbit  
 Immensum robur; dolor & coram exilit omnis,  
 Dum sibi naufragiumque inter, ventosque sonoros  
 Exultans medio captat mera gaudia ponto.  
 Illius æterno carnosæ melandrya nexu  
 Stricta hærent nulla minimùm divulsa lacunâ.  
 Firma, silex veluti, præduræ aut fragmina metæ,  
 Hinc atq; hinc validis horrent præcordia fibris.  
 Ingens cæruleo si quando è marmore corpus  
 Elevat, extemplò trepidant fortissima, nautæ,  
 Pectora; cùmq; ruens magno secat impete fluctus,  
 Secuncti, turbati animis & corpore purgant.



Siquis eam stricto petit ense, aut cuspide teli  
 Missilis, en frustra est; frustra est tetigisse sagittis.  
 Non gladius, non hasta, manu nec lancea forti  
 Torta, feræ hærebit durato in corpore fixa.  
 Ferrum illi palea est; æs, lignum putre; nec arcus  
 Cornua flexa fugant, nervoque impulsa sagitta.  
 Illa suæ confisa cutis munimine duro  
 Stupea non aliter Balearis verbera fundæ,  
 Saxaque tormentis emissa moratur ahenis  
 Quàm stipulas, calamosve leves: vibrata per auras  
 Hastarum tremulo deridet spicula motu.  
 Ventre imo scopulis placidè decumbit acutis,  
 Et sibi pro molli sternit pungentia lecto.  
 Equoreos gravido cum pulsat corpore fluctus,  
 Protinus horrendo fervercit murmure pontus,  
 Qualiter ebullit subjectis ollula flammis,  
 Pictorumque sonant crebro mortaria pulsu.  
 Splendenti, qua tranat aquas, candescere sulco  
 Dat maria à tergo, & mirâ, quacunque vagatur,  
 Canitie videas Neptuni aspergier undas.  
 Par nullum in terris animal, nullumq; sub alto  
 Gurgite, quod formâ, quod vique & robore, & arcto  
 Membrorum nexu, tanto componere monstro  
 Iure queas. Omnis penitus formidinis expertus  
 Naturâ, impavido mundi sublimia vultu  
 Despicit, atq; elata super Rex omnia fertur.



## CAP. XLII.

*labius tot Dei ex nimbo loquentis rationibus evictus, immensam illius potentiam, suamq;  
e contrario inscitiam jam plenius confitetur; seq. & audiri & doceri petens, peniten-  
tiam agit quàm humillimè. Deus verò reprehensibilis ejus sociis, de summa causa secun-  
dum ipsum pronunciat, tandemque omnibus in gratiam receptis, lobum in duplò b.e-  
torem quàm antea statum restituit.*

**D**ixerat. Huic Iobus demisso ita pectore fatur;  
Novi equidem & fateor, fortem, Pater, omnia dextrâ.  
Posses tuam; neve arte hominum, neu viribus ullis.  
Numinis averti decreta æterna potentis.  
Iste quis est, inquis, mea qui male sanus ineptis  
Consilia obscurat verbis? Rex maxime, tantæ  
Me culpæ esse reum fateor, stolidisque locutum  
Incomperta labris. Tua namque arcana, viaq;  
Et facta humanos longè superantia captus  
Turpiter ignorat mens cæca effetaque veri.  
Ergo ô non duras precibus tractabilis aures  
Pande meis, & ritè pio quo te ore rogabo  
Notifica. Famam sacrosancti nominis auris  
Audiit antè tui; sed nunc per nubila demùm  
Præsentem videre oculi te, atque inde loquentem ::  
Propterea que piget dictorum, & pænitet omnis.  
Patrati sceleris; fœdoq; in pulvere stratus  
Et cinere hoc, vitæ retracto gesta prioris,  
Detestorque, udis deplorans crimina malis.  
His utrinq; habitis sermonibus; ecce Eliphazum  
Increpat Omnipotens Themanitam, ac talia fatur.  
Fervidus irarum justusq; efferbuit in te  
Binosq; in socios æstus, quia recta loquuti  
De me non estis, meus hic ut servus Iobus.  
Sumite septenos jam vobis ergo juvencos,

Septenosque



Septenosque mares ovium, atq; ad limina Iobi  
 Tendite, sacratæ ab eo mactentur ut aris,  
 Cum precibus votisque piis, quæ nomine vestro  
 Fusa bonus facili aure traham; namq; illius, æquo  
 Os vultu aspiciam propius, ne digna luatis  
 Supplicia admissi sceleris, quia recta loquuti  
 De me non estis, meus hic ut servus Iobus.  
 Haud secus ac iussi faciunt Eliphazus, & unâ  
 Bildadus, Sopharque. Preces fert Iobus ad aras  
 Pro sociis supplex, adoletq; altaria flammis.  
 Annuit oranti Dominus, subitoque dolores,  
 Quæis miserum duris quasi vinctum funibus arctè  
 Strinxerat humani generis capitalior hostis,  
 Vertit in æterni non expectata tenoris  
 Gaudia, jacturam duplicata sorte rependens.  
 Iamq; omnes mutati animos fratresque, sororesq;  
 Et noti, & propius quos ipsi sanguinis olim  
 Admôrat vinculum, quosque est expertus amicos,  
 Conveniunt, lætiq; petunt penetralia Iobi.  
 Hæc se unâ exhilarant epulis, ac tristia flentes  
 Fata viri, tantasque irato à Numine plagas  
 Immissas, socium dictis solantur amicis:  
 Dantque illi nummum, dant unum quisq; monile  
 Aureum habere, sui monumentum & pignus amoris.  
 Prætereà Omnipotens jam tandem mente benigna  
 In famulum acceptâ duplo bona fœnore reddit.  
 Omnibus exuto iam pridem, extremaq; passo  
 Balantum pecudum bis septem millia donat,  
 Sexque Camelorum largitur millia, mille  
 Taurorum iuga, mille itidem superaddit asellas:  
 Quin septem huic etiam thalami gratissima, gnatos,  
 Pignora tres reddit præstanti corpore natus.

A forma quæ nomen erat: quæ maxima natu-  
 lemima ab auroræ radianti luce, secunda  
 Cassia, odorifero casia de stirpe, stibique;  
 Postrema a cornu, Keren-Happuc dicta vetustis  
 Patribus. His nemo mortali è semine gentes  
 Memnonias inter contendat munere formæ.  
 Larga his, sic patrium Genitor testatus amorem,  
 In pingui fratres inter patrimonia fundo  
 Distribuit. Centum posthæc jucundior annos  
 Et quater ipse decem patriis traducit in arvis  
 Felix prole pia, felix florente nepotum  
 Prole, vel ad quartam quos postquam excrescere vidit  
 Progeniem, grandævus obit, plenusque dierum,  
 Et placidâ in Domino compositus pace quiescit.

---

*FINIS.*

---



